

Diospa naatiwi udiwadi



Yura

Diospa naatiiwi udiwadi

Génesis
en el idioma
Yura



Diospa naatiwi udiwadi

Dios creó todo

(Génesis)

en el idioma yura [mts]

Texto: © 2024, Wycliffe Bible Translators, Inc.
ScriptureEarth.org

La ilustración a color de la carátula por Louise Bass,
se usa con permiso.

Las demás ilustraciones por
© 1996, David C Cook Publishing Co.,
se usan con permiso.

Editor:

Liga Bíblica del Perú
Jr. Huaraz 2030 (CONEP)

Pueblo Libre, Lima, Perú

Correo electrónico/sitio web:

<https://www.ligabiblicaperu.org>

Primera edición, junio de 2024

Hecho el Depósito Legal en la Biblioteca Nacional del Perú
Nº 2024-06788

Se terminó de imprimir en julio de 2024 en:

Altamar Ediciones e Impresiones EIRL

Avenida General Córdova 759 – 302 Miraflores

Lima - Perú

Tiraje: 300 ejemplares

Diospa naatiiwi udiwadi

Na Génesis awarawu taediwu nauxū nu tapitiru. Libro Génesis yuiya bai udita dai udidi. Naskata pedadi. Wakishiwari udidi. Enewariwi weeiriwi yuinawuri nawu Epa Dios Awē tsaima udiwadi. Epa Dios dukuwede naa keskara udibadi. Kayakawikui Epa Dios wisti Génesis aduxu duku yuiya. Génesis tsai ewapa rawe paxkanabea reke taea capítulos 1—11 wetsa 12—50.

Nauxū nu tapitiru naskaweke nadu wisti na tsai wisti historia primitiva. Libro Génesis aduxu capítulos 1—11 duku tapibatiru sharakui natiwi na baitiu ikawu na atū iwu. Naskatari awara wetsa keskarawu yurawu Epa Dios atū diaiwū. Dukuwede awīwe iki taedi na rawe Dioswe isharakuipaudiwu. Dikakuipaudiwu Epa Dios atu yuiyaitu. Dukuwedeweta awīwawe tsai bitsisipa shara dikadiwuba. Naskakadax chakai taediwu. Naa rawe uduax yurawawe atū chaka udi taedi. Ma chakawiawawe Epa Diospa atu putawixu atu putadiba ipaxanuwu. Naskake libro Génesis adu keda.

Historia de familia capítulos 12—50 naatu duku tapibatiru yurawawe atū chakawu Epa Diospa suaxutiru. Naawu iki taediwu Abrahampa awē kaiwuu awē kaiwuu uduax ichapanawāwu kaipakedakawu. Diaiwu Diospa Abraham yuidi awē bai aduax katanu naskawatari yuidi: “Bai ē bia inata mewē kaiwuu uduax ichapanawāwu kaipakedakawu ichapa ipaxanuwu”. Epa Diosweta Abrahampa shinakuidiwu yurawuwetariwi. Epa Diospa yuikuidi: “Atū kaiwuu uduax ichapanawāwu kaipakedakawaweri naa shina wupaxanuwu”. Nawu Isaac Jacob idiwu. Nawu bai wetsadua ipaudiwu. Epa Dios dikakuipaudiwu atu yuikuiyaitu. Bai Canaán adua Abrahampa bai kawashara peiuxū widi nadu awē awī Sara baiwanupukunuwu awē kaiwuuri nadu baipakexanuwu israeliwu.

Nadu israeliwawe atū epa Abraham iki taedi bai wetsa aria libro Génesis duku tapibatiru. Epa Diosweta yurawawe shinadiwu nadu Génesis keda naa yurā akuidaitu. Epa Diospa na apaiyai axutiru. Epa Dios awē shina yura retetaba yuina retexu inayaitu Epa Dios idibatiru awē chaka suaxunu.

Dios naatiwi udiwadi

1 ¹Diospa udiwakī taewadi dai yawi bai. ²Bai sharaba idi. Wakishiwane enewa wepuia idi. Epa Dios awē Espíritu Santo enewa manaū kawakedi. ³Epa Diospa yuidi: “Chaxayai inu”, waadu chaxatadi. ⁴Epa Dios uīya sharakui idi. Chaxayai ita wakishiwa paxkanawadi. ⁵Chaxayai adekī peda, wadi. Wakishiwa adekī yabe, wadi. Yabeta pedai taedi. Ma peda wisti ika idi.

⁶Epa Diospa yuidi: “Daiwe”, waadu daidi. “Dai nexpakayaduax ede paxkanu”, wadi. ⁷Naskawaxu dai Diospa udiwadi. Ede atiriwi dai mera ikaidu atiriwi amanauri idi. ⁸Diospa uīya dai sharakui uīdi. Na adekī dai, wadi. Naskata yabeta pedadi. Ma peda rawe ika idi.

⁹Naskata: “Dai nunamariduax nadu wisti enewa ichanu”, Diospa wadi. “Bai betu tsekenu”, waadu kushi naskatadi. ¹⁰Epa Dios bai betu adekī bai, wadi. Enewa nadu wisti ichawu adekī enewa, wadi. Epa Dios uīya shara idi. ¹¹Diospa bai adu uīya sharakui idi. Bai adu iwiwu ma ika idi. Wibiyawu wasiwu exeyawu idi. ¹²Bai adu charuwu wetsa keskarawu wuaita wasi exeyawu ita iwi wibitiruwu Diospa uīya sharakui idi. ¹³Ma peda tres ma ika idi.

¹⁴Naskata Epa Diospa yuidi: “Dai mera chaxayaiwu inu Peda yawi yabe paxkanawaduwu. Naawuxu peda tapita wariya bechaka nu tapinu. ¹⁵Dai meraxu bai adu chaxaiwu inu”, waadu naskadi. ¹⁶Epa Diospa chaxayai ewapa rawe wadi. Wari pedata chaxanu uxe yabetari chaxanu exteweruri wadi. ¹⁷Nama chaxanuwu Epa Dios dai adu netadi. ¹⁸Chaxayai ita wakishiwa

paxkanawadi. Pedata chaxata yabetari chaxanuwu. Epa Diospa uīya sharakui idi. ¹⁹Naskata ma peda cuatro ika idi.

²⁰Naskata Epa Diospa yuidi: “Ede mera ikawu wetsa keskarawu inu. Enewawu mera ikawu ichanuwu. Peiyawuri wumakaya dai mera yuyatiruwu inu”. Diospa uīya sharakui idi. ²¹Naskawaxu Diospa ede meradua shima ewapanawawu kaitiru udiwata peiyawu udiwadi. Diospa uīya sharakui idi. ²²Tsai shara iskara atu yuidi: “Ichapakexakawe yuina wetsa keskara edewu mera ikawu. Ewapanawawuriwi ichapa wakewuya ipaxanuwu. Peiyawu wetsa keskarawu inu. Peiyawawe wakewu bai adu ichapakexanuwu”, Diospa wadi. ²³Yabeta pedadi. Ma peda cinco ma ika idi.

²⁴Epa Diospa yuidi: “Bai adu ikawu yuina idawanabetiruwu dii mera yuina ikawuri ichapakexanuwu”, idi. Naskatari: “Yuina pitiruwu ita yuina pitiruwuba bai adu xaratiruwuri inu”, Epa Diospa waadu naskatadi. ²⁵Epa Diospa udiwadi yuina pitiruwu ita yuina pitiruwuba bai adu xaratiruwuri. Epa Diospa uīya sharakui idi.

²⁶Naskata yuidi: “Dukuwede nu udiwanu duku keskara inu. Yuinawu atū iwu inu”, Diospa wadi.

²⁷Diospa dukuwede udiwadi
awē shina keskara inu.

Dukuwede udiwata awīwu udiwadi.

²⁸Epa Dios tsai shara iskara atu yuidi:
“Ichapakexakawe.

Ede mera ikawu shimawawe atū iwu peiyawawe atū iwuri
na dai mera yuyatiruwuri
yuinawawe iwuri bai adu xaratiruwuri nawuwawe iwu mi
ipadaka.

²⁹Ē bia bai inai. Iwi wibiyawu exeyawu naawu mi pitiru.

³⁰Yuina wetsa keskarawu peiyawu xaratiruwu wasiwu inata
badi peiwuri ē atu inai nawu pinuwu”, Epa Diospa Adán wadi.

³¹Diospa uīya sharakui idi. Ma peda seis ma ika idi.

2 ¹Naskadu Diospa bai yawi dai naatiwi awarawu udiwakī
adaitidi. ²Seis peda yuduta ma peda siete ikadu Epa Diospa
tededi. ³Naa pedata yurawawe tedekata idibapakexanuwu.

Awarawu udiwakī taewayabea naa pedatamai keyuxu. ⁴Ikūkui Epa Dios udiwadi dai yawi bai.

Dukuwede Adán bae Edén adu idi

Naskadu Epa Diospa bai yawi dai udiwakī adaitidi.

⁵Dai yawi bai udiwaitadu adu diiwu wasiwu exeyawu idiba. Epa Diospa adu ui ibayuabadu. Adu dukuwede idiba yudupana. ⁶Naskawia bai meraduax ede tsekeiniuwadi na baitiixu bechananu. ⁷Epa Diospa bai yura wata dukuwede udiwadi. Naskawata awē rechukuki xuū adi. Dukuwede xakaita widinakawādi.

⁸Na wari uwaikiri bai Edén adu nadu Diaiwu Diospa awē wadawu idi. Naskata na wai adu Diospa da dukuwede udiwaa nadu



© 1996 David C Cook

Génesis 2.8 adewe.

ibadi. ⁹Naduxu Diaiwu Diospa dii wetsa keskarawu wuaibadi na iwiwu sharakuiwu idi. Awē wibiwu pitirupinishara naa wai babaki nexpakaya iwi rawe diawu idi. Wibi wetsa piax nu ipatiru. Wetsauxū chaka tapita shara tapitiru idi. ¹⁰Naa bai Edén aduax ede tsekepaudi. Ene bai bechanawapaudi naa ede axka awē tuaika cuatro idi. ¹¹Axka ewapa awē ade Pisón. Naa bai Havilátiixu chiti chiti ika. Havilá adu nadu oro idi. ¹²Naa bai adu oro sharakui idi. Naduriwi iwi awē ede ini sharakui. Naduri ruwe ónica. ¹³Awē axka wetsa Guihón. Naū bai Cus ari kaa Custiixu chiti chiti ika. ¹⁴Axka wetsa Tigris. Na bai Asiria wari uwaikiri idi. Wetsa axka awē ade Éufrates idi.

¹⁵Epa Diospa awē wai Edén nadu dukuwede ibadi naduxu yuduta kexenu. ¹⁶Naskata Diospa dukuwede yuidi: “Da wai adua iwiwu atū wibiwu mi pitiru. ¹⁷Diwu mera dia iwi awē wibi ma pitiruba. Nauxū chaka tapita shara mi tapitiru. Awē wibi piyabawe. Piax mi datiruki”, Epa Diospa Adán wadi.

¹⁸Epa Diospa iskadi: “Dukuwede ares itiruba. Ė watura wetsa udiwanu aweta yudubis inu. Na aweta yudubis shara iki”, idi.

¹⁹Yuina wetsa keskarawu peiya wetsa keskarawu udiwaawu naawu Epa Diospa bai udiwaxu dukuwedeki wedi. “Atu adepakenu”, ixu nawu aki ewedi. Naskadu dukuwene yuina wetsa keskarawu peiyawu naawu wisti rasi awara ade adea naa awē ade ipaxanu. ²⁰Naskaxu dukuwene yuina idawanabetiruwu peiyawu dii mera yuinawu atu adedi naatiiwi. Naskaweke yuinawu meradua tsua wichidiba Adánwe rawenu.

Naskawata dukuwene awē shina meraxu shinadi: “Eweta yudubis ē wichiyyuba”, idi. ²¹Naskake Epa Diospa dukuwede uxabakuixu awē pishi wisti tsekaxu awiana na ika keskara wadi. ²²Naskata naa pishi xaū Epa Diospa awīwu udiwadi. Naa awīwu dukuwedeki ewedi.

²³Naskaidu awīwu uīta dukuwede ares wisti iskadi: “Da ewē dabikui ewē pishiri. Naskake ē adei awīwu, ē wai dukuwede uduamai ewē pishi wita Epa Diospa udiwaa”, Adán idi.

²⁴Naskadike na nu ibis keskara iskapakedaka. Dukuwede awīwuwe wianaxikī apaduax awaduaxri paxkatiru. Awīwe wianakadax na rawe yura wisti keskara itiruwu.

²⁵Na dukuwede Diospa udiwadi dukuwene awē awīri chituria ipaudiwu. Naskawikadax rawīpaipaipaudiwuba.

Dukuwene Dios ikūira wadiba

3 ¹Naatiwi yuinawu Epa Diospa udiwadi. Rudu chaniki tapikuiya ipaudi. Runu awīwu ñukadi: “Ikūme Diospa batu yuiya: ‘Iwiwu atū wibiwu ma pitirubame’, batu waame”, runu wadi.

² Awīwawe kebadi: “Watura iwi wetsa awē wibi nu pitiru.

³Diospa duku yuita: ‘Iwiwu wada nexpakayadua iwi wisti dia awē wibi ma beetiruba piax ma datiru’, duku waita”, Evapa rudu wadi.

⁴Runu awīwu yuidi: “Ē bia paraiba. Mi dadakaba. ⁵Diospa tapikuiya ma piax shara tapita ma chaka tapitiru. Dios keskarakui ma itiru”, runu wadi.

⁶Evapa uīya iwi awē wibi sharakui uīdi. Naskaxu tapikuiya iixikī raixu pipaikuidi wibi wisti wita pidi. Chipu wede inadi. Naaturi pidi. ⁷Naskatadaidu naa wibi pikata kushikui tapitadiwu. Na raweta uīyawu atū kaya ñewakui idiwu. Naskata higuerapa pei ekexdiwu sawexikakī.

⁸Adánweta Evapa dikadiwu Epa Dios wai adu uwaitu ñatapake deweaidu. Udei wukadi ichudiu iwiwu nama. ⁹Epa Diospa Adán kedadi: “Adán mi wanime”, wadi. ¹⁰Adánpa kebadi: “Ē bia dikai wai babaki mi uwaitu ē besei. Ñewax ē udea”, wadi.

¹¹Epa Diospa Adán ñukadi: “Aweskawaxu mi tapiame mi ñewa. Iwi awē wibi ma piame ‘Piyabawe’, ē batu wawiaké”.

¹²Adánpa kebadi: “Na awīwu ewe rawebis inu mia inaita naatu ea wibi ina ē pia”, wadi.

¹³Naskake Epa Diospa na awīwu ñukadi: “Awa mi aweskawaame”, Epa Diospa Eva



© 1996 David C Cook

Génesis 3.6 adewe.

wadi. Awīwawe kebadi: “Runu ea parayaitu ē wibi pia”, Evapa wadi.

¹⁴ Naskake Epa Diospa rudu yuidi: “Na mi akauxū ē bia chakawai. Datiā mi bai adu mi xarapakedaka. Mi bai putu pipadaka”, wadi.

¹⁵ Epa Diospa rudu yuidi: “Awīwuwe mi duikaspananapakedaka. Naskatari mewē kaiwuu uduax ichapanawāwu kaipakedakawu. Na awīwawe awē kaiwuu uduaxri ichapanawāwu kaipakedakawu nawuwe duikaspananapakedakawu. Mewē bapuki bia peabadu awē tae chichukuki mi chachixiwi”, Epa Diospa rudu wadi.^a

¹⁶ Epa Diospa awīwu yuidi: “Mi wake kaī mi pae beepakedaka. Mewē wede mi duipakedaka. Naatu bia yudupakedaka”, Diospa Eva wadi.

¹⁷ Naskata Epa Diospa dukuwede yuidi: “Ewē tsai mi dikataba mewē awīni tsai mi dikana. Mi iwi awē wibi pia ‘Piyabawe’, ē bia wawiake. Miriwi ubiskuipakedaka. Miuxū ē bai chakanawai. Mi ichapa yudupakedaka piixikī”, Diospa wadi. ¹⁸ “Nawawakisiku tutux buxawuriwi mewē bae adu nawu wuaipadaka. Dii mera kawasaki mi weru tuu keskara wedaxu mi pipadaka. ¹⁹ Mewē yuduxu mi piti pipadaka. Naskabixaki mi bai udidi. Ma daaxriwi ana mi bai inupukui”, Epa Diospa Adán wadi.

²⁰ Adánpa awī adekī Eva,^b wadi: “Naa uduax yurawu kaipakedakawu”, wadi. ²¹ Adán awīya Epa Dios yuina wichī atu saweti waxudi sawenuwu.

²² Epa Diospa yuidi: “Ma datiā wedewe awīwe ma duku keskarawu. Shara tapita chaka tapiawu”, Dios idi. Naskata: “Na iwi awē ade na piax ipatiru awē wibi piyabanuwu. Naa wibi pikadax dapaxatiruwuba”, Epa Dios idi.

^a 3.15 Eva na Diospa yuiya keskadiba. Satanás dikadi. Nadu chakakuiwupaudiwu. Ma naskabiswuadu Jesús bai adu udi. Evapa awē rewudu Jesús idi. Nuku chakawu uduax ubiskuidi cruz aduax nadu Satanás pa awē bapu Jesús pa peabai keskara idi. Nuku chakawu uduax Jesús bai adu udi. Na yurawawe iküira waawu naawu Jesús pa atu bitsisipa inadi. Satanás pa atu chakawabapaiyai anuwuba. Naskawiax Satanás pa awara chaka yurawu atu abatiru. Jesús cruz aduax ubiskuidi yurawawe atū chakawu suaxudi. Da verso adu duduri yuipai iskara yuiki. Jesús pa awē tae chichukuki Satanás pa chachiadu. ^b 3.20 Yura naatiwiwu atū ewa.

²³Naskake Epa Diospa atu tsekadi Edén aduxu. Yudukí taewanu na bai aduax udidi adu.

²⁴Ma atu putata Diospa ángelwu waī awē ade Edén adu nichidi wari ubiskiri. Epa Diospa espada xuisai keskara wai babaki wadi tsua adu kayabanu wibi shara tsuā piyabanu na piax dayabapakexanuwu.



© 1996 David C Cook

Génesis 3.24 adewe.

Caínwe Abel

4 ¹Dukuwede Adán awī Evawe idi. Evapa ma wake dadea idi. Naskata werunawake kaīdi. Awē ade Caín idi. “Ea Epa Diospa wake ina”, Eva idi. ²Chipu Abel kaīdi.

Caínpa udiwetsa Abel oveja kexebis ipaudi. Caínri wai yudubis ipaudi. ³Peda wetsa Caínpa awē wai adua yudu wudi Epa Dios inaxikí. ⁴Abelpari oveja wake na kaī taeyabea xuakuiya wudi Dios inaxikí. Abel Diospa idibaxudi. ⁵Abel akai keskawadiba Epa



© 1996 David C Cook

Génesis 4.5 adewe.

Diospa Caín awẽ yuduwuki idibaxudiba. Naskake Caín sidakui wechupidi.

⁶Epa Diospa Caín
ñukadi: “Aweskai mi sidai
mi wechupime. ⁷Mi shara
akaitu ē bia axusharatiru. Mi
chakaitu chakapa bia winui.
Askataba mi chaka winutiru”,
Epa Diospa wadi.

⁸Wetsatiā udu nu
uīkanuwe Caínpa udiwetsa
wadi. Narixu kushata
udiwetsa retedi.

⁹Epa Diospa Caín ñukadi:
“Wani mewē extu Abelme”,
Diospa Caín wadi. Caínpa
kebadí: “Ē tapiaba. ē
kexeaba”, Caínpa wadi.



© 1996 David C Cook

Génesis 4.8 adewe.

¹⁰Diospa yuidi: “Aweskawakī mi iskawaame. Ma ē tapia mewē extu mi retea. Bai aduxu mewē extu awē imi ea ūnuka awa chakawaba. Naskake ē axui. ¹¹Naskake mi chakakui iki ana da bai adu mi ikiba. Mewē extu mi retea ē bia bai wetsadu putai. ¹²Ma mi wai wawiadu yuduwu bia kaixudakaba. Naskax kawa kawakakaīkī mi tedepakedakaba”, Epa Diospa Caín wadi.

¹³Naskake Caínpa Dios kebadi: “Mia ea chakawai keskara ē tedetiruba. ¹⁴Datiā ma mia putai da bai aduxu. Ē biki udekawakakaīdi ē kawasapakedaka. Watura wetsa ea wichixu ea retexiwi”, Caínpa Dios wadi.

¹⁵Epa Diospa kebadi: “Wetsā bia reteke siete veces ē ubiskuibatiru”, Epa Diospa Caín wadi. Naskata Epa Diospa Caín tutuwadi naatiwiwai tapikaxu reteyabanuwu. ¹⁶Naskata Epa Dioswe tsaita Caín bai wetsari kadi nari iki kai awē ade Nod na wari uwaikiri Edén adu.



© 1996 David C Cook

Génesis 4.16 adewe.

Caínpa awē rewuduwu

¹⁷Caín awīwe idi. Ma wake dadeyabexakī werunawake kaīdi. Awē ade Henoc idi. Naskata Caínpa atiriwiweta pexe ichapa wadi. Pexe ichapa adekī awē wake adekiri adedi. ¹⁸Henocpa awē wake Irad idi. Iradpa awē wake Mehujael idi. Mehujaelpa awē wake Metusael idi. Metusaelpa awē wake Lamec idi.

¹⁹Lamec awī raweya idi. Wetsā awē ade Adá idi. Awī wetsa Zila idi. ²⁰Adá wake dadeyabexakī werunawake kaīdi. Awē ade Jabal idi. Jabalpa yuina wichi tapas wakī taewadi. Naaturiwi yuina idawakī taewadi. ²¹Jabalpa awē extu Jubal idi. Jubalpa guitarra keskara awē ade arpa akī taewadi xaīti keubakī taewadi.

²²Silápariwi wake adi. Awē ade Tubal-caín idi. Bronce udiwata hierrori naa ruwe kerexwawe awara wetsa keskarawu Tubal-caínpa udiwapaudi. Aū yudutiruwu udiwapaudi. Naatu awē pui Naamá idi.

²³Peda wetsa Lamecpa awī rawe yuidi awē awī rawe atū adewu Adáwe Zila.

“Ē batu yuiyaitu. Ea dikasharakawe.

Dukuwede ea tseweawake ē retea.

Pekupari ea kushake.

²⁴Epa Dios yuiya Caín watura wetsa reteke siete veces ubiskuitiru.

Watura wetsā ea reteke setenta y siete veces ubiskuitiru”,
Lamecpa atu wadi.

Adánweta Evapa atū wake Set

²⁵Adán awiana Evawe idi. Naskayabexakī werunawake kaīdi. Evapa awē wake adekī Set, wadi. Duduri yuikī: “Caínpa Abel retedi. Awē naskake Diospa ea wake ina. Naskake ē adei awē ade Set”, Eva idi.

²⁶Naskadiadu Setpari wake adi. Werunawake idi. Awē ade Enós idi.

Naskaxu yurawawe Epa Dios awē adeuxū kiwīkī taewadiwu.

Adánpa awē kaiwuu uduax ichapanawāwu kaipakediwu nu dikanu

5 ¹Adánpa awē kaiwuu uduax ichapanawāwu kaipakediwu atū adewu ē batu adexunu. Epa Diospa dukuwede udiwadi awē shina keskara ita naa keskarari inu. ²Dukuwedeya awīwu udiwata Epa Dios atu tsai shara yuidi. Atu udiwata Epa Diospa yuidi: “Atū ade dukuwede iki”, atu wadi.

³Adán ciento treinta wari axu awiana wake adi. Werunawake idi. Apa keskarakui idi. Adánpa awē wake adekī Set, wadi. ⁴Set kaīdiadu ochocientos wari Adán idi. Ana wake wetsawu adi. Xutukuwake ata werunawake adi. ⁵Novecientos treinta wari akax Adán dadi.

⁶Set ciento cinco wari axu awē wake Enós adi. ⁷Enós kaÿabeadu Setpa wakewu apādi xutukuwake ata werunawake adi. Set ochocientos siete wari iyupaudi. ⁸Novecientos doce wari akax Set dadi.

⁹Enós noventa wari axu awē wake werunawake Cainán adi. ¹⁰Cainán kaÿadiadu ochocientos quince wari Enós idi. Ana wake wetsawu adi. Xutukuwake ata werunawake adi. ¹¹Novecientos cinco wari akax Enós dadi.

¹²Cainán setenta wari axu awē wake Mahalalel adi.

¹³Mahalalel kaÿadiadu Cainán ochocientos cuarenta wari idi.

Ana wake wetsawu adi. Xutukuwake ata werunawake adi.

¹⁴Novecientos diez wari akax Cainán dadi.

¹⁵Mahalalel sesenta y cinco wari axu awē wake Jéred adi.

¹⁶Jéred kaÿadiadu ochocientos treinta wari idi. Ana wake wetsawu adi. Xutukuwake ata werunawake adi. ¹⁷Ochocientos noventa y cinco wari akax Mahalalel dadi.

¹⁸Jéred ciento sesenta y dos wari axu awē wake Henoc adi.

¹⁹Henoc kaÿadiadu Jéred ochocientos wari idi. Ana wake wetsawu adi. Xutukuwake ata werunawake adi. ²⁰Novecientos sesenta y dos wari akax Jéred dadi.

²¹Henoc sesenta y cinco wari axu awē wake Matusalén adi.

²²Henoc na Epa Dios yuiyai keskapaudi. Matusalén kaÿadiadu Henoc trescientos wari idi. Ana wake wetsawu adi. Xutukuwake ata werunawake adi. ²³Henoc trescientos sesenta y cinco wari iyupaudi. ²⁴Henoc naa Epa Dios yuiyai keskapaudi. Naskaitu Epa Dios iwiyaidu Henoc yabarisatadi.

²⁵Matusalén ciento ochenta y siete wari axu awē wake Lamec adi. ²⁶Lamec kaÿadiadu Matusalén setecientos ochenta y dos wari idi. Ana wake wetsawu adi. Xutukuwake ata werunawake adi.

²⁷Novecientos sesenta y nueve wari akax Matusalén dadi.

²⁸Lamec ciento ochenta y dos wari axu awē wake werunawake adi. ²⁹Awē wake adekī Noé, wadi. Naskaxu Lamecpa yuidi:

“Diaiwu Diospa bai chakanawadi. Naskake yudui nu ubiskuibis da wake duku tedebanupukui. Naskake ē adei awē ade Noé ē wai”, Lamecpa wadi. ³⁰Noé kaÿabeadu Lamecpa quinientos noventa y

cinco wari idi. Wakewu apādi werunawakewu ata xutukuwake adi. ³¹ Setecientos setenta y siete wari akax Lamec dadi.

³² Noé quinientos wari axu awē wakewu Sem Cam Jafet adi.

Dukuwedewawe atū chakawu

6 ¹Dukuwedewu awīwuuri ichakaxu wakewu apādiwu xutukuwake taewadiwu. ²Epa Dios awē wakewawe awīwu sharakui uīkata wianapaudiwu. ³Naskaxu Epa Diospa yuidi: “Ē yurawu atu ibapakedakaba. Atuki ciento veinte wari wisti ipadaka”. ⁴Dukuwedewu keyabasuawu bitsisipakui nawu setenabiswu ipaudiwu. Epa Dios awē wakewawe yura chakawuwe wianakaxu wakewu apaudiwu. Yurawu baitiixu ikawawe atū ade tapikuiyawu ipaudiwu.

⁵ Epa Diospa uīya bai adua yurawu chakawu iwupaudiwu. Naskake na pedatiwi chaka wisti shinapaudiwu. ⁶Epa Dios shinabetsata awē uīti meraxu shinadi na yurawu udiwadixakī bai adu ikawu. ⁷Naskaxu Diospa yuidi: “Ē yurawu baitiixu udiwadi ē atu adaiti. Dukuwedewu awīwuuya yuina wetsa keskarawu. Na xaratiruwuri peiyawuri ē atu adaiti. Ē shinabetsai atu udiwadixakī”, Epa Dios idi.

⁸ Naskawiax Epa Diospa Noé uīdi dukuwede sharakui ipaudi.

Noépa awē xaxuwā

⁹ Noé dukuwede sharakui ipaudi. Epa Dios dikakuipaudi. Yurawu nadu askayaидu tsua shara ipaudiba. Epa Dios dikakaspapaudiwu. Tsua Noé keskara ipaudiba. ¹⁰ Noé tres wakeya idi. Awē wakewawe atū ade wetsa Sem wetsari Cam wetsari Jafet idi.

¹¹ Epa Dios yurawu uīya chakakuiwu idiwu. Setenakata




© 1996 David C Cook

Génesis 6.9 adewe.

retenakata chaka wisti shinabiswu ipaudiwu.¹² Naatiwi yurawu ma chakakuiyawu idi. Diospa bai adu yurawu uīya chakakuiwu idiwu¹³ Diospa Noé iskawadi: "Naatiwi bai adu yurawu ikawutii ē atu adaiti atū chakawu uduax setenakata retenabiswuke.¹⁴ Iwi awē ade ada wepūya xaxuwā wawe. Xaxuwā kede ichapaya wata uke mera wuī wuyata xawakawiri wuyawe ede ikiyabanu.¹⁵ Awē chai ciento treinta y cinco metros wawe. Awē petari veintidós metros y medio wata awē keya trece metros y medio wawe.


¹⁶Tres pisos wawe. Xaxu mamakaya weputi medio metrori wawe. Awē patutana kaīti wistiri wawe.¹⁷Ui ē webaxiwi naatiwi bai adu ikawu enewane atu adaitikuinu. Naatiwi dai bitukubexikadi.

¹⁸Naskaweke dukuraweta nu shinaxiwi. Xaxuwā mera ikixikadi mewē wakewawe atū awī ita mewē awīri bewe ikīxiwi.¹⁹ Naskatari yuina wede yawi atū awī yawi atu ikibata yuina idawanabetiruwu yuina dii mera ikawuri atu mi ikibaxiwi.²⁰ Peiyawuri nama xaratiruwuri yuina wetsa keskara rawe naawu xaxuwā mera bewe ikinuwu naawu asayabanuwu.²¹ Naskata



© 1996 David C Cook

Génesis 6.14-16 adewe.



© 1996 David C Cook

Génesis 7.1-5 adewe.

yuinawawe atū piti wetsa keskarawu xaxuwā mera ikibawe batunawuri nawu piixikakī”, Diospa Noé wadi.

²²Epa Dios yuiya keskakuidi Noé.

Waipawā

7 ¹Epa Diospa Noé yuidi: “Naatiwi yurawu adua berewisti mi dukuwede shara ibis. Xaxuwā mera ikiwe mewē kaiwuuwe. ²Yuina sharakuiwuri^c nu pitiru atu ikibawe siete

^c 7.2 Yuina sharawu na piatiru vaca, chaxu, oveja. Yuinawu na piatiruba camello, utsa, chancho, rudu wetsa keskarawu.

dukuwede siete awīwu. Na nu pitiruba wede wisti ikibata awī wisti ikibawe.³ Naskatari siete peiya wedewu ikibata siete peiyawawe atū awī ikibawe naa yuyabisu naawu bai adu ipaxanuwu.⁴ Siete peda ikadu ē ui ibaxiwi taewakī cuarenta peda ui inu cuarenta yabetari ui inu. Naskaxu ē naatiwi adaitikuixiwi naa ē udiwadiwu”, Epa Diospa Noé wadi.

⁵Epa Diospa Noé yuiya keskakuidi.


⁶Enewane naatiwi wepuadu Noé seiscientos wari ma aka idi.⁷ Noé awē awīnu awē wawawati ikikata awē wakewuri xaxuwā mera ikidiwu asayabaxikakī.⁸ Naskatari yuina sharakuiwu ikikata na nu pitiruwubawuri ikidiwu. Yuina nu pitiruwuri ikidiwu yuyabisu xaratiruwuri.⁹ Epa Dios yuiya keskakuidi. Awīwe wede ikidiwu Noéwe.

¹⁰Siete peda ma ikadu ui wei taedi na baitiixu.¹¹ Noé seiscientos wari ata uxe rawe ma akadu diecisiete pedari ma



© 1996 David C Cook

Génesis 7.11 adewe.



© 1996 David C Cook

Génesis 7.23 adewe.

ikadu bai meraduax enewawu tushainiwuwawuwādi. Naskatari dai meraduax uiwa ichapa wei taedi. ¹²Cuarenta peda ui ichapa ita yabetari ui ichapa cuarenta peda idi. ¹³Na pedata Noé awē wakewuya xaxuwā mera ikidiwu. Awē wakewawe atū ade Sem Cam Jafet atū awīwuya xaxuwā mera ikidiwu.

¹⁴Yuina wetsa keskarawu xaxuwā mera atuwe ikidiwu. Yuina dii mera ikawu yuina idawanabetiruwu na xaratiruwuri peiyawuri ikidiwu. ¹⁵Naskakadax xaxuwā mera yuina wetsa keskarawu rawe rasi Noéwe ikidiwu. ¹⁶Epa Dios Noé yuiya keskakuikadi wede wisti awī wisti ikidiwu. Diaiwu Dios xaxuwā wepuudi. ¹⁷Cuarenta peda ui ichapa idi. Ma waipawane bai wepuadu xaxuwā dududi. ¹⁸Enewa yusiyaidu xaxuwari dudu dadi. ¹⁹Yusidakī machiwawu waipawane wepuudi. ²⁰Machiwa keyakui ede waipawane winuta siete metros enewa awiana yusidi. ²¹Yurawuri dadiwu naa bai adu ikawuri naskax peiyawu asaiwudu. Yuina idawanabetiruwu asaidu yuina dii mera ikawu asaiwudu bai adu xaraiwuri naatiwi asadiwu. ²²Naskax na bai adu ikawu xakaitiruwu naatiwi asai bitukubediu. ²³Naskaidu Noéwe awē xaxuwā mera ikiawu wistikai tsua dadiba naatiwi wetsawu asaiyaiwudu. Naatiwi

yurawu yuina idawanabetiruwu yuina dii mera ikawunu peiyawunu bai adu xaraiwu naatiwi dai adaitidiwu. Na xaxuwā mera Noé awē kaiwuuwe netedi.²⁴ Naskadu na baitiixu waipawane wepuadu ciento cincuenta peda wenakai daxadiba.

Ede waipawā daxadi

8 ¹Naskadu Noéwe naatiwi yuinawu idawanabetiruwu yuina dii mera ikawu Epa Dios atu shinadi. Naskaxu Epa Dios wumakayadua newewā webadi. Naa newewane ede daxawakī taewadi. ²Ana ede yusidiba. Awianari bai meraduax ede tsekediba. Ana dai meraduaxri ui wediba. ³Naskaidu ciento cincuenta peda ma ikadu wenamashta ede daxapakedi. ⁴Naskax peda diecisiete uxe siete ma ikadu na xaxuwā bachi awē ade Ararat adu rakadi. ⁵Uxe diez ata peda wistishita enewa daxapakedi. Ma machiwawu uñtirupini idi.

⁶Naskadu chipu cuarenta peda ma ikadu Noépa xaxuwāne awē weputi wepedi. ⁷Naskaxu Noépa uka nichidi. Uka nichiadu bai wedai wani tsautiruxakība yuyakawasadi. ⁸Naskata chipu Noépa riwi nichidi. Ma bai betuamaiki tapipaikī. ⁹Bai wichiyanabax riwi awiana dasudi wani tsautiruxakība enewane bai weputi id. Naskaitu Noépa xaxuwā weputi aduxu awē puña kaibaxuadu riwi aki tsautushidi. Xaxuwā mera ikibawerādi.

¹⁰Ma siete peda awiana ikadu riwi nichidi. ¹¹Ma warí kaidu riwi awiana dasudi. Badi xeushtabexu wedi. Naskaitu uñkī Noépa tapidi ma bai betuaitu. ¹²Naskaxu awiana siete peda ma ikadu awiana riwi nichidi. Nichiadu riwi ana udiba.



© 1996 David C Cook

Génesis 8.11 adewe.



© 1996 David C Cook

Génesis 8.15 adewe.

¹³ Naskata Noé seiscientos uno warí idi. Naskaidu bai ma betua idi uxé idai taeadu peda wisti. Naskadu xaxuwā awē kaīti wepexu ma bai betua uīdi. ¹⁴ Naskax uxé rawe ata peda veintisiete bai betukuiya idi. ¹⁵ Epa Dios Noé yuidi: ¹⁶ “Datiā xaxuwā meraduax mewē awīnu mewē wakewuwe mewē wawawatiwe kaīkawe. ¹⁷ Bewe na yuina xaxuwā mera ikiyabeawu atu kaībawe. Peiyawu yuina idawanabetiruwu na bai adu xaratiruwuri naatiwi atu kaībawe bai aduxu atū wake ichapa kaīwanuwu”, Epa Diospa Noé wadi.

¹⁸ Naskadu Noé awē awīnu awē wakewu atū awīwuu xaxuwā meraduax kaīdiwu. ¹⁹ Naskariwyai naatiwi xaxuwā meraduax ikiyabeawu na yuina idawanabetiruwu yuina dii mera ikawu bai adu xaratiruwu peiyawuri naatiwi xaxuwā meraduax tsekediwu. Na baitiixu wudiu.

²⁰ Naskadu xaxuwā meraduax kaīta Noépa ruwewu petsaidaxu naa kabakixu yuina peiyawu nu pitiruwu sharakui Dios kuwaxudi inaxiki.

²¹Naskadu Epa Dios awē duwe shara xetei idibadi. Diospa awē shina meraduax iskadi: “Dukuwedewawe awīwuawaweri wakekuikaxu chaka shinawiyaiwawe ē ana atu chakawadakaba.

²²Yurawu bai adu iyuwawuadu. Awara wadakata wiwuwaiwudu.

Batsi ipadaka. Xada ipadaka.

Wariri ipadaka. Bechakari ipadaka.

Pedari yaberi ipadaka”, Epa Dios idi.

Diosweta Noépa shinadiwu

9 ¹Diospa tsai shara Noé yuidi awē wakewuya. Tsai iskara atu yuidi: “Wake ichapa akawe baitiixu adu inuwu.

²Yuina wetsa keskarawu bai aduawu biki besexikadi. Peiyawu wumakaya ikawu bai adu ikawu enewa mera ikawu nawuna mi atū bitsisipa ipadaka. ³Naatiwi yuinawu ma pitiru piti wadanabeawu ma pitiru. Nawu batu inai. ⁴Naskaweke dabi ibiya ma pitiruba. Na ibi uduax nu ika. ⁵Naskatari dukuwede ē ūukaxiwi awa chakawabismaiki yuinawuri. Yuinatu yura reteke naa yuina ma retetiru.

⁶Yurā wetsa reteke
naari wetsā retepakedaka
Epa Diospa dukuwede
na keskaramai udiwadike.

⁷Naskake wake ichapa akawe
baitiixu adu inuwu”, Diospa Noé yuidi.

⁸Diospa Noé awiana yuidi awē wakewuya: ⁹“Batuweta ē shinakuiyai matu kaiwuu uduax ichapanawā kaipakedakawuwetari. ¹⁰Naatiwi peiyawu yuina idawanabetiruwu yuina dii mera ikawu batuwe xaxuwā mera ikiyabeawu na ē batu yui naatiwi na yuinawu bai adu ikawu.

¹¹Ana ē awiana waipawane bai wepudakaba naatiwi yurawu yuinawu ē ana aweskawadakaba. Batuweta naa ē shinakuiyai ana wetsadakaba. ¹²Batuweta naa ē shinakuiyai yuinawuwetari naskapakedaka. ¹³Ewē nawawai nishu mera ē waa. Na bai adu



© 1996 David C Cook

Génesis 9.13 adewe.

ikawawe naatiiwixu uipakedakawu na nu shinakuiyai. ¹⁴Bai adu nishu ē ubayaидu nadu ewē nawawai ipadaka. ¹⁵Waipawane yurawu yuinawuriwi ē ana atu adaitidakaba. Batuweta yuinawuwetari na ē shinakuibis ē shinaxiwi. ¹⁶Naskake nawawai nishu mera ē uīkī ē shinaxiwi. Na yurawuweta yuinawuwetari ē shinakuipakedaka ē shinabis. ¹⁷Na ē batuweta shinakuiyai yuinawuwetari da bai aduxu”, Epa Diospa Noé naduri yuidi.

Noé awē wakewuwe

¹⁸Noé awē wakewuwe xaxuwā meraduax tsekediwu. Awē ade Sem Cam Jafet. Cam wake wistiya awē ade Canaán. ¹⁹Naa tres Noépa wake idi. Naawuweta awiana na baitiixu wake ichapa kaīwadiwu. ²⁰Noépa bae yuduki taewadi. Naskaxu wibi wadadi awē ade uva. ²¹Peda wetsa Noépa uva ede^d ayax paedì. Awē yuina wichi tapas meradua ñewa rakadi. ²²Naskaitu Cam awē apa ñewa uīkī awē uchi rawe yui kai kadi Campa awē rewuduwwu Canaánitawu

^d 9.21 Uva awē ede (vino) wukaxadu nu paetiru.

idi. ²³Naskaidu dikawerākaxu Semweta Jafet awē rakuti wekaxu apa chituria uīkakī wepudiwu. Chitekiri wukaxu apa rakudiwu chituria uīnuwuba. ²⁴Naskax Noé paei buinakawa tapidi awē wake chipuketu Canaánpa chituria uīke ²⁵yuikī iskawadi:

“Canaán awē kaiwuunuax ichapanawāwu kaipakedakawu chaka iixikadi.

Canaán kaiwuunuax ichapanawāwu kaipakedakawu mewē uchī raweta atū yudubatiwu iixikadi”, Noépa Cam wadi.

²⁶Awiana yuidi:

“Mi Sempa awē Dios sharakui. Canaánitawu atū uibatiwu inuwu.

²⁷Naskata Epa Diospa Jafet bai ewapa waxunu awē udiwetsa Sempa awē pexe mera awe inu.

Naskax Canaán awē kaiwuunuax ichapanawā kaipakedakawuri Semweta Jafet atū uibati inupukuwi”, Noépa yuidi.

²⁸Naska na waipawā daxayaídu chipu Noé trescientos cincuenta wari iyupaudi. ²⁹Naatiā Noé awē wari novecientos cincuenta wari idi. Naatii wari akax dadi.

Noépa awē rewuduwu

10 ¹Nawu Noépa awē wakewu Sem Cam Jafet nawawe atū kaiwuu uduax ichapanawā kaipakedakawu. Enewa ma daxaitadu wake adiwu. ²Jafetpa wakewu Gómer Magog Madai Javán Tubal Mésec Tirás. ³Gómerpa wakewu Asquenaz Rifat Togarmá. ⁴Javánpa wakewu Elisá Tarsis Quitim Rodanim. ⁵Jafet awē kaiwuu uduax ichapanawā kaipakedakawu enewa ketukunu ipaudiwu. Naduax atū bai aduax atū tsai wistichi tsaipaudiwu.

⁶Campa wakewu Cus Misraim Fut Canaán. ⁷Cuspa wakewu Sebá Havilá Sabtá Raamá Sabtecá. Raamá wakewu Sebá Dedán. ⁸Cuspa awē wake wetsa Nimrod. Nimrod awē bai adua diaiwu bitsisipa iki taedi. ⁹Diospa axuwaidu Nimrod yuina retebis idi. Naskax naatiwiwixu: “Nimrod yuina retebiskui”, wadiwu.

¹⁰Na pexe ichapa atū ade Babel Érec Acad Calnē atū bai awē ade Sinar idi. Na pexe ichapa Nimrod atū diaiwukui idi.

¹¹Sinar aduax Nimrod bai Asur adu kadi. Pexe ichapa wadi awē ade Nínive wetsa Rehobot Ir wetsa Quélah. ¹²Quélah Nínive nexpakayadua Resen pexe ichapa ewapakui pexe wadi. ¹³Naskadu Misraim awē kaiwuunuax ichapanawā kaipakedakawu bai wetsa adu ipaudiwu. Nadu ludeowu ipaudiwu anameowu ipaudiwu lehabitawu ipaudiwu naftuhítawu ipaudiwu ¹⁴patruseowu ipaudiwu casluhítawu ipaudiwu caftoritawu ipaudiwu. Nawawe atū kaiwuu uduax ichapanawā kaipakedakawu filisteowu ipaudi.

¹⁵Canaánpa awē wake iyuakui awē ade Sidón idi. Sidónpa chipuke Het. ¹⁶Naskaxu Canaán awē kaiwuu uduax ichapanawā kaipakedakawu adedi jebuseowu ipaudiwu amorreowu ipaudiwu gergeseowu ipaudiwu ¹⁷heveowu ipaudiwu araceowu ipaudiwu sineowu ipaudiwu ¹⁸arvadeowu ipaudiwu semareowu hamateowu ipaudiwu. Naskax chipu naatiwi cananeowu na baitiu paxkanadiwu. ¹⁹Naatiwi na Canaán awē kaiwuu uduax ichapanawā kaipakedakawu na baitiu atū bai ewapa na Guerar aduax pexe ichapa Sidón ari dukudiwu. Naduax pexe ichapa Gaza adu dukudiwu. Naduax pexe ichapa Sodoma Gomorra Admá Seboím Lesa aduri Canaán kaiwuunuax ichapanawā kaipakedakawu atū bai ipaudi. ²⁰Campa awē kaiwuu uduax ichapanawāwu kaipakedakawu. Na baitiu awē kaiwuuya atū bai aduax atū tsaima ipaudiwu.


²¹Naskata Noépa wake Sem awē extu Jafet. Sem wake ichapaya idi. Naatiwi Éber wakewu Sempa awē kaiwuu uduax ichapanawā kaipakedakawu. ²²Sempa wakewu Elam Asur Arfaxad Lud Aram. ²³Aram wakewu Us Hul Guéter Mas. ²⁴Arfaxad awē wake Sélah idi. Naskata Sélahpa awē wake Éber. ²⁵Naskadu Éber wake raweya idi. Naskaxu wetsa adedi Péleg. Péleg iyuatiā baitiixu paxkanadiwu taediu. Awē extu awē ade Joctán. ²⁶Joctánpa awē wakewu adedi Almodad Sélef Hasar Mávet Jérah ²⁷Hadoram Uzal Diclá ²⁸Obal Abimael Sebá ²⁹Ofir Havilá Jobab. Naatiwi nawu Joctánpa awē wakewu idi. ³⁰Nawu atū bai Mesá aduax Sefar dukudiwu. Na Sefar bai adu waribis ari bachi ichapawu idi. ³¹Nawu Sempa awē kaiwuu uduax ichapanawā kaipakedakawu. Bai wetsa xuku wetsawu tsai wetsaya atū bai aduax idiwu.

³²Nawu Noépa awē kaiuu uduax ichapanawā kaipakedakawu. Naskax baiwutii ichapa kādiwu. Nawu bai wetsawuya idiwu. Enewa daxadu chipu paxkadiwu. Naskax baiwutii paxkakadax yura wetsa keskara idiwu.

Pexe chai keyakui basua

11 ¹Naatiā na tsai wistichi tsaipaudiwu. ²Yurawu wudiwu na wari uwaikiri. Nari wukakī uke rawe machiwa rawe nama mispadu wudiwu. Nadu bai awē ade Sinar awē ade wetsa Babilonia nadu iixikakī netediu. ³Naatiwiwai shinadiwu pexe keya basuxikakī: “Nu ladrillo anukawe. Ladrillo chiī nu shinawaxu nu petsaidanu naskaxu nu wuī tayanukawe”. Naskaxu bakex ataba ladrillo akī taewadiwu ⁴Chipu yuinadiwu: “Pexe keya basua nu wanu. Dai ari dukua inu. Naskawaitu naatiwixu duku dikanuwu. Nu paxkayabanu baitiixu”, idiwu.

⁵Pexe ichapa adu pexe keya basua waiwawe Epa Dios wutuxu uīwadi. ⁶Epa Diospa yuidi: “Daawu xuku wistiwu. Na tsai wistichi



© 1996 David C Cook

Génesis 11.5 adewe.

tsaitiruwu. Na ma akī taewawu atū yudu tsuā atibawatiruba.
"Wutuxu ē atū tsai wetsaya atu waxui na tsai wistichi ana
tsaiyabanuwu", Epa Dios idi.

⁸Naduxu Diospa atu paxkanawadi bai aduxu. Nadu atū yudu
adaitidi. ⁹Naduax tsaiwiakakī ana dikananadiwuba. Naduxu
Diospa atu paxkanawadi na baitiu adu. Naskake na pexe ichapa
awē ade Babel, wadiwu.

Sempa awē kaiwu

¹⁰Na waipawā daxayabeaudu ma wari rawe ma ikadu Sem cien
wari ma aki ikadu awē wake Arfaxad kaīdi. ¹¹Arfaxad kaīdiadu
Sem quinientos wari ma aki ma ika idi. Awiana wake adi
awīwakeriwi. Naskax dadi.

¹²Arfaxad treinta y cinco wari aki kaadu awē wake
werunawake kaīdi. Kaīke adedi Sélah. ¹³Naskata Arfaxadpa
cuatrocientos tres wari ika idi. Awiana wake adi awīwakeriwi.

¹⁴Naskata Sélahpa treinta wari ma aki ikadu awē wake kaīdi.
Kaīke adedi Éber. ¹⁵Naskata Sélahpa cuatrocientos tres wari ma aki
ikadu awē wake kaīdi. Awiana werunawakewu adi awīwakewuri.

¹⁶Éber treinta y cuatro wariya idi awē wake kaīyadu. Kaīke
adedi Péleg. ¹⁷Péleg kādiadu Éber cuatrocientos treinta wari ika
idi. Awiana wake adi awīwakeriwi.

¹⁸Naskata Péleg ma treinta wari ikadu awē wake Reú kaīdi.
¹⁹Naskata Reú kādiadu Péleg doscientos nueve wari iyudi.
Awiana wake adi awīwakeriwi.

²⁰Reú treinta y dos wari aki kaadu awē wake kaīdi. Kaīke adekī
Serug, wadi. ²¹Serug kaīdi kachiuri chipu Reúpa awīwakewu
werunawakewu kaīdiwu. Reú doscientos siete wari iyupaudi.

²²Serug treinta wari aki kaadu awē wake Nahor kaīdi.
²³Nahor kaīdi kachiuri chipu Serug awē wakewu awīwakewu
werunawakewu kaīdiwu. Serug doscientos wari iyupaudi.

²⁴Nahor veintinueve wari aki kaadu wake Térah kaīdi.
²⁵Térah kaīdi kachiuri chipu Nahor awē wakewu awīwakewu
werunawakewu kaīdiwu. Nahor ciento diecinueve wari iyupaudi.

²⁶Térah setenta wari aki kaadu tres wakeya idi. Wetsa Abramnu Nahornu Harán.

Térahpa awē wakewu

²⁷Térahpa awē kaiwu uduax ichapanawā kaipakedakawu daawu idiwu. Térahpa awē Abram Nahorya Harán. Haránpa awē wake Lot idi. ²⁸Naskata apa Térah diyuadu awē wake Harán bai Caldea awē pexe ichapa Ur aduax dadi.

²⁹Abrampa ariwi awīwu widi. Na awīni awē ade Sarai idi. Abrampa awē extu Nahorpa awīwu widi. Awē ade Milcá idi. Na Milcá Haránpa awē wake idi. Iscá awē chiku Milcá idi. ³⁰Sarai wake dadetiruba wake abisba idi.

³¹Térah bai Caldea awē pexe ichapa Ur aduax Canaán bai ari kadi. Awē wake Abramnu Sarai awē wawawa awē xuta Lot awē wawawari iyudi. Askawia pexe ichapa Harán adu dukuax nadu netediu pexe waaxikī. ³²Harán aduax Térah doscientos cinco wari ikadu dadi.

Epa Diospa Abram yuidi na yuiyai keskanu

12 ¹Dukuwede awē ade Abram Babilonia bai pexe ichapa Ur adu ipaudi. Peda wetsa Epa Diospa Abram yuidi: “Abram mewē epa awē pexe aduax mewē kaiwuu aduaxri katawe na bai ē bia tapibaxiwi adu.

² Mewē kaiwuu uduax ichapanawā kaipakedakawuweta. É aaxiwi mewē kaiwu ichapanawā inupukukadi. É bia sharawaaxiwi miuxū wetsawu atu sharawata. Naatiiwixu bia tapixikadi mi tsuamaiki.

³ Miuxū atiriwu é atu sharawaxiwi. Na bia sharawaawu é atu sharawaaxiwi. Na bia chakawaawu é atu chakawaaxiwi. Miuxū é atu sharawaaxiwi na baitiixu ikawu”, Diospa wadi.

⁴Epa Diospa yuiyadu Abram Lotwe Harán aduax wudiu. Abram setenta y cinco wari ma ika idi bai Canaán adu kaidu.

⁵ Awē awī Sarai iyuta awē wake wetsa Lot iyudi. Awē awarawu



© 1996 David C Cook

Génesis 12.1-5 adewe.

awē yuinawuya awē uibatiwuyari Harán aduxu wibiswuya.
Canaán adu dukudiwu.

⁶ Abram kadi baiwu winuwui kai pexe ichapa Siquem
adu kakī. Nadu iwi dia Canaán adu ikawawe adekakī Moré
wapaudiwu. ⁷Canaán adu ikawawe naduxu atu yabawapaudiwu.
Naduax Dios Abramki dukudi: “Mewē kaiwuu uduax ichapanawā
kaipakedakawu da bai ē atu inaxiwi”, wadi.

⁸Naskata machiwa na wari uwaikiri awē ade Betel ari kadi. Nadu awē yuina wichi tapasdi. Naskata Betel pexe ichapa wari kaikiri idi. Pexe wetsawawe awē ade Ai wari uwaikiri idi. Epa Dios wichibadu Abrampa ruwe petsaidadi naduxu Dios awara shara inaxikī Abram naduax Epa Dioswe tsaixikī. ⁹Naskata Abram wenamashta bai betu adu wudiwu tsua ikabadu awē ade Négueb.

Abram dukudi Egipto bai adu

¹⁰Abram awē kaiwuuwe bai Canaán ikawu adu ana piti idiba. Naskake Abram bai Egipto adu kadi awē kaiwuuwe nadu iki kai. ¹¹Ma dukui kakī Egipto adu Abrampa yuidi awē awī Sarai: “È bia uī mi awīwu sharakui. ¹²Egipciowawe bia uīkakī: ‘Da awīwu dukuwene awē awī’, bia waaxikadi. Naskake ea retetiruwu bia retekataba. Bia wiixikakī. ¹³Bia ñukayaiwawe atu mi yuitiru: ‘È awē uchi’, mi atu watiru. Naskake miuxū sharawakata ea reteyabanuwu”, Abrampa Sarai yuidi.

¹⁴Ma Abram Egipto adu dukuadu egipciowawe Sarai sharakui uīdiwu. ¹⁵Faraón awē uibatiwawe uīdiwu Sarai. Na diaiwu nadua yui wukadi wudiwu da awīwu shara uīkakī. Naskake iyidiwu faraón awē pexe adu.

¹⁶Awīuxū faraónpa Abram sharawadi. Yuina idawanabetiruwu ovejawu vacawu uibatiwu asnowu camellowu nawu inadi.

¹⁷Naskatari Saraiuxū Epa Diospa faraón chakawadi. Awē kaiwuuya isipaewawe atu isinibadi. ¹⁸Naskake faraónpa awē pexe aduxu kedabadi Abram iskawadi: “Aweskawakī mia ea yuiyabame da Sarai mewē awīweke. ¹⁹‘Ewē chiku’, mia ea waita. È mewē awī ë bia wiākerada. Da mewē awī iyutawe”, faraónpa Abram wadi. ²⁰Naskata faraónpa awē soldadowu yuidi atu tsekanuwu. Abram awē awī yawi awē awarawuya nawawe kaībadiwu Egipto aduxu.

Abramwe Lot paxkadiwu

13 ¹Abram tsekedi Egipto aduax awē awīwe. Awē pia Lot atuwe kadi. Atū awarawuya dasudiu bai Négueb

adu. ²Abram awa yupapaudiba. Yuina idawanabetiruwu peiwu ichapayari oro ichapayari ipaudi.

³Négueb aduax dasudi awē awarawu awē yuinawuya awē uibatiwuyari wenamashta wudiuw pexe ichapa awē ade Betel dukudiwu. Naskata naduax Pexe ichapa Betelweta pexe ichapa Ai da reke tapas wadi adu kadi. ⁴Abrampa nadu awē yuina wichi tapas wadi idi. Abrampa ruwe petsaidadi naduxu Epa Dios awara shara inaxikī naduxuriwi Epa Dios kiwīxikī.

⁵Lot awane yupapaudiba ovejawu vacawuri awē uibatiwuyari idi awē kuka Abram ikai keskai. ⁶Na ikawu adu ana wani itiruwuba idi Lotwe Abram. Naa ikawu adu ana wasi wuaidiba yuinawawe pipanawawe ana adu na rawe itiruwuba idi. ⁷Abram yuina kexexubiswu Lot yuina kexexubiswuwe chakapaudiwu. Naskaratiā cananeowu ferezeowu nadu ipaudiwu. ⁸Peda wetsa Abrampa yuidi Lot: “Mimai ewē kaiwuke nu chakanatiruba. Mewē uibatiwu ewē uibatiwuya nu chakayabanu. ⁹Baiwu naatiwi na mi duiyai mewena itiru. Ėduax paxkawe. Mi wari ubiskiri mi kaidu ē wari kabiskiri kai. Mi wari kabiskiri kaitu ē na wari ubiskiri kai”, Abrampa wadi.

¹⁰Lotpa uīdi akebataiba ede Jordán adu uīdi. Bai Sóar adu ede keyubisba idi. Bai sharakui idi na Egipto adua keskara. Naskara iyupaudi Epa Dios chakanawayuabadu pexe ichapawu Sodomaya Gomorra. ¹¹Naskake Lotpa bai Jordán widi. Naduax kadi na wari ubiskiri. Naskata Abramwe Lot paxkanadiwu. ¹²Abram bai Canaán adu netedi nadu iixikī. Lot kadi pexe ichapa iki kai Sodoma chaiba. ¹³Sodoma adua yurawu chakakuiwu idi. Diaiwu Dios dikataba chakakui wisti shinapaudiwu.

¹⁴Chipu ma Lot kaadu Epa Diospa yuidi Abram: “Da mi ikaduxu da bai wixu uīyakewe wari uwaikiri uīta wari kaikiri uīwe. ¹⁵Da baiwu ē bia inai mewena ipaxanu na mewē kaiwuu uduax ichapanawā kaipakedakawunari. ¹⁶Naskatari ē aaxiwi bai putu tsuā tanawatiruba naatii mewē kaiwuu uduax ichapanawā kaipakedakawu inuwu. ¹⁷Kaxu uīyakewe na bai awē chaidipa awē peta. ē na bia inaiki”, Epa Diospa wadi.

¹⁸Naskake Abram widinakawādi. Awē yuina wichi tapasdi aduax kadi. Na pexe ichapa awē ade Hebrón iki kai kadi. Iwiwawe awē ade Mamré dii adu chaiba idi. Abrampa ruwe petsaidadi naduxu Dios awara shara inaxikī.

Awē pia Lot iyunawudu Abrampa iwitadi

14

¹Nadu askayaиду Amrafel diaiwu idi bai ^eSinar adua.

Arioc diaiwu idi Elasar bai adua. Quedorlaómer diaiwu idi Elam bai adua. Tidalri diaiwu idi Goím bai adua.

²Na cuatro diaiwuu atū soldadowuya cinco diaiwuu wetsawu atū soldadowuyari retenai wudiwu. Bera, Sodoma bai adua atū diaiwuuwe. Birsá Gomorra bai adua atū diaiwunu, Sinab bai Admá adua atū diaiwunu, Seméber bai Seboím adua atū diaiwu naskatari bai Bela aduawawe atū diaiwuri atuwe retenapaudiwu. Na bai Bela awē ade wetsa Sóar idi. ³Cinco diaiwuwawe nadu wisti atū soldadowu ichanawadiwu bai mispa Sidim awē ade wetsa Iāmawa Daa adu. ⁴Diaiwu Quedorlaómer awē tsai dikakuipaudiwu. Doce wari ma ika idi. Ma trece wari ikadu na cinco diaiwuwawe shinadiwu awe retenaxikakī. ⁵Diaiwu Quedorlaómerwe na diaiwu wetsawawe ikūirawaawu wari wetsa retenai wudiwu. Bai Astarot Carnaim aduxu na refaítawu retediwu. Naskata chipu zuzitawu retediwu bai Ham aduxu. Emitawu retediwu bai Savé-quiriataim aduxu. ⁶Na horeowu atu retediwu bachiwu Seír aduxu atu beewaīkaxu El-parán bai chaibaxu tsua ikabaduxu. ⁷Naskaxu Quedorlaómerwe diaiwu wetsawu atū soldadowuya dasudiu. En-mispat bai adu dukudiwu. Awē ade wetsa Cadés adu. Wukakī na uīyaiwu atu retediwudiwu na ichuitawu amalecitawawe atū bai aduxu. Naskatari. Na atu aka keskawadiwu amorreowuri daawu bai Hasesón-tamar adu ipaudiwu.

⁸Naskake Sodoma bai adua diawu Gomorra bai adua Admá bai adua Seboím bai adua Bela bai adua diaiwuu naawu wudiwu bai

^e 14.1 Sinar awē ade wetsa Babilonia.

mispa Sidim adu. ⁹Nariax naa diaiwu cincotii atuwe retenadiwu. Qedorlaómerwe Tidalwe Amrafelwe Ariocwe daawu cuatro idi. Bai Elam Goím Sinar Elasar aduawu atū diaiwuu daawu idiwu. ¹⁰Na bai mispa Sidim adu kidi mera wui idi. Na Gomorra Sodoma adua diaiwutii ichupaikadax na kidi mera pakediwu. Diaiwu wetsawu bachiwu ari ichudiu.

¹¹Naskake na cuatro diaiwuwawe atū awarawu unekaxu atū awara sharawutii wikata bai Sodoma adua bai Gomorra aduari pitiwu widiwu. Naskata naduax wudiwu. ¹²Na Sodoma adu Lot ika idi Abrampa awē pia naariwi iyudiu awē awarawuya. ¹³Abram hebreo iwiwu wadanabea Mamré adu ipaudi dukuwede wisti ichuatu uxū yuidi. Naa dukuwede amorreopa awē udiwetsa rawe idi Escolwe Aner naa rawe Abramwe rawebiswu idi.

¹⁴Ma Abrampa awē pia iyunawudu atu ichanawadi. Na awē pexe aduax kaïdiwu awē uibatiwu trescientos dieciocho idiwu. Naawuyaxu atu beewaïdi na diaiwutii. Na pexe ichapa awē ade Dan adu dukudiwu. ¹⁵Yabeta Abrampa trescientos dieciocho dukuwedewu paxkanawadi atu retenuwu. Cuatro diaiwuwawe tapiawubadu beewaïkaxu atu retediu. Pexe ichapa awē ade Hobá na Damasco amanauri chaiba idi. ¹⁶Da awarawu wiitawu daawu atu wiädiwu naskatari Lot awē awarawu wiäwu naawu Abrampa widi. Naskata dukuwedewu awíwuya Abrampa atu iwidi.

Melquisedecpa Abram tsai shara yuidi

¹⁷Abram dasuxu ma atu reteta na diaiwu Qedorlaómer wetsawuwe diaiwu awe rawebiswu idi na diaiwu Sodoma aduariwi kadi na bai mispa Savé diaiwuwawe awē bai adu.

¹⁸Nadu Melquisedec diaiwu idi bai Salem adua. Naa sacerdotepa Dios ikūira waa. Panya vinoya tsekakaxu Abram inadi. ¹⁹Tsai shara ma Melquisedecpa Abram yuidi:

“Dios tsuā winutiruba dai udiwata bairiwi udiwadi.

Naskake Epa Dios bia sharawai.

²⁰Dios tsuā winutiruba nu uībai Dios sharakui.

Bia axuwaidu na bia duikaspabisu ma mi atu
kachikiriwaa”, Abram wadi.

Naskata Abrampa awē awarawu diez widi wisti Melquisedec inadi.

²¹Diaiwu Sodoma aduatu Abram yuidi: “Abram ea inawe na yurawu awarawuya netexiki”, wadi.

²²Abrampa kebadi: “Ē paraba. Dios ē yuikuiya. Epa Dios dai udiwata bairiwi udiwadi. ²³Ē bia awa wiāiba. Mewenawu yume pishta wiāiba. Ē bia zapato awē dishi wiāpaibari. Naskake mia yuidakaba: ‘Ē Abram awarawu inadi’, mi idakaba. ²⁴Ē bia awa nuiba. Na dukuwedewawe piawu wisti ē axui atuna dukuwedewu ewe wuawutii Aner Escol na Mamré naawu ewe rawebiswu”, Abrampa diaiwu Sodoma adua wadi.

Diosweta Abrampa shinadiwu

15

¹Chipu Epa Diospa tsai adi. Abram awē dabapa yuidi:
“Rateyabawe Abram. Ē bia kexei.

Ē bia inai awara sharawu”, Epa Diospa wadi.

²Abrampa kebadi: “Epa Dios aweskakī awara shara mia inaime ē wakeyabaweke. Yura bai wetsadua na ewē uibati nadu awē ade Eliézer Damasco adua. Na ewē awarawu naatuna iixiwi”,

³Chipu Abrampa yuidi: “Mia wake inabisba ewē awarawu na ewē uibatina iixiwi”, Abrampa Dios wadi.

⁴Epa Diospa kebadi:

“Mewē awarawu wiixiwai
na mewē wakekui iixiwi.
Ana mewē uibati iixiwiba”,
wadi.

⁵Naskaxu Epa Diospa
Abram xawakawi iyuxu
yuidi: “Dai ari uīpu.
Tanawapu na exteweruwu
awi mi atirumaiki
tanawakī. Naatii mewē



© 1996 David C Cook

Génesis 15.5 adewe.

kaiuu uduax ichapanawā kaipakedakawu inupukukadi. Tsuā atu tanawatiruba”, Epa Diospa Abram wadi.

⁶Abrampa Dios ikūira wadi na axuxiwai. Naskake Diospa Abram uīya sharakui idi. ⁷Diospa yuidi: “Ē mewē Diaiwu Dios. Ė bia kaibadi Ur caldeowu meradua bia da bai inaxikf”, wadi.

⁸Abrampa kebadi: “Dios ewē Diaiwu aweskawaxu ē tapitirume mia da bai inadaka”, Abrampa wadi.

⁹Epa Diospa yuidi: “Ea wexuwe vacapa wake cabrariwi ovejariwi. Tres wari ma atuki ika. Naskatari riwi yawi riwi keskara ea wexuwe”, wadi.

¹⁰Abrampa naa yuinawu Dios adu wudi. Retexu kaxkexu wuxudi. Na peiya rawe kaxkediba. ¹¹Xetewu wutuwaiwawe yuinawu nawu Abrampa ichuriwadi.

¹²Ma wari kaadu ma wakishyaidu. Abram uxakaīdi naskayaиду wakish besekuichi wepupakewuadi besekuidi. ¹³Naskake Epa Diospa yuidi: “Tapiwe mewē kaiwuunuax ichapanawā kaipakedakawu bai wetsa adu inupukukadi. Naduxu atu yudubadakawu na uibati atiru keskawakī atu chakawadakawu cuatrocientos wari. ¹⁴Na batu uibatiwanupukukadi ē atu chakawaxiwi na bai aduawu. Chipu mewē kaiwuu uduax ichapanawā kaipakedakawu naduax atuna iixiwi na awara sharawu. ¹⁵Mi adiuax shara iixiwi. Awa chakawaaxba mi daaxiwi. Bia baiwaaxikadi. Mewē xidiwuwe mi baixiwi. ¹⁶Chipu cuatrocientos wari ma ikadu mewē kaiwuu uduax ichapanawā kaipakedakawu wenupukukadi da bai adu na amorreowu ikawu adu. Naduxu ē atu putaxiwi chakawuke mewē kaiwuunuax ichapanawā kaipakedakawu adu inuwu”, Epa Diospa wadi.

¹⁷Ma wari kaadu ma yabeado chiiwā xuisai keskara idi kuimawa putai. Wii keskara na yuina kaxkeawu nexpakaya wuwawuwaīdi. ¹⁸Naa pedata Diosweta Abrampa shinadiwu. Naskata Diospa yuidi: “Da bai ē mewē wedawu inai enewa Egípto adu xateta ede Éufrates adu atuna inu. ¹⁹Na quenitawunu quenizitawunu cadmoneowunu ²⁰hititawunu ferezeowunu refaítawunu ²¹amorreowunu cananeowunu gergeseowu yawi

jebuseowu nadu ikawu. Chipu atū bai mewē wedawuna inu”, Epa Diospa yuidi.

Agarwe awē wake Ismael

16 ¹Abramweta Sarai wake atiruwuba ipaudiwu. Naskawia Sarai uibatiya idi bai Egípto adua awē ade Agar.

²Naskata Saraipa awē wede Abram yuidi: “Epa Dios ea wakeya wababisba. Naskake ewē uibati Agar awe iwe. Ipaixuba na uduax nu wakeyatiruki”, wadi. Na Saraipa yuiya Abrampa dikadi.

³Naskata Saraipa awē uibati Agar Egípto bai adua wede inadi awe inu. Nadu diez wari Abram ma Canaán adu ika idi.

⁴Abram Agarwe idi. Agar wake ma dadexu Sarai duikaspakī taewata uīkaspadi. ⁵Naskake Saraipa Abram yuidi: “Miuxū Agarpa ea duikaspai. Iwikui ē bia inayabea. Datiā ma wakeya iki bitsisipapai. Tsua uduax nu askamaiki Epa Dios duku yuinu”, Saraipa Abram wadi.

⁶Abrampa kebadi: “Mewē uibati dudu. Na mi apaiyai keskawawe”. Naskaxu Saraipa chakawakī taewaitu Agar naduax chaikui kadi tsua ikabari.

⁷Naskaweke Epa Dios awē ángelpa Agar wichidi tsua ikabadua. Nadu pozo keskara idi pexe ichapa wai kaa Sur adu. ⁸Wichixu yukadi: “Agar Sarai awē uibati. Wakiax mi uime. Waki mi kaime”, wadi. Agarpa kebadi: “Ewē diaiwu xawu awē ade Sarai aduax ē ichui”, wadi.

⁹Naskake Epa Dios awē ángelpa yuidi: “Mewē diaiwu xawuki awiana dasuwe na bia yuiyai keskaxikī”. ¹⁰Awiana Epa Diospa awē ángelpa yuidi: “Mewē kaiwuunuax ichapanawā kaipakedakawu. Tsuā tanawatiruba ipadaka”.

¹¹Dios awē ángelpa yuidi:

“Mi wake dadea werunawake.

Awē ade Ismael^f mi waaxiwi.

Epa Dios ma bia dika mi ubiskuiyaitu.

^f 16.11 Diospa Agar dikadi.

¹² Ismael yuina dii mera ika keskara inupukui.

Naatiwuwe setenapakedaka. Nawuriwi
setenapakedakawu nawe.

Awē udiwetsawuwiake atuwe setenapakedaka”, Dios awē
ángelpa wadi.

¹³ Ma Dios Agarwe tsaikadu Agarpa adedi Dios naatiwi mi uī.
“Ma ē Dios uīya ē daaba”, Agar idi. ¹⁴Datiā pozo awē ade Na Epa
Dios ipadakatu naatiwi uī. Datiāriwi naa pozo nadu Cadés yawi
Béred nexpakaya.

¹⁵ Naskax Agar awē wake kaīdi. Na Abrampa awē wake idi.
Naskake Abrampa adedi Ismael, wadi. ¹⁶Na wake kaīditiā Abram
ochenta y seis wariya idi.

Diosweta Abrampa shinadiwu wushki wichi xatepakexanuwu

17 ¹Abrampa awē warí ma noventa y nueve ikadu Dios aki
dukuta yuidi: “Ē Dios bitsisipa. Ea ikūira wapaxawe
chakataba. ²Dukuraweta na nu shinakuiyai mewē kaiwuu uduax
ichapanawā kaipakedakawu ichapakui inupukukadi”, Epa Diospa
wadi.

³Naa dikai Abram baikiri wepepakekawādi aū duiyana.
Naskayaitu Diospa yuidi: ⁴“Dukuraweta na nu shinakuiyai ē bia
yuikui. Bai wetsa ari ikawu mi atū apa ipadaka. ⁵Naskake ana
mi Abram ikiba. Datiā mi Abraham^g iki. Yura bai wetsa ikawu
ichapawawe mi atū apa ipadaka. ⁶Mewē kaiwuunuax ichapanawā
kaipakedakawu ichapakui inuwu ē anupukui. Naskatari mi
uduax diaiwuu kaikata bai wetsa ikawu ichapa kainupukukadi.
⁷Dukuraweta na nu shinakuiyai mewē kaiwuunuax ichapanawā
kaipakedakawuwetari ē anupukui. Ē mewē Dios iixiwi mewē
kaiwuu uduax ichapanawā kaipakedakawu ē atū Diosri ipadaka.
⁸Da bai Canaán adu mi ika na mi yura wetsa keskara. Ē bia inata
mewē kaiwuunuax ichapanawā kaipakedakawu ē inananupukui
atuna ipaxanu”, Epa Diospa wadi.

^g 17.5 Abrahampa awē kaiwu na exteweru keskara ipadakawu.

⁹Diospa Abraham yuidi: “Dukuraweta na nu shinakuiyai naskawe. Mewē kaiwuunuax ichapanawā kaipakedakawu naskanuwu. ¹⁰Dukuraweta na nu shinakuiyai mewē kaiwuu uduax ichapanawā kaipakedakawu dukuwedewawe atū wushki wichi xatepakedexanuwu. ¹¹Matu wushki wichi ma xatepakedaka. Dukuraweta na nu shinakuiyai naskapakedakawu. ¹²Datiā werunawakewu kaīyawudu ma kaītadu ma ocho peda ikadu atū wushki wichi xatepakedaka. Na atu peiuxū wibis atū wakewuri mi xatetiru. ¹³Naskax dukuraweta na nu shinakuiyai matu werunawakewu kaīyadu naatiiwixu atū wushki wichi ma xatepakedakawu. Da ewē shina naskapakedaka. ¹⁴Dukuraweta na nu shinakuiyai ikūira wataba awē wushki wichi xateaba batuwe itiruba”, Epa Diospa atu wadi.

¹⁵Naskatari Diospa awiana Abraham yuidi: “Datiā mewē awīni awē ade Sarai ikiba. Awē ade Sara^h iki. ¹⁶Sarauxū wake wisti ē bia inaxiwi. Naa ē awara shara inanupukui. Bai wetsa ari ikawu atū diaiwunu kaiwuunuax ichapanawā kaipakedakawu atū awa ipaxanu”, Epa Diospa Abraham wadi.

¹⁷Abraham baikiri wepepakekawā shinayana: “Adiwu cien wariya wakeyatiruba. Ewē awī Sarariwi ma noventa wari aka”, ikax witsadi. ¹⁸Naskake Dios yuidi: “Mewē awara sharawuya Ismaelna ipainu”, Abrahampa Dios wadi.

¹⁹Naskaitu Epa Diospa Abraham kebadi: “Mewē awī Saraweta mi wake wisti ma awaidaka. Ma kaīyadu adekī Isaac”, ma waaxiwi. “Dukuraweta na nu shinakuiyai awē kaiwuunuax ichapanawā kaipakedakawu ē naskari wapadaka. ²⁰Ismael uduax mia kiwiyaitu ē bia dika. Naariwi ē awara shara inanupukui. Wake ichapaya ita awē kaiwuunuax ichapanawā kaipakedakawu. Naskatari doce diaiwu bitsisipa bai wetsa ari ikawu atū apa Ismael inupukui. ²¹Wari wisti iixiwaitu Sara ma wakeya iwaidaka. Dukuraweta na nu shinakuiyai ē axunupukui Isaacweta”, Epa Diospa Abraham wadi.

^h 17.15 Sarapa awē kaiwu ichapanawā kaipakedakawu.

²²Abrahamwe tsaita naduax Dios kadi. ²³Naa pedata Abraham awē wushki wichi xatedi. Naskata awē wake Ismaelnari adi awē uibatiwunari na peiuxū wibiswuri nawawe atū wichi wushki xatediwu. Na Epa Dios yuiya keskadiwu. ²⁴Abraham noventa y nueve wariya idi. ²⁵Awē wake trece wari ma ika idi wushki wichi xatediwu. ²⁶Naskadu naa pedata na raweta wushki wichi xatediwu. ²⁷Naatiwi dukuwede na Abraham pexe aduxu kādiwu yawi bai wetsawu awē kaiwuuyabaweke atu peiuxū widi naawaweri naatiwi Abrahamweta atū wushki wichi xatediwu.

Epa Diospa Abraham uī kai kadi

18 ¹Epa Dios Abrahamki dukudi iwi awē ade Mamré adu awē yuina wichi tapas mera kāti adu tsauwadu mananawari wari paeyaidu. ²Texuinakawa tres dukuwede atu wichidi. Atu Wichita kushikui atuki kata baikiri wepepakekawādi. ³Naskata Abrampa yuidi: “Ewē diaiwū da mewē uibati mi axutirumaiki ē bia kexunawai. Ea winuwuayamakawe. ⁴Ē atu yuinu ede wenuwu matu tae ma chukanu. Iwi dia namaxu tedeyukawe. ⁵Ē batu piti wixunu ma xukenayabanu naya wutaxikakī. Da matu uibati ikadu ma kawadiki”, Abrampa atu wadi. Naskata: “Aichu duku askawaxuwe”, tres dukuwene Abraham wadiwu.

⁶Yuina wichi tapas adu Sara ikadu Abraham kushikui kata Sara yuidi: “Kushikui veinte kilos harina awetiira wita pan wawe”, Sara wadi.

⁷Abraham kushikui ichuta vacapa wake xuakuiya wita awē uibati inadi kushikui pichanu. ⁸Vaca xuba awē ede leche vacapa wake dabi atu inadi. Iwi namaxu piyaiwudu Abraham nadu atuwe idi. ⁹Ma pikī adaitikata Abraham ūukadiwu: “Waki mewē awī Sarame”, wadiwu. Abraham atu kebadı: “Udu yuina wichi tapas adu”, Abraham atu wadi.

¹⁰Dukuwede wetsā Abraham yuidi: “Ma wari wisti ikadu ē bia uīyuxiwi mewē awī Sarapa ma wake akadu”, dukuwene wadi. Yuina wichi tapas kāti aduxu atu kachiuxuri Sarapa dikadi.



© 1996 David C Cook

Génesis 18.12 adewe.

¹¹ Abraham adiwu idi: Sara ma ñushawua. Sara ana ibitiru idiba. ¹² Na dikai Sara witsa tedetiruba idi: “Naskara shara. Naskaweke Sara ewē wede adiwu ēri ñushawu”, ikax Sarapa shinadi. ¹³ Diospa Abraham yuidi: “Aweskai Sara witsaime. Ikūira waibame: ‘Ē ñushawu ē wake atiruba’, ikime. ¹⁴ Na tsuā atiruba Epa Diospa atirubame. Wari wetsā ē uwaidu Sara ma wake akadu ē uuxiwi”, wadi.

¹⁵ Naa dikai Sara besedi. Naskata wumapaidi: “Ē witsaba”, idi. Naskayaitu Diospa kebadi: “Ma ē tapia mi witsa”, Diospa Sara wadi.

Abrampa shinachakakī Diaiwu Dios ñukadi Sodoma adu ikawu

¹⁶ Naskata tres dukuwede widiniuwakata Sodoma ari wudiwu. Abraham atuwe kadi atubaki netei kai. ¹⁷ Naskata Epa Diospa shinadi: “Abraham ē yuinu na ē akai naaturi tapinu.

¹⁸ Abraham uduax awē kaiwuunuax ichapanawā kaipakedakawu bitsisipa ipadakawu. Naskatari na baitiixu ikawu nauxū ē atu sharawanupukui. ¹⁹ Ě Abraham kañawadi awē wakewu awē kaiwuunuax ichapanawā kaipakedakawawe ea ikūira wakata kayakawikui shinapakedakawu. Ě Abraham yuidi keskaiwawe ē atu axutiru”, naskaxu Epa Diospa anupukui na yuiyai.

²⁰ Epa Diospa Abraham yuidi: “Sodoma ikawu Gomorra ikawuri yura chakakuiwu ana askara ē tedetiruba. ²¹ Naskaxu ē wutuxu ē atu uīkai chakakuiwumaiki ea na yuitawu. Ikūmaiki tapixikī kaxu ē uīkai”, wadi.

²² Dukuwede rawe Sodoma wuwaiwudu Abraham Dioswe netedi. ²³ Aki chaiba kata Abrahampa Dios ñukadi: “Yura sharawuya reteta yura chakawuya mi atu reteime. ²⁴ Ipaixuba cincuenta yura sharawu Sodoma ikawu nawuya yura chakawu mi atu adaitime. ²⁵ Yura sharawu reteta yura chakawuya atu retea a sharaba. Atuwe chakabiswu keskara itiru. Da bai adua yurawawe mi atū Dios bitsisipakui”, Abrahampa Epa Dios wadi.

²⁶ Naskata Diospa kebadi: “Cincuenta yura sharawu Sodoma ikawu atu wichixu atuuxū yura chakawu ē adaititiruba”, Diospa Abraham kebadi.

²⁷ Abrahampa awiana Epa Dios yuidi: “Ē awayabawixu mi Diospa bitsisipa besetaba ē bia yui. ²⁸ Ipaixuba cincuenta yura sharawu wichiyanabawixu cuarenta y cinco yura sharawu wichixu mi atu adaitime”, Abrahampa wadi. Diospa kebadi: “Cuarenta y cinco yura sharawu ē wichixu ē atu adaitiba”, wadi.

²⁹ “Ipaixuba cuarenta yura sharawu itiru”, Abrahampa wariawadi.

“Cuarenta yura sharake ē atu adaitiba”, Epa Diospa Abraham wadi.

³⁰ Awiana Abrahampa ñukadi: “Ē bia ñukariwaitu mi iki sidakī. Ipaixuba treinta yura sharawu mi wichiwixu mi atu adaitime”, wadi.

Diospa Abraham kebadi: “Treinta yura sharawu wichixu ē atu adaitiba”.

³¹Abrahampa awiana ñukadi: “Ewē Dios besetaba ē bia ñukai. Veinte yura sharawu mi wichixu mi atu aweskawaime”, Abrahampa wadi.

“Veinte yura shara wichiwixu Ÿ atu adaitiba”, Epa Diospa wadi.

³²Awiana Abrahampa yuidi: “Ana bia wekaxtiwaxikiba ē bia ñukai. Ipaixuba diez yura sharawu wichixu mi aweskawaibame”, Abrahampa wadi.

Epa Diospa kebadi: “Diez yura sharawu wichixu ē atu adaitiba”, wadi.

³³Abrahamwe tsaita Dios kadi. Abrahamri awē pexe tapas adu dasudi.

Diospa Sodoma ikawu Gomorra ikawuri atu adaitidi

19 ¹Ma ñatapakeaidu ángel rawe Sodoma adu dukudiu. Lot pexe ichapa kaïti adu tsauwa idi. Ma atu Wichita widinakawata baikiri wepepakekawādi. ²Lotpa dukuwede rawe atu duiyana atu yuidi: “Ewē diaiwu raweta ewē pexe adu wukawe naduxu matu tae chukaxikakī. Wenamari wutaxikakī”, Lotpa atu wadi. Ángel raweta kebadiwu: “Shinachakayabawe. Wanira wetsa nu uxai”, wadiwu.

³Naskawayiawewe Lotpa ewē pexe adu uxai wukawe atu wariawaitu awē pexe adu awe wudiwu. Awe dukuawuadu pan pusputiruba atu Lotpa inadi. Pidiwu.

⁴Ángel rawe uxayuwubadu Sodoma ikawawe pexkuwuyaxu adiwuwawewe Lot awē pexe dakiwadiwu. ⁵Naskake Lot kedakata yuidiwu: “Wanime da yabeta dukuwede rawe mewē pexe adu weawu. Atu tsekawe nu atuwe inu”, Lot tsai ewapatu wadiwu.

⁶Naskata Lot tsekeinakawata awē pexe weputi wepukuita.

⁷Atu yuidi: “Ewē yurawawe, chaka shinayabakawe. ⁸Ź wake raweya dukuwedewe ibisba rawe. Naa rawe ē batu tsekaxunu na ma apaiyai keskawaaxikakī. Da dukuwede rawe ewē pexe adu weawu aweskawayabakawe”, Lotpa atu wadi.

⁹Nawuwawe kebadiwu: “Mi tsuame. Uri katawe. Mi duduayabawixu mia duku yuduime. Nu atu ata bia nu bibawai”. Askawakata Lot awē pexe weputi chakanawapaidiwu. ¹⁰Ángel raweta Lot atū puñama iwita weputi wepuakewuwādiwu. ¹¹Naskata naatiwi ángel raweta pexkuwuya adiwuu atu wexuwadi weputi adu ikiyabanuwu. ¹²Naskata ángel raweta Lot ñukadiwu: “Dudu awetii mi kaiwuuyame. Mewē rayus ikaidu mewē wake rawe duduxu atu iyutawe. ¹³Diospa ma tapia yurawawe atū chakawu ana tedetiruba. Naskake duku nichia nu atu adaitinu”, ángel raweta Lot wadiwu.

¹⁴Naskata Lotpa awē rais ipaixiwai rawe atu yui kai kadi: “Duduax nu kanu. Widiniuwakawe. Epa Diospa dudua yurawu atu adaiti”, Lotpa yuiyaitu awē rais ipaixiwai raweta ikūira wadiwuba. ¹⁵Ma pedayaiku ángel raweta Lot yuidiwu: “Duduxu mewē wake raweya mewē awīya atu iyutawe dakaspakī nu atu adaitiyaidu”, ángelpa wadi.

¹⁶Naskata Lot sabarakayaitu ángel raweta awē biwī tsubakata xawakawi tsekadiwu Diaiwu Diospamai ubisbaitu. ¹⁷Pexe ichapa Sodoma aduxu ma atu tsekakata ángel wistichi atu yuidi: “Kushi wutakawe dayabaxikakī. Kachiuri ma uīki naskatari mispa adu ma neteki. Ma dipaimaiki bachi ari wutakawe”, ángelpa Lot wadi.

¹⁸Lotpa atu kebadi: “Baa ewē Diospa ē bia yui. ¹⁹Ē dayabanu ea ma ubisba. Naskake ē bachi ari kapaiba. Nari kapai ē datiru”, Lotpa atu wadi. ²⁰Naskawaitu Lotpa ángel yuidi: “Na chaiba pexe ichapaba nadu ea nichiwe ē dayabanu”, wadi.

²¹Ángelpa kebadi: “Ma ē bia dikai. Na mia yuiyai ē bia axui. A pexe ichapaba ē adaitiba. ²²Naskake kushikui wutakawe. Na pexe ichapaba ma dukuabadu ē aweskawatiruba”, ángelpa wadi. Naskake na pexe ichapaba awē ade Sóar idi.

²³Ma pedadu Lot Sóar adu dukudi. ²⁴Naskayaidu Diospa dai arixu ui chii xuisaipa Sodomaya Gomorra ikawu atu adaitidi chakawuke. ²⁵Atū awarawuya atu adaitikuidi na Sodoma ikawu



© 1996 David C Cook

Génesis 19.24-26 adewe.

bai mispadu ikawuri.²⁶ Lotpa awē awīni kachiuri uīpai kushikui saltadi.

²⁷Peda wetsa na Epa Dioswe tsaikitadu Abraham kadi.

²⁸Sodomaya Gomorrari uīpaikī uiya na baitiixu kuīwawe tipu ikaitu. Horno kuī keskara idi.

²⁹Naskadi Epa Dios Sodomaya Gomorra atu adaitikuidi na Lot ipaudi adua. Lot wisti dayabaitake Epa Dios Abrahamweta shinaitaxakī.

Moabitawunu amonitawu tsekei taediwu

³⁰Lot Sóar adu ipai besedi. Naskax awē wake daetawa rawewe machiwa kidi mera iki kai kadi. Nadu idiwu.³¹ Peda wetsa Lotpa awē wake daetawa iyuatu awē chiku yuidi: “Nuku epa adiwu.

Da bai adu dukuwedeba nu awe wianapana na awīwu itiruwu keskai. ³² Nuku epa paebaxu nu abanu aweta nu wake anu naskax nu rewuduya inu”, daetawa rawe idiwu.

³³ Naa yabeta paebakata awē wake iyuatu apawe iwyaitu tapidiba. ³⁴ Ma peda wetsa awē iyuatu awē chiku yuidi: “Da yabeta nuku epawe ē iwaa. Da yabetari nu paebanu mi nawe uxata abaxikī. Naskaxu nu aweta wake nu anu”, idi.

³⁵ Yabe wetsa ana paebakata awē wake chipuketu apawe uxata abawiyaitu tapidiba. ³⁶ Naskaxu Lot awē wake rawe atu wake dadebadi. ³⁷ Awē wake iyuatu awē wake wisti adi. Awē ade Moab. Moab wakakī apaweta wake adike. Naskake moabitawu wadiwu. Datiāri naskarari. ³⁸ Awē wake chipuketuri wake wisti adi. Awē ade Ben-amí. Awē xidi apana wakakī awē wake datukuiweta wake aka. Amonitawawe atū xidi.ⁱ

Abrahamwe Abimélec

20 ¹ Abraham na ibis adua bai Négueb adu kadi. Cadésweta Surpa dakiwaawu Guerar nadu Abraham idi.

² Abrahampa awī Sara: “Ewē pui”, wadi. Naskata Guerar adua diaiwū awē ade Abimélecpa Sara kedabadi wipaikī. ³ Naa yabeta Epa Diospa Abimélec awē dabapa yuidi: “Da awīwu wedeya mi wiāx mi dai”, Epa Diospa wadi.

⁴ Abimélec Sarawe awē iyua idiba. Abimélecpa kebadi: “Ewē Diospa, awa chakawaaba mi retetirume. ⁵ Abrahampa ea yuita: ‘Ewē pui’, ea waita. Sarapari: ‘Ewē uchi’, ea waita. Ě aweskawaaba. Ě chakawaaba”, Abimélecpa wadi.

⁶ Naskaitu Epa Diospa awē dabapa kebadi: “Ma ē tapia mi awa chakawaba Naskake ē bia chakawababa mi iki chakayabanu. ⁷ Iskaratiā awē awī inawe naatu ewē tsai yuibis. Naskata naatu bia kiwīxui mi wena dayuyabanu. Naskatari awī mi inayabaitu mi dai mewē kaiwuuri”, Epa Diospa Abimélec wadi.

ⁱ 19.38 Aweskai chakadiwume Lotpa awē wake rawe Epa Diospa awē tsai dikadiwuba. Awē xidiwu keskara chaka ipaudiwu awē wake rawe Abrahampa awē uibatiwu awē xidiwu keskara idiwu.

⁸Ma pedadu widinakawata awē uibatiwu kedaxu atu yuidi. Na dabawaa atu yuiyaitu dikakata besekuidiwu. ⁹Naskata Abimélecpa Abraham kedaxu yuidi: “Ē bia aweskawake mia iskawaame. Ea mia paraita. Ewē yurawu mia paranaita. Askara sharaba. ¹⁰Naskaxikī awa mi shinaitame”, Abimélecpa Abraham ñukadi. ¹¹Abrahampa kebadi: “Duduxu tsuā Dios ikūira waaba raixu ē shinaita ewē awīuxūri ea retetiruwu raixu. ¹²Ikū ewē pui ewē epa aka ewē ewa akaba. Naskake ē nawe wianadi. ¹³Ewē epa pexe aduxu Epa Dios ea nichiadu ewē awī ē yuidi: ‘Wanira dukuxu “Ewē pui”, mia watiru’, ē wadi”, Abrahampa Abimélec wadi.

¹⁴Naskata Abimélecpa awī Sara Abraham inadi. Naskatari oveja inata vacawuri inadi. Awē uibatiwu dukuwedewu awīwuri inadi. ¹⁵Abimélecpa yuidi: “Na mi kañawai adu ewē bai adu mi itiru”, wadi.

¹⁶Abimélecpa Sara yuidi: “Mewē uchi pei ichapakui ē inai. Pei ichapa uïkakī mi aweskakeba bia tsuā yuikī chakawanupukuiba”, wadi.

¹⁷Naskata Abrahampa atu Dios kiwīxudi. Epa Diospa Abimélec kayawadi. Awē awīriwi awē uibati awīwuwaweri wake anuwu.

¹⁸Naskake Sarauxū Epa Diospa atu wakeya wabatiruba idi Abimélecpa pexe aduxu.

Isaac kaïdi

21 ¹Na Diospa Sara yuidi keskadi. ²Naskaxu Saraweta Abrahampa adiwukaxu wake adiwu. Na Epa Diospa yuidi keskadi. Werunawake adiwu. ³Abrahamweta Sara atū wake adekī Isaac wadiwu. ⁴Ma ocho peda ikadu awē wake awē wushki wichi xatedi na Diospa yuidi keskawadi. ⁵Ma Abraham cien wari aki ikadu Isaac kaïdi.

⁶Sarapa shinadi: “Ea Diospa witsabada. Naatiwixu tapikadax ewe witsaxikadi ē wake ake. ⁷Tsuā shinapaudiba Abraham wake ē axunupukui. Naskaweke ma ē wake axua adiwuwiake”, Sara idi.

Abrahampa awē pexe aduxu Agarya awē wake Ismael atu putadi

⁸Ma Isaac yusiyaitu uïkī awa xuba xatebadu naskata Abrahampa fiesta wadi. ⁹Sarapa uïdi Agar Egipto bai adua idi awē wake Abrahamweta aka awē ade Ismael Isaacki kaxepaiyaitu. ¹⁰Naskata Sarapa Abraham yui kai kadi: “Na uibati awē wakewe katanu. Aweskakī ewē wake Isaac awē awara awe paxkanatiruba”, Sarapa Abraham wadi.

¹¹Abrahampa askara duidiba. Sarapa askawaitu dikakī Ismael awē Wakemaiki ¹²Naskata Epa Diospa Abraham yuidi: “Shinachakayabawe mewē wakeuxū naskatari Agaruxū. Na Sarapa bia yuiyai keskawe. Isaac uduax awē kaiwuunuax ichapanawā kaipakedakawu ichapa inupukukadi. ¹³Ismael uduax awē kaiwuunuaxri ichapanawā kaipakedakawu ichapa inupukukadi. Ë atu axupakedaka mewē wakëmaiki”, Epa Diospa wadi.

¹⁴Peda wetsa wenamari Abrahampa piti inata ede inadi. Naa pewexu wudiwu. Agar nawuya kadi tsua ikabadu awē ade Beerseba adu. Kawiakī tapidiba.



© 1996 David C Cook

Génesis 21.14 adewe.

¹⁵ Ma ede keyuadu iwi kawashara chuu nama awē wake nichiwāidi. ¹⁶ Naskata uri tsauī kai awa kadi. Awē wake daitu uipaidiba. Dabakaspadi. Uri awa tsauwadu awē wake Ismael siaidi.

¹⁷ Epa Dios dai arixu dikadi Ismael siaikaitu. Naskata Epa Dios awē ángelpa kedadi: “Agar mi aweskaime. Beseyabawe. Mewē wake siaikaitu Diospa ma dika. ¹⁸ Widinakawata mewē wake metsuwe. Awē kaiwuunuax ichapanawā kaipakedakawu ē ichapa axunupukui”, ángelpa wadi.

¹⁹ Naskata Epa Dios Agar ede inadi. Bai meradua tsekeá. Naskata aki ede wibis wuspiwata awē wake ede ayabadi.

²⁰ Naa wake Epa Diospa axuwaidu yusita tsua ikabadu ipaudi. Naskata piākī tapikuiya idi. ²¹ Tsua ikabadu awē ade Parán adu ipaudi chipu Egipto adu ika awīwu awā wibadi.

Abraham Abimélecweta shinadiwu

²² Abimélecweta soldado atū diaiwu Ficol Abraham uī wukadi wudiwu. Abimélecpa yuidi: “Epa Dios bia axuwaitu ma ē uīya.

²³ Epa Diosuxū datiā ea yuikuiwe ewē wakewuya ewē kaiwu uduax ichapanawā kaipakedakawu duku mia chakawaiba ē bia apaudi keskawakī. Naskatari dudua yurawu atu mi naskawapadaka dudu ikawu”, Abimélecpa Abraham wadi.

²⁴ “Na mia yuiyai ē naskawaiadaka”, Abrahampa wadi.

²⁵ Abrahampa Abimélec askawadi awē uibatiwawe bai pukixu ede whichia wiāyabeawuadu. ²⁶ Abimélecpa kebadi: “Ē tapibisba na mia yuiyai. Raba ē dikai. Ē tapiaba. Tsua askaitame”, wadi.

²⁷ Naskata Abrahampa Abimélec oveja wakewu inata vacawuri inadi. Naa pedata naa raweta shinadiwu. ²⁸ Naskata Abrahampa awē yuina kede meradua siete ovejawu paxkadi. ²⁹ Naskake Abimélecpa Abraham yuidi: “Aweskakī siete oveja wakewu awīwu mi paxkame”, wadi.

³⁰ Naskawaitu Abrahampa kebadi: “Naa siete oveja awīwu ē bia inai mi tapinu ē bai pewexu ede ē whichidi”, Abrahampa Abimélec wadi.

³¹ Naskake nadu awē ade Beerseba^j idi. Naduxu na raweta shinadiwu.

^j **21.31** Nadu adekī Yuikui, wadi.

³²Ma shinakuikata Beerseba aduax Abimélecwe Ficol dasudiwu filisteowawe atū bai adu. ³³Beerseba aduxu Abrahampa iwi awē ade tamarisco wadadi. Naskata naduxu Epa Diospa ipadaka kiwīdi. ³⁴Wari ichapa filisteowawe atū bai adu Abraham ipaudi.

Abrahampa Dios dikakuidi

22 ¹Awetiira wari ata Diospa Abraham kedadi uipaikī akimaikixu. Naskaxu yuidi: “Abraham”. Abrahampa kebadi: “Ē dudu”, wadi.

²Naskata Epa Diospa Abraham yuidi: “Mewē were wisti iyutawe naa mi duikuibis wisti bai awē ade Moria. Naduxu retetawe kuwaxu ea inaxikī”, Diospa wadi.

³Ma pedaiyuwaidu Abraham widinakawā itipinidi kaaxikī. Awē awarawu wuuxikī awē asnouxū. Karu xatedi awarawu reteta kuwaxu inaxikī Dios. Naskax kadi. Awē uibati rawe iyuta awē wakeri Isaac iyudi na Diospa yuita keskai. ⁴Naskadu Abraham tres peda ikadu chaikixu uīdi na kai adu. ⁵Abrahampa awē uibati rawe yuidi: “Dudu netekawe asnowe. Ewē wakewes katanu. Narixu nu Dios nu awara shara inatanu. Batuki chipu nu dasuikai”, atu wadi.

⁶Abrahampa awē wake Isaac karu pewebadi: Naatu chipu widi chii yawi kedupeweti. Na rawe wudiwu. ⁷Isaacpa Abraham ūukadi: “Epā”, Abrahampa kebadi: “Ea yuiwe”, wadi. “Wanime oveja awē wake na nu Dios reteta kuwaxu inai. Dudu karu ita chii”, Isaacpa wadi.

⁸Abrahampa kebadi: “Diospa duku oveja wake inai nu kuwaxu inanu”, wadi. Na rawe wudiwu.

⁹Ma Abraham awē wakewe dukukata na Diospa yuitadu Abrahampa taewadi ichawakī ruwewu petsaidaxikī amanauri karu kuwaxikī. Awē wake Isaac dexata karu mamakaya



© 1996 David C Cook

Génesis 22.9 adewe.

wadi. ¹⁰Kedupeweti wita awē wake ma retexikī ikaidu ¹¹Epa Dios awē ángelpa dai arixu yuidi: “Abraham. Abraham”, ángelpa tsai ewapatu tsai adi. “É dudu”, Abrahampa wadi.

¹²Ángelpa yuidi: “Mewē wake wisti reteyabawe. É uïya mia ikūira waa. Ea mia wishkuaba mewē wake wisti ea inaxikī”, wadi.

¹³Naskata Abrahampa uïdi iwi puña adu carnero awē maxu ñatana idi. Naskata achidi carnero reteta kuwaxu inaxikī Dios. Awē wake Isaac retepaiwikī carnero retexu inadi. ¹⁴Naskaxu Abrahampa nadu adedi Na nu yupayai Diospa duku inatiru. Iskaratiā naatu adetiruwu: “Epa Diospa awē bachi arixu na nu yukayai duku inatiru”.

¹⁵Dai arixu Epa Diospa awiana Abraham kedadi. Naskaxu yuidi: ¹⁶“Mia dikakuike mewē wake wisti mia wishkuaba é yuikui”, Epa Dios idi. ¹⁷“É bia yuikui awara bia inaxikī. Mewē wakeuxū mewē kaiwuunuax ichapanawā kaipakedakawu. Na exteweruwu keskara tsuā tanawatiruba naskara bishpu keskarariwi idakawu. Nawuwawe atū duikaspabiswu atū bai iwuwadakawu. ¹⁸Miamai dikakuike na baitiixu ikawu awarawu shara wīpadakawu mewē wakewuxu mewē kaiwuu uduax ichapanawā kaipakedakawuxuri”, wadi.

¹⁹Abraham awē wakewe awē uibati rawe adu dasudiu. Naatiwi Beerseba adu wudiwu.

Nahorpa awē wakewu

²⁰Awetiira uxé ma akadu wetsā Abraham yuidi: “Mewē wakawa Milcá datiā wakewuya. Mewē extu Nahor awē wakewu.



© 1996 David C Cook

Génesis 22.13 adewe.

²¹Naskaxu awē wakewu adedi. Iyuatu awē ade Us. Chipu Buzwe Quemuel kaīdiwu. Na Quemuel awē wake Aram. ²²Awē wakewu wetsa awē ade Quésed wetsa Hazó wetsa Pildás Idlaf Betuel”, awē wakewu. ²³Na Betuel Rebecapa apa idi. Naawu na ocho wakewu Milcápa Nahor Abrahampa awē extu inadi. ²⁴Nahor awē awī wetsa Reumá ariwi werunawakewu kaīdi. Atū ade Teba Gáham Tahas Maacá idiwu.

Sara Dadi

23 ¹Sara ciento veintisiete wari akax dadi. ²Sara pexe ichapa awē ade Quiriat-arbá awē ade wetsa Hebrón aduax dadi. Bai Canaán aduax Sara daadu Abraham shinabetsai siaidi.

³Awī ma daadu hititawu yui kai Abraham kadi: ⁴“⁵É chaikiduawiax ē batu adu ikiuyiyudi ewē awī ē baiwanu ea bai inakawe peiuxū”, Abrampa atu wadi.

⁵Hilitawawe duiyana kebadiwu: ⁶“Diaiwū duku dikawe. Mi dukuwede sharakui bia Diospa kañawadi. Mewē awī na bai sharakui adu baiwawe. ‘Dudu baiwayabawe’, nu bia waiba”, hilitawawe Abraham wadiwu.

⁷Hilitawawe uīyaiwudu Abraham widinakawata baikiri wepepakekawādi. ⁸Naskata atu yuidi: “Ewē awī ē dudu baiwanu Sóharpa awē wake Efrón ea yuixutakawe ⁹Ea bawa kidi inanu peiuxū. Naatiwi pei putaxu ē winu awē ade Macpelá. Naskaxu ē iwu inu naskake ewē kaiwuu nadu baipakexanuwu”, Abraham idi.

¹⁰Hitita Efrón atuwe tsauxu pexe ichapadu kaīti aduxu Abrahampa kebadi. Awē kaiuwawewe dikaiwudu naskatari na yurawawewe wuwawuwaīkakī pexe ichapa kaīti aduxu nawaweri dikadiwu. ¹¹Efrónpa Abraham yuidi: “Ewē diaiwū ē bia inakui naa bai bawa kidi. Ewē kaiuwawewe uīyaiwudu ē bia inai mewē awī mi baiwanu”, wadi.

¹²Hilitawawe uīyaiwudu awiana Abraham baikiri wepepakekawādi. ¹³Naskata Efrón naatiwi yurawawewe uīyaiwudu yuidi: “Naa baiuxū ē bia pei inayai wiwe nadu ewē awī ē baiwanu”, Abrahampa wadi.

¹⁴Efrónpa kebadi: ¹⁵“Ewē diaiwū ea dikawe naa bai cuatrocientos pei. Cuatrocientos pei uduax nu askawatanaiba. Mewē awī baiwawe”, Efrónpa Abraham wadi.

¹⁶Naa shinawutii cuatrocientos pei sapa Abrahampa na pei tanadi naskax weyabiswu awara peiuxū inabetsabiswu. Hititawawe uīyaiwudu pei sapa Abrahampa Efrón inadi. ¹⁷Efrónpa awē bai Macpelá idi. Naa bai adu bawa kidi ita iwiwuri na chaiba pexe ichapa awē ade Mamré nawu Abrahamna idi. ¹⁸Hititawawe uīyaiwudu Abrahamweta Efrónpa shinadiwu yurawaweri uīyaiwudu pexe ichapa kāiti aduxu.

¹⁹Abrahampa awē awī Sara bawa kidi bai Macpelá adu baiwadi Mamré chaiba awē ade wetsa Hebrón bai Canaán adu.

²⁰Na bai hititawuna ibis nawu Abrahamna idi awē kaiwuu wisti nadu baipakexanuwu.

Isaacwe Rebeca

24 ¹Abraham ma adiwushtadu Epa Diospa awara sharawu inadi. ²Na aweta yudukī taewainiwuvida kedata yuidi: “Na nu weyabis keskai mewē biwi ewē kishi nunamari wawe. ³Diaiwu Diospa dai udiwata bai udiwadi nauxū na mia axuikai ea yuikuiwe: ‘Ē bia axuikai’, ea wawe. Na mia yuiyai atawe. Da bai Canaán ē ikadua ewē wake Isaac awīwu ē wibapaiba. ⁴Ewē kaiwuu meradua awīwu wetsa ewē wake Isaac iwixutawe”, Abrahampa wadi.

⁵Naskaxu Abrahamweta yudubistu yuidi: “Awīwu ewe uyabaitu ē aweskaikaime. Ē iyutirume mewē wakē wedaikanu awī”, wadi.

⁶Abrahampa kebadi: “Aweskakī ari ewē wake mi iyutiruba wadi. ⁷Ewē epā pexe aduxu Epa Dios dai mera ikatu ea yuidi dudu ē unu. Da bai ewē kaiwuu ichapanawā kaipakedakawu inanupukui. Naskatari mi kayuabadu awē ángel biki rewu nichi ewē wake awē awī mi ewexunu. ⁸Awīwu bewe uyabaitu shinachakayabawe. Naskaweke ari ewē wake mia iyutiruba”, Abrahampa wadi.

⁹Abrahamweta yudubistu awē biwi Abrahampa kishi nunamari wadi. “Na mia ea yuiya ē akikai”, wadi.

¹⁰Naskata awē yudubistu na awē awara sharawu wita diez camellowuri nawuya kadi pexe ichapa Nahor bai Aram

Naharayin adu. ¹¹Ma ñatapakeaidu pexe ichapa Nahor adu dukudi. Awē camellowu atu tedejadi ede wibisu aduxu.

Naatiā wari awīuwawé bai meraduax ede tsekea wibisuadu.

¹² Naskata yudubistu kiwīdi: “Epa Dios ewē diaiwu Abraham mi awē Dios ē bia ñukai ea axusharawé ewē diaiwu Abraham mi sharawa keskawakī eariwi naskawawé ēri sharanu. ¹³ Ē dudu awīuwawé ede witiruwuadu ē netei. ¹⁴ Ea uībawe na daetawa ē ede ñukayaitu ea ayabanu: ‘Mewē bapu kiti keskara wutubata ea ede inawe’. Ē waitu ea kebanu: ‘Ayawé’, ea wata, ‘Mewē camellowuri ē ede inanu’, ea wanu. Naskaxu ē tapinu na awīwu mi Isaac kayawaxua. Naskaxu ē tapinu ewē diaiwu mi sharawabis”, yudubistu wadi.

¹⁵ Kiwīkī adaitiabadu Rebeca dukudi. Awē bapu kiti keskara iaxu wedi. Rebeca Betuel wake idi. Milcá Nahor atū wawa idi. Nahor Abrahampa awē udiwetsa idi.

¹⁶ Rebeca awīwu sharakui. Dukuwedewe ibisba idi. Awē bapu kiti keskaraki ede wuspiwata kaidu ¹⁷ Abrahamweta yudubistu Rebeca adu kushi kata ñukadi: “Ede ichapabashta ea inawe mewē bapu kiti keskaradua”, wadi.



© 1996 David C Cook

Génesis 24.17 adewe.

¹⁸Naskata: “Ayawe ewē diaiwū”, wata awē bapu kiti keskara tsubaxu Rebecapa ayabadi. ¹⁹Ma ayadu Rebecapa yuidi: “Ē mewē camellowu ede wixunu camellowawe ayanuwu na apaiyai keskawanuwu”, wadi.

²⁰Kushikui badedi awē bapu kiti keskara na camellowawe ayatiruwu adu. Ana ichuxu ede wita witadi camellowu ayabaxikī. ²¹Naskake na Abrahamweta yudubistu uīdi peesixuba tapipaikī Diospa axuamaiki awīwu wichixukī Isaacna.

²²Ma camellowawe ayawuadu Abrahamweta yudubistu anillo wita oropa awē anillo Rebeca inata awē rechukuki netabadi. Naskatari bedexebeti rawe inadi. Naskata ana Rebeca ūukadi: ²³“Ea yuiwe tsua mewē epamaiki. Ewe rawebiswuwe mewē pexe adu nu uxatirume”, Abrahamweta yudubistu wadi.

²⁴Rebecapa kebadi: “Betuelpa ē awē wake Milcāweta Nahor awē wake Betuel. ²⁵Nuku pexe adu axaka nadu ma uxatiru. Nadu piti ichapa camellowuna”, wadi.

²⁶Naskaxu na yudubistu baikiri wepepakekawādi. Epa Dioski idibadi. ²⁷Dios kiwīkī iskawadi: “Aichu Diaiwu Dios mi wasī sharakui. Mi Abrahampa awē Dios mi ea uībada ē bia ikūira watiru. Mi atu sharawaaxiwi. Abrahampa awē kaiwuu atū pexe adu ē dukua”, kiwīdi.

²⁸Na dikata Rebeca ichudi awē pexe adu awa yuikai na dika. ²⁹Labánpa chiku Rebeca idi. Naa ichudi Abrahamweta yudubis wichikai camellowawe ayabiswu adua. ³⁰Labánpa uīkī awē oro bedexebeti netaxu weaitu na dukuwene yuiya atu yuiyaitu dikai naskake ichudi dukuwede wedai kai. Wichidi awē camellowu adua ede bai kidi mera chaibadua.

³¹Labánpa yuidi: “Diri uwe. Nuku Dios ikūira wabistu aweskai ma xawakawi netepaime. Ewē pexe ma ē itipiniwaa camellowunari ma itipiniwaa”, Labánpa wadi.

³²Abrahampa yudubistu pexe mera ikikaīdi. Nadu Labánpa camellowawe peweawu wutubadi atu pibaxikī. Atu ede waxudi awē uibatiwawe atū tae chukanuwu. ³³Ma piti inawudu yudubistu atu yuidi: “Ē piyuiba batu yuixuba na ē yuipaiyai”.

Labánpa kebadi: “Duku yuiwe awamaiki nu bia dikanu”, idi.

³⁴“*É Abrahamweta yudubis.* ³⁵*Epa Dios ewē diaiwu awarawu inadi ovejawu vacawu camellowu asnowuri.* Nakatari oro inata platari uibati dukuwede uibati awīwuri inadi. ³⁶*Sara ñushawushtaxu wake wisti adi.* Naa wake awē awarawu naatiwi inaita. ³⁷*Ewē diaiwū ea yuiya:* ‘*Ea yuikuiwe. Ewē wake Canaán adua awīwu ē wibapaiba*’, *ewē diaiwū ea waita Canaán adua awīwu awē wake wibakaspakī.* ³⁸‘*Askataba ewē epā bai adua awīwu wetsa ewē wake wedaxutawe*’, *ewē diaiwū ea waita*”, Abrahamweta yudubistu Labán wadi.

³⁹“*Naskaxu ewē diaiwu Abraham ē yuita: ‘Ewē awīwu ukaspaidu ē aweskaikaime’*, ē waita. ⁴⁰*Ewē diaiwawe ea kebaita: ‘É Dios dikakuibis.* Ewē Epa Diospa awē ángel biki nichi bia axusharanu aweskataba mi kasharatanu. *Ewē epā awē yurawu meradua ewē wake awī mi ewexunu.* ⁴¹*Ipaixuba ewē kaiuwawewe awīwu bia inayabaiwawewe naa ē bia yuiya keskara tsekeyabaitu naa shinabakiwe’*”, yudubistu wadi.

⁴²*Naskata: “Datiā bai meraduax ede cheteadu dukua naduxu ewē diaiwu Abrahampa awē Dios ē kiwīa: ‘Ea uībawē ē kakuikanu.* ⁴³*Datiā ē dudu ede cheteadu xubaya ede wiiyuwaitu ē ñukaitu awē bapu kiti keskaradua ede ea inanu.* ⁴⁴*Naa awīwawewe ea kebanu: “Ede ayawe. Mewē camellowuri ē inanu”*, na awīwu mi kañawaa ewē diaiwū awē wake awī inu’, ē waa”.

⁴⁵“*É kiwīkī adaitiabadu Rebeca ua.* Awē bapu kiti keskara iaxu wea. Awē bapu kiti ene wuspiwaa: ‘*Ede ea ayabawē*’, ē waa. ⁴⁶*Naskata bapu kiti keskara ene wuspiwata ea: ‘Ayawe. Mewē camellowuri ē atu inanu’.* Ma ea ayabadu”, yudubistu wadi.

⁴⁷*Naskata: ‘Mi tsua wakeme’*, ē waitu ea keba. ‘*Betuelpa awē wake ē. Betuel Milcaweta Nahor atū wake’*, ea waa. Naskata anillo awē rechuku xui adu ē netabada. Naskatari bedexebeți rawe orona ē ina. ⁴⁸‘*É ratukunu bai chachita wepepakekawada ewē diaiwū awē Dios aki idibakī waī kayakawikui ea eweke.* Ewē diaiwawewe awē udiwetsa awē wake ē wedaxuiyua. ⁴⁹*Ea yuikawē. Ewē diaiwū awē shina ma axutirume.* Ma axutirubaraka. Na ē tapipaiyai ea yuikawē ēri tapinu”, Abrahamwe yudubistu Labán wadi.

⁵⁰Labánweta Betuelpa kebadiwu: “Diaiwu Diospa awara sharawatiru. Nu bewe askawatanatiruba. ⁵¹Da Rebeca mewē diaiwawe wake iyuxutawe awe wiananu. Naskara Epa Dios awē shina”, wadiwu.

⁵²Naa dikai Abrahamwe yudubistu Diospa uīyaidu baikiri wepepakekawādi. ⁵³Naskata awara sharawu oro plata inata sawetiri Rebeca inadi. Awē uchi inata awē awariwi atu inadi. ⁵⁴Ma naskadu Abrahamwe yudubistu awe rawebiswu pikata ayakata nadu uxadiwu.

Ma uxashita ma pedadu Abrahamwe yudubistu atu yuidi: “Ewē diaiwawe pexe adu ē wunukawe”, atu wadi.

⁵⁵Rebeca awē uchiweta awā kebadiwu: “Da awīwu kayutiruba. Ma diez peda ikadu bewe katiru”, awē uchiweta awā wadiwu.

⁵⁶Naa yudubistu kebadi: “Ea askawayamakawe. Diaiwu Dios ma ea axushara. Ewē diaiwū awē pexe adu ē dasupai”. ⁵⁷Kedaxu nu ñukadu awe ikimaiki Rebeca idiwu: ⁵⁸“Da dukuwedewe mi kapaimē”, wadiwu.

Rebecapa atu kebadi: “Da dukuwedewe ē kapai”, Rebeca idi.

⁵⁹Naskata nawawe nichidiwu atu udiwetsa Rebeca. Naskadu Abrahampa uibatiwe awe raweawu wuwaiwudu Rebeca awē uibati awīwuri awe wudiwu. ⁶⁰Rebeca kayuabadu awē kaiuwawewe shinayana tsai sharapa awē kaiuwawewe yuidiwu:

“Mewē kaiwuunuax
ichapanawā
kaipakedakawu.

Nawuwawewe atu rare akata
uibati wapadakawu”,
wadiwu.

⁶¹Naskata Rebeca itipinidi.
Awē yuduxubiswuawewe
camellowu mamakaya wadiwu.
Abrahamwe yudubiswe awe
rawebiswu Rebecawe wudiwu.

⁶²Tsua ikabadu Isaac ipaudi
bai adu awē ade Négueb. Naskata



© 1996 David C Cook

Génesis 24.61 adewe.

ñatapake bai meraduax ede tsekeaidu dukudi awē ade Na Epa Dios Ipadakatu Naatiwi Uī wapaudiu. ⁶³ Ñatapake uī kaxu camellowu akiri weaiwawe Isaacpa wichidi. ⁶⁴ Naskata Rebecapa Isaac uīta awē camello netewata mamakayaduax wutupakekawādi. ⁶⁵ Rebecapa Abrahamweta yudubis ñukadi: “Da dukuwede tsuame dukuki dukuiyui”, Rebecapa wadi. Abrahamwe yudubistu yuidi: “Isaac ewē diaiwu”, wadi. Abrahamwe yudubistu waitu dikai Rebeca awē wemana wepudi.

⁶⁶ Abrahamweta yudubistu Isaac yuidi na akitawu. ⁶⁷ Naskata Isaacpa Rebeca awē yuina wichi tapas mera iyudi. Naduax wianadiwu. Naa yuina wichi tapas Sarana idi. Isaacpa Rebeca duikudi. Naskax Rebecapa Isaac awa daita shinabakibadi.

Abraham dake baiwadiwu

25

¹Naskadu Abraham awī wetsa widi. Awē ade Queturá.

²Naweta seis wake adi. Nawawe atū adewu Zimrán Jocsán Medán Madián Isbac Súah nawu idiwu. ³Sebáweta Dedán atū apa Jocsán idi. Dedánpa awē xukuwu tres idi. Xuku wetsa asureowu xuku wetsari letuseowu xuku wetsari leumeowu idi. ⁴Madián awē wakewu Efá Éfer Hanoc Abidá Eldaá. Nawu Abraham awē awī wetsa Queturáweta adi. ⁵Apa Abraham awē awarawu awē wake Isaacpa widi. ⁶Abraham dayuxuba awī wetsaweta wake aka atu awara wetsa atu inadi. Naskata na wari ubis ari atu nichidi Isaacwe iyabanuwu.

⁷Abraham ciento setenta y cinco wari akax dadi. ⁸Wari ichapa Abraham iyubixaki adiwuax isinitaba dadi. Dai mera ikawu adu kadi. ⁹Ma daadu Isaacweta Ismaelpa baiwadiwu bawa kidi awē ade Macpelá. Nadu chaibashta bai wetsā awē ade Mamré wari uwaikiri idi. Naa bai Efrónna idi. Efrón Sóharpa awē wake. Sóhar hitita idi. ¹⁰Naa bai Abraham peiuxū widi hititawuna. Nadu awī Sara baiyadu awīwe pataxabedi. ¹¹Abraham ma daitadu Epa Diospa Isaac sharawadi. Naskata pozo awē ade Na Epa Dios Ipadakatu Naatiwi Uī nadu Isaac idi.

Ismaelpa awē rewuduwu

¹²Ismaelpa awē apa Abraham awē awa Agar. Naa Agar egipciowawe awīwu xawu idi. Sarapa awē uibati. ¹³Ismaelpa

awē wakewu atū adewu. Iyua awē ade Nebaiot chipuke awē ade Quedarnu Adbeelnu Mibsánu ¹⁴Mismánu Dumánu Masánu ¹⁵Hadarnu Temánu Jeturnu Nafísnu Quedmánu nawu idiwu. ¹⁶Ismaelpa awē wakewu doce idiwu. Atū adewuuxū atū bai tapidiwu. Nawu atū diaiwu idiwu.

¹⁷Ismael ciento treinta y siete wariya akax dadi. Awē xidi ikawu ari kadi. ¹⁸Awē rewuduwu Havilá bai yawi Sur bai nexpakaya nadu ipaudiwu. Nadu chaibashta Egipto bai. Naduri Ismaelpa rewuduwu ikadu wai Asiriaki dukua idi.

Jacobwe Esaú kādiwu

¹⁹Jacobwe Esaú kādiwu. Abrahamwe awē wake Isaac udua nu dikanu. ²⁰Isaac cuarenta wari ma aki ikadu Rebecawe wianadi. Betuelpa awē wake Rebeca Labánpa chiku idi. Nawu Arameowu Padán-aram bai adu ipaudiwu. ²¹Rebecapa wake atiruba idi. Naskake Isaacpa Epa Dios kiwīdi wake apaikī. Kiwīyaitu dikaxu Isaac Diospa axudi. Rebecapa wake dadedi. ²²Awā xakī meraduax na dadea rawe beenaiwudu: “Aweskai iskakadime”, idi. Rebecapa shinadi. Naskaxu Epa Dios ñukadi. ²³Naskaiwawe Diospa awa kebadi:

“Mewē xakī meraduax bai xuku rawe
aduax yurawu beenakadi
kāyukadaxba.

Wetsa bitsisipakui iixiwi. Wetsa bitsisipawiax askara
iixiwiba.

Chipuketu na iyua uibati keskara waaxiwi. Naa rawe
chipu paxkanaxikadi”, wadi.

²⁴Ma aki uxe ikadu Rebeca wake rawe kādi. ²⁵Na kātaea awē radi chaxta idi. Awē yuratiixu radiya. Naskake awē ade Esaú wadiwu. “Esaú”, wakakī Radi ichapaya. ²⁶Naskata udiwetsa kādi. Meke wistichi Esaú awē tae chichuku ñatax tsekedi. Naskake awē ade Jacob wadiwu. Jacob wakakī Tae chichuku ñatax tsekeea wapaudiwu. Isaac sesenta wari ma aki ikadu Rebeca wake rawe kādi.

Esaúpa iyuatu witiru bidibetsadi

²⁷Wake rawe yusidiwu. Esaú yuina retebiskui ipaudi. Udiwetsa Jacob dii mera diibisba. Tapas mera wisti ipaudi. ²⁸Naskaitu awē apa Isaacpa Esaú duikuipaudi yuina reteaitu uikī. Rebecapa iyua duiwikī askakai wapaudiba. Chipuke Jacob duikuipaudi.

²⁹Peda wetsa Jacobpa pichayaidu Esaú dii mera katadi. Xukenai dukudi. ³⁰Dukuta Esaúpa Jacob piti ñukadi: “Kushi piti wete ushi ea inawe. Ma ē wudikui”, wadi. Naskake Esaú awē ade wetsa Edom wapaudiu. Edom wakakī Ushi wapaudiu.

³¹Naskake Jacobpa kebadi: “Ea inakī taewawe na apā iyua inakī taewatiru keskawakī poroto ushi wete ē bia inanu”, Jacobpa wadi. ³²“Ea piti inawe. Ewē epā ea inapaiyai awabaki”, Esaúpa Jacob wadi. ³³Naskake: “Ea yuikuiwe iskaratiā mia inaimaiki iyua inatiru keskawakī ea inakī taewawe”, Jacobpa wadi. Esaúpa kebadi: “Ikū ē bia inai”, wadi.

³⁴Jacobpa Esaú pan inata poroto ushi wete inadi. Ma pita ayata Esaú widinakawata kai iskakaïdi. Esaú awi duikaspanadi na kaïdiadu.



Génesis 25.33 adewe.

© 1996 David C Cook

Isaac Guerar bai adu kadi

26 ¹ Abraham iyuadu na idi keskai Canaán bai aduax yurawu wudidiwu. Naskake Isaac Guerar adu kadi. Filisteowawe atū diaiwu Abimélec idi.

² Guerar aduax Epa Dios aki dukuta Isaac yuidi: “Egipto adu kayabawe. Na ē bia yuiyai adu netewe. ³ Ē bia awara shara inanupukui. Da bai ē bia inata mewē kaiwuu uduax ichapanawā kaipakedakawuri. Na mewē epa Abraham ē axudi keskawaaxiwi. ⁴ Mewē kaiwuu uduax ichapanawā kaipakedakawu tsuā tanawatiruba na exteweruwutii inu. Da bai ē batu inaxiwi. Naskatari na baitiixu ikawu mewē kaiwuunuax ichapanawā kaipakedakawu awara shara ē atu inanupukui. ⁵ Na ē Abraham yuiyai keskakuipaudi ewē tsai bitsisipa ikūira wapaudi”, Epa Diospa wadi. ⁶ Naskake Isaac Guerar adu netedi.

⁷ Guerar adu ikawawe Isaac ñukadiwu: “Rebeca mewē awame”, waiwawe. Isaacpa besekī atu yuidiba: “Ewē pui”, atu wadi. “Rebecauxū ea retetiruwu”, ixu Isaacpa shinadi Rebeca awīwu sharakui idi.

⁸ Guerar adu wari ichapa iyupaudiwu. Isaac awē awī Rebeca pishkuxu iba ibawaitu diaiwu Abimélecpa filisteowawe atū diaiwawe pexe xui aduxu uīdi. ⁹ Abimélecpa Isaac kedabaxu yuidi: “Ikū Rebeca mewē awī. Aweskai ‘Ewē pui’, mi ikitame”, waitu Isaacpa kebadu.

“Ipaixuba Rebecauxū ea retetiruwu raixu ē shinaita”, Isaacpa Abimélec wadi.

¹⁰ Abimélecpa yuidi: “Aweskakī mia duku iskawaitame. Dudua yura wetsa mewē awīwe ike mia duku chakawakerada”, wadi.

¹¹ “Tsuāra da dukuwede wekaxtiwata awī wekaxtiwake ē atu retebawaidaka”, Abimélecpa awē yurawu atu wadi.

¹² Naa warī Diospa Isaac awara sharawu awiana inadu awē wadawu ichapaya wuaixudi. ¹³ Naskax Isaac awarawu ichapaya idi. Ana awane yupadiba. ¹⁴ Awē ovejawu ichapaya idi. Awē vacawu ichapaya idi. Naskatari awē yudubiswu ichapa idi.

Naskaitu filisteowawe awarawu ichapayake wiāpaipaudiwu.

¹⁵ Apa Abraham iyuadu na awē yuduxubiswawe bai pewekaxu
pozo wadiwu filisteowawe wepukata mai wuspiwadiwu.

¹⁶ Naskata Abimélec Isaac yuidi: “Nu awayaba. Mi awane
yupaiba. Duduax katawe”, wadi.

¹⁷ Naskawaitu dikai Isaac Guerar adu kata bachi raweta
xatsukame nadu yuina wichi tapasta nadu idi. ¹⁸ Abraham iyuxu
atu pozo wabadi. Ma daitadu filisteowawe mai wuspiwakata
wepudiwu. Na Isaacpa awē yudubiswawe apediwu pozo. Na apā
adedi naduri Isaacpa adedi.

¹⁹ Peda wetsa Isaacpa awē yudubiswawe pozo wapaikakī
ede shara wichidiwu. ²⁰ Guerar ikawuwe Isaacwe yudubiswawe
atuwe setenadiwu: “Da ede nukuna”, idiwu. Naskake Isaacpa
ede adekī Setenawu, wadi. ²¹ Naskata pozo awiana apeawudu
naa uduax awiana setenadiwu. Naskaxu Isaacpa pozo adekī
Duikaspanadiwu, wadi.

²² Isaac naduax chaikui kadi naduxu pozo wadi. Ana
setenabayabawewe uīkī pozo adekī Ana tsuā duku wekaxtiwaiba,
wadi. “Diaiwu Diospa duku sharawaa. Naskake ana nu chakaiba”,
Isaac idi.

²³ Naduax Isaac Beerseba adu kadi. ²⁴ Isaacki Epa Dios naa
yabeta aki dukuta yuidi:

“Mewē epa Abrahama ē awē Dios.

Beseyabawe. ē bewe ika.

Abrahamuxū ē bia awara shara inaxiwi.

Naskatari mewē kaiwuu uduax ichapanawā

kaīpakedakawu ichapa idakawu”, Diospa wadi.

²⁵ Naskata Isaacpa awē yuina wichi tapasdi ruwe petsaidadi
naduxu Dios idimaxuxikī. Naskatari awē yudubiswawe bai
pukikaxu pozo wadiwu.

Isaacweta Abimélecpa shinadiwu

²⁶ Peda wetsa Guerar aduax Abimélec udi Isaacwe tsaiki ui.
Soldadowawewe atū diaiwu Ficol Abimélecwe udi. Naskata Ahuzat

Abimélec tsai shinababisri udi. ²⁷Naskake Isaacpa ñukadi: “Aweskai ma ewe tsaikiyuame. Matu bai aduxu ea ma duikaspata ea ma putadi”, Isaacpa Abimélec wadi.

²⁸Nawuwawe kebadiwu: “Mi Epa Dioswe ika. Na shina iskara nu beweta shinapai duku chakawayabawe. ²⁹Nu bia wekaxtiwaba. Askataba nu bia sharawabis. Naskake nu bia yui Epa Dios bia awa shara inawuikai”, Abimélec Isaacpa wadi.

³⁰Naskata Isaacpa atu fiesta waxudi: Nawawe pikata ayadiwu. ³¹Peda wetsa ma widiniuwakata tsai shinadiwu. Naskata Isaacpa atu yuidi: “Ma atuwe rawetiru piixikī wukawe”, atu wadi.

³²Isaacwe yudubiswawe naa pedata yui wekadi wediwu pukikakī ede wichidiwu. ³³Isaacpa adekī Sebá,^k wadi. Naskake datiā pexe ichapa awē ade Beerseba, wadiwu.

³⁴Ma Esaú cuarenta wari ika idi Juditwe wianadiwu. Hitita adu ika Beerí awē wake idi. Naskatari awīwu wetsawe wianadi awē ade Basemat. Hitita adu ika Elónpa wake idi. ³⁵Naa awīwu raweta Isaacya Rebeca atu wekaxtiwadiwu.

Apa Jacobpa tsai shara inadi

27 ¹Isaac adiwushta wexu ana uñtiruba idi. Naskake peda wetsa Isaacpa awē wake iyua Esaú yuidi: “Ewē wakē ē bia yuinu”, Isaacpa wadi. “Epā ea yuiwe”, wadi. ²Apā yuidi: “Ma ē adiwukuiya. Awetiāra ē dai. ³Mewē piakati mewē pia wuta yuina wetsa retexiwe ē pinu. ⁴Na dabi ē pipaitiru keskara ea axuwe ē naxuba ē piyunu. Ea pichaxuwe dabi shara ē pipaibis keskara ewē awara sharawu ē bia inaxinu”, Isaacpa wadi.

⁵Apa Isaacpa Esaú yuiyaitu Rebecapa dikadi. Ma Esaú dii mera kaadu ⁶Rebecapa awē wake chipuke Jacob yuidi: “Mewē epa mewē uchi yuiyaitu ē dika. Duduri Esaú yuiya: ⁷“Na ē dabi pipaitiru ea axuwe. Naskatari ē piyunu ē bia awara sharawu inaxinu Diaiwu Diospa uñyaidu’, waitu ē dika”, Rebecapa Jacob

^k **26.33** Sebá wakakī Yuikui, wapaudiwu.

wadi. ⁸“Ewē wakē ea dikakuiwe ē bia yuiyaitu. ⁹Yuinawu kede mera ikawu adua oveja keskara raweta atū wake sharakui ea wixutawe mewē epa pipaitiru keskara ē pichaxunu. ¹⁰Dabi shara ma ē pichaxuadu mewē epā pinu wuxutaxikī dayuxuba na ikibiswu sharawu bia inaxinu”, Rebecapa awē wake Jacob wadi.

¹¹Jacobpa awa yuidi: “Ewē uchi awē yuratiixu radiya. Ē radiuba. ¹²Ea ramakī tapitiru ē aki kaxepaiyai keskara itiru. Naskatari ea na ikibiswu sharawu ea inataba ea chakawatiru”, wadi.

¹³Awā kebadi: “Ewē wake, da ē bia yuiyai awe. Ea cabrito wixutawe. Shinachakayabawe. Bia chakawaibaki ea akiki”, awā Jacob wadi.

¹⁴Naskata Jacobpa cabrito keskara rawe wii kai kadi. Ma weadu awa Rebecapa pichaxudi na pipaitiru keskara Isaacpa pinu. ¹⁵Rebecapa Esaú awē saweti sharakui awē pexe meradua wita Jacob sawebadi. ¹⁶Naskata oveja keskara raweta atū wichi wita awē puña rawe adu wadi awē texu adu radiya yabake. ¹⁷Ma piti ikadu Jacobpa apa wete inata pan inadi pinu.

¹⁸Naskata Jacob ikikaikī apa kedadi: “Epā”, apa wadi. Isaacpa kebadi: “Watū mi ewē wakeme”, wadi.

¹⁹Jacobpa apa yuidi: “Ē mewē wake iyua. Esaú. Naa mia ea yuiya ma ē bia axua. Widinakawata ē bia wexua piwe. Naskaxu mewē awara sharawu ea inawe”, Jacobpa Isaac wadi.

²⁰Naskata Isaacpa ūukadi: “Aweskawaxu kushikui mi yuina wichiame”, wadi. Jacobpa kebadi: “Mewē Diospa ea ina”, apa wadi.

²¹Isaacpa yuidi: “Uwe ē bia beenu mi Esaúmaiki”, wadi.

²²Naskawaitu Jacob apaki kadi apā ramanu: “Mi Jacobpa awē tsai mi naskawiax Esaúpa awē puña rawe keskara radiwuya mi”, apā wadi.

²³Isaacpa unadiba puña rawemai radiyake naa Esaú keskaramaiki. Awē tsai sharawu inataba tapikuipaidi. ²⁴Awiana ūukadi: “Mi ewē wakekui Esaúme”, Isaacpa wadi. Jacobpa apa kebadi: “Ē Esaú”, wadi.

²⁵Naskata apā yuidi: “Na mi retea pichaxu ea inayuwe ē pinu. Ewē awara sharawu ē bia inanu”, apā wadi. Jacobpa apa piti inadi pinu naskatari vino wexudi, Isaacpa pita ayanu. ²⁶Naskata apa yuidi: “Tabuki ea tsuawe”, apā wadi.

²⁷Jacob apaki uxū tabuki tsu adi. Isaacpa awē saweti xetedi. Tsai sharapa yuidi:

“Dii itsa keskara ē
bia xetei. Dios bia
sharawada.

²⁸Dai arixu bia ui ibaxuxiwi.
Na mi wadawu wuaikī
sharanuwu.

Arroz keskara wuaita
wibi awē ade uva
nari wuainu.

²⁹Yura ichapawu mi atū
diaiwu inu.

Bai wetsaduawu yura ichapawawe
mewē tsai bia dikapakexanuwu.
Mewē kaiwuu mi atū diaiwu ipadaka.
Na bia chakawaiwu Diospa atu chakawapadaka.
Na bia sharawaiwu Diospa atu sharawapadaka”, wadi.

³⁰Ma Isaacpa tsai shara yuikī adaitiadu Jacob tsekekañdaidu Esaú dii meraduax dasudi. ³¹Naskata pichaxudi piti shara Esaúpa. Dukuta: “Epā widinakawata piwe mewē wakē yuina retea mewē tsai shara ea inaxikī”, Esaúpa apa wadi. ³²Isaacpa yukadi: “Mi tsuame”, wadi. Esaúpa kebadi: “Ē Esaú mewē wake iyua”, wadi. ³³Isaac peesitaba rateyana yuidi: “Tsuā yuina retetadame. Mi uabadu ma ē pia. Ē ma tsai shara ina datiā naa tsai sharaya”, wadi. ³⁴Esaúpa naa tsai dikai apā yuiyaitu sidakuiyana yuidi: “Eari tsai shara inawe epā”, wadi. ³⁵Isaacpa kebadi: “Mewē udiwetsa uta ea para. Naatu tsai shara wua na mewena ikerada”, wadi. ³⁶Esaúpa yuidi: “Naskake Jacob^l rawadiwu. Ma ea



© 1996 David C Cook

Génesis 27.27 adewe.

^l 27.36 Awē ade wakakī parabis.

parakī rawewaī. Ea wiākī taewadi awara shara ē wipaiyai wake iyuatu. Wetsa ea mi yuisharapaiyai ea wiā. Mi tsai shara wetsa mia waxuabame”, Esaú idi. ³⁷Isaacpa kebadi: “Ma ē Jacob mewē diaiwuwaā mewē kaiuu awē uibati inu. ē yuiya trigo ichapaya ita vino ichapaya inu. Iskaratiā ē aweskatirume biki”, Isaacpa wadi.

³⁸Esaúpa wekaxtiwadi: “Eari tsai shara wetsa mi inatirubame”, apa Isaac wadi. Naskax Esaú siaidi.

³⁹Naskata apā Esaú yuidi:

“Mi bai shara adu ipadakaba ui itirubadu.

⁴⁰Mewē kedu ewapatu bia duikaspabiswuwe mi retenapakedaka.

Mewē extū bia ana uibati keskara wanupukuiba”, Isaacpa wadi.

Jacob awē uchiki besekaīdi kadi

⁴¹Esaúpa Jacob duikaspakī taewadi shina sharawu apa inapaiyai wiāitake. Naskake: “Ma ewē epa daadu Jacob ē retexiwi”, Esaú idi.

⁴²Retexikī shinayaitu dikaxu Rebecapa awē wake Jacob kedabadi: “Ewē wakē mewē uchī shina shara mi wiāitake bia retepai. ⁴³Naskake itipiniwe. Ewē uchi Labán ikadu Harán adu katawe. ⁴⁴Nariax mi weda uyuki awi raeyunu. ⁴⁵Ma shinabakiadu ē bia kedabaxiwi ana mi dudu unu. Na peda wistichi ma dake ē batu uīpaiba”, Rebeca idi.

⁴⁶Naskata Rebecapa Isaac yuidi: “Na awīwu hitita Canaán bai adu ikawu Esaú wianake atu uī wekax wichia. Jacobpa dudua Canaán awīwu atu wike ē datiru”, Rebeca idi.

28 ¹Isaacpa Jacob kedaxu tsai shara yuikuita yuidi: “Ewē wakē da bai Canaán adua awīwu wetsa wiyabawe.

²Bai awē ade Padán-aram adu katawe. Mewē chata Betuel ikadu naduax mewē kuka Labánpa awē wake wetsawe wianatawe.



© 1996 David C Cook

Génesis 27.36 adewe.

³Epa Dios bitsisipakui bia kexesharai. Mi uduax mewē kaiwuu uduax ichapanawā kaipakedakawu ichapa ipaxanuwu yurawu bai wetsa adu ikawu. ⁴Epa Diospa bia sharawata mewē kaiwuu uduax ichapanawā kaipakedakawu na Abraham sharawadi keskawakī. Iskaratiā da bai batunaba chipu batuna inupukui na Abraham Diospa inadi keskawakī”, Isaacpa Jacob wadi.

⁵Naskata Isaacpa awē wake Jacob bai awē ade Padán-aram adu nichidi. Naskata Jacob awē kuka Labánpa pexe ari kadi. Betuelpa apa Labán idi. Betuel arameo idi. Rebecapa awē pui Labán idi. Jacobwe Esaú atū awa Rebeca idi.

⁶Esaúpa tapidi Isaacpa Jacob yuisharake Padán-aram adu nichike. Naskatari tapidi awīwu Canaán adua wiyabanu. ⁷Apaweta awā Jacob yuiyawu keskai Padán-aram adu kadi. ⁸Esaúpa tapidi apa Isaacpa adua awīwu cananeawu duitiruba. ⁹Esaú ma awīyawiax Abrahampa awē wake Ismael awē pexe adu kadi awīwu wetsa wipai. Nadua Ismaelpa awē wake wiādi awē ade Mahalat. Mahalat awē udiwetsa Nebaiot.

Jacobpa Betel aduxu dabadi

¹⁰Beerseba aduax Jacob Harán adu kadi. ¹¹Ma yabeaidu wai nexpakaya uxadi. Ruwe wita aki tekesabedi. Nadu uxadi. ¹²Dabapa uīdi bipiti dai ari dukua idi. Naa bipitini Epa Dios awē ángelwu wutukata idainiwuwawuwaīdiwu.



Génesis 28.12 adewe.

© 1996 David C Cook

¹³Bipiti amanauri Diaiwu Dios dia idi. Naduxu yuidi: “Mewē xuta Abraham mewē epa Isaac ē atū Dios. Da bai mi uxadu ē bia inaxiwi na mewē kaiwuu uduax ichapanawā kaipakedakawuri.

¹⁴Mewē kaiwuu uduax ichapanawā kaipakedakawu ichapakui ipadakawu na bishpu keskara tsuā tanatiruba. Nawu paxkanakadi na wari ubis ari ita wari kabiskiri na baitiixu adu iixikadi. Miuxū yura baitiixu ikawu ē atu sharawaaxiwi mewē kaiwuunuax ichapanawā kaipakedakawuxuriwi. ¹⁵Ē bewe kai. Narixu ē bia kexexiwi. ē bia putaxiwiba. ē bia yuiyai bia axuxiwi. Ana da bai adu awiana ē bia ewexiwi”, Diospa wadi.

¹⁶Jacob buita shinadi: “Ikūkui Dios dudu ē tapitaba”, Jacob idi.

¹⁷Besekuiyana shinadi: “Dudu sharakui Dios awē pexe adu dai awē weputi”, Jacob idi.

¹⁸Ma uxashita Jacob wenamari widinakawādi. Na ruweki tekesebeshida widiniuwata aki xidi nachidi Dios inaxikī. ¹⁹Nadu pexe ichapa awē ade Luz ipaudi idi. Jacobpa nadu adekī Betel,^m wadi.

²⁰Naskata Jacobpa yuikuidi: “Epa Dios, ē kai ari ewe kata ea kexei ea piti inata saweti inayaitu ²¹aweskataba ewē epa pexe adu dasuaitu na ewē Dios iki”, idi. ²²“Da ruwe chaidipa ē diba uipakedakawu Dios awē pexe. Ea mia awara shara inake diez ē bia inapakedaka”, wadi.

Jacob Padán-aram bai adu dukudi

29

¹Jacob wari ubiskiri kadi yura ikawu adu. ²Nari kakī uīya wai babakidua tres oveja xukuwu uīdi. Pozo chaibakixu ovejawawe tedekadi idiwu. Ovejawawe ede ayabiswu ruwewāne wepua idi. ³Tres oveja ichawuadu oveja kexebisu pozo wepukaxu ovejawu ayababiswu. Ovejawu ayabakata pozo wepupaudiwu.

⁴Jacobpa oveja kexebisu atu ñukadi: “Ma waniamē”, atu wadi. Naskata: “Nu Harán adua”, na oveja kexebiswawe wadiwu.

^m **28.19** Betel, wakī Epa Dios pexe, wadi.

⁵ Jacobpa awiana atu ñukadi: “Ma Labán tapiame Nahorpa awē wake”, atu wadi. Awiana oveja kxebiswu ñukadi: “Nu tapia”, wadiwu.

⁶ Awianari Jacobpa atu ñukadi: “Isinikibame”, oveja kxebiswu wadi. Naskata: “Shara. Isinikiba. Dua awē wake Raquel ui ovejawuya”, wadiwu.

⁷ Jacobpa atu yuidi: “Pedayua yabeyuaba ovejawu kede mera ma ikibapana. Aweskakī ma atu ede ayabata ma wasi pibaibame”, atu wadi.

⁸ Nawuwawe kebadiwu: “Nu atu badayui ma ovejawu ichawudu pozo weputa ede atu nu ayabai”, wadiwu.

⁹ Jacob atuwe tsaiyuwaidu Raquel udi apā awē ovejawuya. Naatu oveja kxebis ipaudi.

¹⁰ Naskaidu Jacobpa Raquel uwaitu uïdi Labánpa awē wake. Labánpa awa pui idi. Naskata Jacobpa pozoo awē weputi ruwewa wepedi Labánpa awē ovejawu ede ayabaxikī. ¹¹ Jacobpa Raquel tsu ata siaikuidi. ¹² Jacobpa Raquel yuidi: “È Rebecapa awē wake Labánpa awē pia”. Naa dikai Raquel ichudi apa yui kai.

¹³ Puí awē wake Jacob dikai Labánpa aki dukuta pishkuta tsu adi. Naskata awē pexe adu ewedi. Jacobpa awē kuka Labán awarawu yuidi. ¹⁴ Labánpa Jacob duiyana yuidi: “Mi ewē pia weyakakuiya”, wadi.



© 1996 David C Cook

Génesis 29.10 adewe.

Jacobpa atu widi Lía yawi Raquel

¹⁵ Ma uxe wisti Jacob ikadu Labánpa yuidi: “Baitsi mia ea yuduxutiruba mi ewē pia. Awetii pei è bia inatirume”, wadi.

¹⁶Labán xutukuwake raweya idi. Na iyuatu awē ade Lía chipuke Raquel. ¹⁷Iyuatu awē ade Lía awē weru uisharatiruba ipaudi. Chipuke Raquel sharakui idi. ¹⁸Jacobpa Raquel mai duikī Labán yuidi: “Mewē wake chipuke Raqueluxū ē bia siete wari yuduxui”, wadi.

¹⁹Labánpa kebadi: “Ē bia wibantu dukuwede wetsa inataba. Ewē pexe adu iwe”, wadi.

²⁰Naskaxu Jacobpa siete wari yududi Raqueluxū. Siete wari uñya awa idiba Raquel mai duikī.

²¹Peda wetsa Jacobpa Labán yuidi: “Siete wari ma ē yudua. Ewē awī ea inawe ē awi wiananu”, wadi.

²²Naskata Labánpa yura chaiba ikawu atu ichawadi piti pii wenuwu.

²³Ma yabeadu Labánpa Lía Jacob wibadi. Líawe uxadi. ²⁴Naskata Lía uibatiya idi awē ade Zilpá da Labánpa inadi awara axunu.

²⁵Ma pedadu Jacobpa Lía unadi awe uxashita. Labán ñukadi: “Aweskai mia iskawaame. Raquel wiixikī beweta ē yudubis. Aweskai mia paraitame”, Jacobpa wadi.

²⁶Labánpa kebadi: “Duduxu iyua nu reke wedeya wababis. Chipuke nu wena wedeya wabatiruba”, wadi. ²⁷“Na domingo wisti ayuwe naskaxu ewē wake wetsa ē bia inanu awiana siete wari mia yuduxuwaitu”, Labánpa wadi.

²⁸Jacob naskadi. Domingo wisti ata Labánpa Raquel wibadi awī inu. ²⁹Labánpa awē wake Raquel Bilhá inadi awē yudubis inu. ³⁰Jacob Raquelwe wianadi duikuidi. Lía duiwikī askawapaudiba. Awiana siete wari Jacobpa Labán yuduxudi.



© 1996 David C Cook

Génesis 29.26 adewe.

Líaweta Jacobpa awē wakewu

³¹Jacobpa Lía duisharayabaitu Diospa uidi Líapa wake anu. Naskayaidu Raquelpa wake dadetiruba idi. ³²Líapa werunawake dadedi. Awē ade Rubén. Líapa yuidi: “Diospa ea uikī ē ichapaba

shinachakaitu Jacobpa ea duisharayabaitu naskake ea ubisbakī ea wake ina. Naskake ea Jacobpa duí”.

³³Naskata awiana Líapa wake wetsa adi awē ade Simeón. “Dios dikaxu ewē wene ea duisharayabaitu naskake Dios ea wake wetsa ina”, idi.

³⁴Naskata awiana Líapa tres wake adi awē ade Leví: “Datiā ewē wene ea duikui ewetamai ma tres wake axu”, Líida.

³⁵Líapa awiana wake wetsa adi awē ade Judá wadi naskata yuidi: “Aichu Dioski ē idibakui”, idi. Naskata Líapa ana wake adiba.

Jacobpa wake wetsawu adiwu Bilhá weta

30 ¹Raquelpa Jacobweta wake atirubaxakī awē chipi Líaki sidadi. Raquelpa Jacob yuidi: “Ē beweta wake ayabax ē dai”, wadi. ²Naskawaitu dikai Jacob naki sidayana yuidi: “Mi shiname ē Dios. Naatu bia wakeya wabatiruba”, wadi. ³Naskata Raquelpa yuidi: “Da ewē uibati awē ade Bilhá ē bia inai. Awe iwe. Naatu ma wake akadu naa ewē wake keskara iixiwi. Naskax ē wakeyaxiwi”, Raquelpa wadi.

⁴Naskata Raquelpa Jacob inadi aweta yudubis Bilhá aweta wake anu. ⁵Naskata Bilhápa Jacob wake ma dadexuwa idi naskata kaixudi. ⁶Naskata Raquelpa wake yuikī iskawadi: “Da wake awē ade Dan. Ē kiwiyaitu Diospa kexesharakuia ea wake ina”, idi.

⁷Naskatari Raquel awē uibati Bilhápa awiana wake wetsa Jacobweta adi. ⁸Naskata Raquel iskadi: “Da wake awē ade Neftalí.ⁿ Ewē chipiwe nu askawatana ē tsai winubada”, Raquel idi.

Jacobpa awē wakewu Zilpáweta adi

⁹Líapa ana wake atirubaxakī awē uibati Zilpá Jacob inadi. ¹⁰Naskata Zilpáweta Jacobpa wake adiwu. ¹¹Naskake Líia iskadi: “Aichu na ē yuita keskakuiyaki. Naskake da wake awē ade Gad, iki”, Líida.

¹²Líia awē uibati Zilpáweta Jacobpa wake wetsa adi. ¹³Naskata Líia “Aichu”, ita idibadi. “Awīwuwawe idibai ea waaxikadi. Naskake da wake awē ade Aser, iki”, wadi.

ⁿ **30.8** Neftalí awē ade ē setenadi.

Jacobpa Líaweta wake wetsa adiwu

¹⁴Wetsatiā wai babaki Rubén kadi. Ma trigo ushiadu narixu tuu rau wibi awē ade mandrágoras wichixu awa wexudi. Na wibiwu ūkī Raquelpa Lía ūukadi: “Mewē wake mandrágoras bia wexua ea inawe”, Raquelpa wadi.

¹⁵Líapa kebadi: “Ewē wede mia wiāta datiā awiana mandrágoras ewē wake mi wiāpai”, wadi. Raquelpa kebadi: “Mandrágoras ea mia inaitu Jacobwe da yabeta mi uxatiru”, wadi.

¹⁶Ñatapake Jacob wai babakiduax uwaidu Lía aki dukuxu yuidi: “Da yabe ewe mi uxai ewē wakē awē mandrágorasuxū mewē awī Raquelpa ea inayua”, Líapa Jacob wadi. Naa yabeta Jacob Líawe uxashidi.

¹⁷Líapa kiwīyaidu Epa Diospa dikadi. Wake dadedi. Cinco wake aka idi Jacobweta. ¹⁸Naskata Líapa yuidi: “Da wake awē ade Isacar, awara shara. Epa Dios ea ina ewē yudubismai ewē wede inaitake”, wadi.

¹⁹Líapa awiana wake ma dadea idi. Seis wake ma aka idi Jacobweta. ²⁰Lía iskadi: “Epa Dios ea wake ina. Jacobpa ē uduax shinasharakui ē seis wake axuke. Epa Dios ea shara ina. Naskake awē ade Zabulón”, wadi.

²¹Chipu xutukuwake adi Líapa wake wisti awē ade Dina.

²²Epa Dios Raquel ubisbadi kiwīyaitu wake apaikī. Naskadu wake adi. ²³Ma tuuyabexakī ma wake kaiyax Raquel iskadi: “Ana ē rawiyabanu Diospa ea axua”, idi. ²⁴Naskaxu awē ade José, wadi. Naskaxu yuidi: “Awiana Diospa ea wake inapainu”, idi.

Jacobwe Labán paranapanaudiwu

²⁵Raquel ma José kaítadu Jacobpa Labán yuidi: “Na ē udiari ewē bai adu ē dasui ²⁶Ewē wakewu ea inata ewē awē rawe ea inawe nawuxū ē bia yuduxubis ewē bai ari ē katanu. Ma mi tapia ē bia yuduxubis”, Jacobpa Labán wadi.

²⁷Naskaitu tsai pachiwaxu Labánpa yuidi: “Ē ikaduax kayuyabawé. Ewē ūnuweuxū ē tapia miuxū Dios awane ea

yupababa. ²⁸Ea yuiwe awetii ē bia pei inatirumaiki na mia ñukaitii ē bia inanu”, Labánpa wadi.

²⁹Jacobpa kebadi: “Ma mi tapia ē bia yuduxubis. Mewē yuinawu ē bia kexexubis. ³⁰Ē uyuabadu awara ichapabaya mi iyupaudi. Datiā awara mi ichapaya. Euxū Diospa bia sharawaa. Naskake datiā iwikui ē yudutiru ewē awī rawenu ewē wakeuxū”, Jacobpa wadi.

³¹“Awetii pei mi wipaimē”, Labánpa wariawadi. Jacobpa kebadi: “Ē bia awa ñukaiba. Ē shinai keskara mi shinayaitu mewē oveja ē bia awiana kexexutiru. ³²Ovejawu adu ē kanuwe. Naduxu mewē yuinawu katuta paxkanu oveja tutuyawu rañyawu oveja keskara rañyawu tutuyawuri nawu atū wakewu wisuwuri nawu ewē pei keskara iki. ³³Naskata ma dasuxu mi uñuxiwi ewē shina kayakawikuike. Naskata ewē yuinawu uñuxu oveja uxu wichiyabaxu ‘Ea unebisba’, ea mia waaxiwi”, Jacobpa wadi.

³⁴“Na mi shinai shara”, Labánpa wadi. ³⁵Naa pedata Labánpa oveja keskara atū wake tutuyawu rañyawu oveja keskara tutuyawu rañyawuri oveja rañyawu tutuyawuri oveja atū wake



© 1996 David C Cook

Génesis 30.32-33 adewe.

wisuwu nawu awē wakewu atu inadi kexexunuwu.³⁶ Naskata Labán chaikui kadi kai tres peda dukutiru adu. Naskayaиду Jacobpa yuinawu kexei netedi.

³⁷ Ovejawawe kede adu na chaiba yuinawawe ede ayabiswu adu Jacobpa iwiwu awē adewu álamo, almendro, castaño weruwaxu sewuakedi naa wichixu ovejawawe ede ayanuwu.

³⁸ Chipu na iwi raxkiawu na ede ayabiswu adu wadi yuinawawe uīkī ayanuwu.³⁹ Naduax ovejawu chutanakaxu wake anuwu turuyawu ata wisuwu raūyawu anuwu.

⁴⁰ Jacobpa naduxu paxkadi turuwuya ita wisuwu ita nawu Jacobpa awena widi. Naskax yuina ichapaya idi. Naduax Labánwe Jacob yuinawu paxkanadiwu.⁴¹ Oveja xuakuiyawu ibiyaiwudu Jacobpa iwi raxkixu ratadi ede adu naduax kedeyawu kaīnuwu.⁴² Naskake ovejawu irabadawu Jacobpa iwi raxkixibea ede adu atu ikibadiba. Naskax Labánpa awē yuinawu irabadawu idi. Na xuawu Jacobna idi.⁴³ Naskax Jacob awarawuya awē yudubiswuya awīwuya dukuwedeya ichapayari camellowuri asnowuri nawuya Jacobna idi.

Jacobpa shinadi kaaxikī

31 ¹Labánpa wakewawe Jacob yuitiwadiwu: “Nuku epa uduax Jacob awarawuya”, wadiwu. Naa Jacobpa tapidi.
²Labánpa ana sharawayabaitu tapidi.

³Naskake Diospa Jacob yuidi: “Mewē epa ikadu dasuwe mewē kaiwuu aduri. Na mi kai ari ē bewe kai”, wadi.

⁴ Jacobpa Raquel kedabadi Líari. Na oveja kexeadu ma weawuadu.

⁵ Jacobpa atu yuidi: “Matu epa ana ea apaudi keskawaiba. Naskaweke ea Diospa kexebis atu wadi. ⁶Batu raweta ma tapia. Matu epa ē yuduxubis. Awara ē axui ē xadibisba. ⁷Naskatari Labánpa ea paratiadi. Pei ea wetsa wetsawatiadi. Ewē Diospa ea chaka xitixubis. ⁸Askataba naatu yuibus: ‘Oveja turuya ē bia inanu naa mi yudubisuxū naa ovejapa awē wake raūya ibis. Naatu shinakī na yuina raūya nawu mewē pei iki ea wabis. Naatiwi yuinawu atū wake raūyawu ikita’, Jacobpa atu wadi. ⁹Diospa yuinawu matu epa wiāta ea ina.

¹⁰Wetsatiā yuinawu ibiyaiwawe ē dabayabea. Dabapa uīya oveja raūyawu tutuyawu usiyawuri chutanaiwawe. ¹¹Ewē dabapa Diospa awē ángelpa ea kedadi: ‘Jacob’, ea waitu: ‘Ē dudu’, ē wadi. ¹²Naskata ángelpa ea yuiyabea: ‘Uīkuiwe naatiwi cabra wedewu raūyawu kedeyawu tutuyawuri cabra awīwu chutanaiwawe. Naskata awē wakewu mewena itiru. Mewē kuka Labánpa bia paraitu ma ē uīya. Naskake ē bia sharawai. ¹³Ē Dios Betel adu biki dukudi. Ruweki tekesebeshida widiniuwata mi xidi aki nachiyabea ea mi parabisba. Na mi kaīdi Canaán adu katawe’, ea ángelpa waita”, Jacobpa atu wadi.

¹⁴Naskata Raquelweta Líapa kebadiwu: “Ana nu awayaba nuku epā pexe adu. ¹⁵Awē wake keskara ana duku waiba. Naskataba duku yura wetsa atiru keskara duku wai. Dukuri bidibetsayabea bia yudubabis duku bia wibaxiki. ¹⁶Nuku epa awē awara sharawu Dios wiāita nukuna nuku wakewunari. Naskake na Dios bia yuiyabea keskawe”, Raquelweta Líapa wadiwu.

¹⁷Naskata Jacob itipinidi awē awī rawenu awē wakewuya atu camello mamakaya atu tsaūdi. ¹⁸Naskata Padán-aram aduxu awarawu wibixakī nawuya kadi Canaán adu awē apa Isaac ipaudi adu.

¹⁹Labánpa oveja radi wakira kaxu xateyuikadu Raquelpa apā awi awara udiwaxu ikūira waa awē pexe adua unedi. ²⁰Jacobpa naskaxu Labán arameo paradi yuitaba kadi. ²¹Kushi awē awarawuya ede Éufrates pukewaīdi bachi awē ade Galaad adu kadi.

²²Ma peda tres ma ikadu Labán yuidiwu Jacob kaitake.

²³Naskata Labánpa awē yurawu atu ichanawadi Jacob beewaīxikī. Domingo wisti awaīdi kai puchini bachi Galaad adu aki dukudi. ²⁴Naa yabeta Labán arameo Epa Dios dababakī iskawadi: “Mi Jacob retetiwakiki”, wadi.

²⁵Ma domingo wisti ikadu Labán Jacobki dukudi bachiwu awē ade Galaad. Nadu yuina wichi Jacobpa tapasdi. Labánpari nadu yuina wichi tapasdi awē kaiwuuweta. ²⁶Naduxu Labánpa Jacob askawadi: “Aweskai mi iskaitame. Aweskakī mia paraitame.



© 1996 David C Cook

Génesis 31.26 adewe.

Ewē wake rawe na unewerādai keskara mia waita. ²⁷Ea yuitaba mi ichuita. Mia yuiwerādaidu idibayana música tamborpa arpaneriwi nu bia buduxukeraita. ²⁸Miakai ewē wake rawenu ewē chata rawe mi tabuki tsu abawerāitaba. Na mi tatiba keskarakui. ²⁹Ē bitsisipaya bia chakawanu. Naskaweke ewē dabapa mewē epa awē Diospa ea yuiya ē bia aweskawayabanu. ‘Mi Jacob retetiwakiki’, ea waita. ³⁰Ma ē tapia mewē epā pexe adu mi dasukuipai. Naskaweke aweskakī ē udiwaxu ikūira wabiswu mia weaitame”.

³¹Jacobpa Labán kebadi: “Ē shinachakaita ea seteyana mewē wake rawe ea mia netewatiru raikax. ³²Na biwī udiwaxu mi ikūira waa yura wetsā bia wiāke wichixu naa dai. Da yurawawe uīyaiwudu wedawe ē bia awa weaitamaiki. Na mewenawu wutawe”. Naskaweke Jacobpa tapidiba Raquelpa Labánpa awi udiwaxu ikūira waa wiātike.

³³Naskata Jacobpa yuina wichi tapas adu Labán ikikaīdi wedai kai. Naskatari Jacobweta yudubis rawe attū yuina wichi tapas mera wedadi. Líapa awē yuina wichi tapas meraduax tseketa Raquelna merari ikidi. ³⁴Raquelpa wita camello tsauti wiata awē yuina wichi tapas mera ikikaita Labánpa awara udiwaxu ikūira wabis tsauti nunamari wata aki tsaudi. Labánpa wedawikī whichidiba.

³⁵Naskata Raquelpa apa yuidi: “Epa sidapaiyabawe. Ê widitiruba ë ibi”. Na awi udiwaxu iküira wabis wedawikí wichihiba.

³⁶Jacobpa Labán sidakí askawadi: “Ê awa chaka waitame. Aweskakí mia chiruweráitame. ³⁷Ewé awarawu ma mia wedawikí adua mewé awa mi wichiaba. Nuku kaiuwawé uñunuwu xawakawi tsekawe nawawé duku yuinuwu. ³⁸Veinte wari ë beweta yudubis mewé ovejane wake wisti kaí dabisba. Naskatari mewé oveja kede meradua ë bia piábisba. ³⁹Basharunu reteweke ë bia pei inabis. Naskatari yabeta iyabai pedata mewé yuinawu bia weduxuke mia ea pei ñukabis. ⁴⁰Pedata ë wari xada beepaudi yabetari batsinapaudi. Ê uxá sharapaudiba. ⁴¹Veinte wari mewé pexe adu ë ibis. Naskata mewé wake raweuxú catorce wari ë bia yuduxubis. Mewé yuinauxuri ë seis wari yudubis. Ewé yuduxu ‘Ê bia inanu’, ea mia wawiaxu ea mia inabisba mia wetsa wetsawatiadi. ⁴²Ewé xuta Abraham awé Dios ewe iyabake naskata ewé epa Isaac awé Dios yabake awaya ë kakeradaba. Naskake ë shinachakayaitu Dios ea uñyaidu mia chakawanuba”, Jacobpa Labán wadi.

Jacobweta Labán shinadiwu

⁴³Naskata Labánpa Jacob kebadi: “Da awíwu rawe ewé wake rawe da wakewu ewé wawawu ovejawuri ewena da mi uñyaiwu ewenawu. Naskaweke ë aweskatiruba. ⁴⁴Naskake dukuraweta nu shinanu”, Labánpa Jacob wadi.

⁴⁵Naskata Jacobpa ruwe widiniuwaxu na naniti keskara dibadi. ⁴⁶Naskata awé kaiuu atu yuidi: “Ruwe ichawakawé”, atu wadi. Naatiwixu nadu wisti wuruwadiwu. Naa ruwewu wuruwaduxu pidiwu. ⁴⁷Nadu Labánpa awé tsaima adekí Jegar Sadutá, wadi. Jacobpari awé tsaima adekí Galaad, wadi.

⁴⁸Naskake Labánpa yuidi: “Da ruwewu wuruidaduxu atu uñbapakedaka dukuraweta nu shinake”. ⁴⁹Naskatari Labánpa awé tsaima: Mispá, wadi. “Nu uñnanayabawiyaitu Epa Dios duku kexea. Bia kexeta ea kexea”, Labánpa Jacob wadi. ⁵⁰Labánpa Jacob yuidi: “Awíwu wetsa wita askayabai ewé wake rawe mi chakawaitu bia tsuã uñyabawiyaitu Dios wistichi bia uñxiwi”.

⁵¹ Awiana Labánpa Jacob yuikí iskawadi: ⁵² “Da ruwe wuruidaduxu dukuraweta nu shinai mewē bai auri ē katiruba mirikai ewē bai auri ma utiruba nu chakanatiru. ⁵³ Mewē xuta Abraham awē Dios ewē xutari Nahor awē Diosnari naatu duku uýaidu dukuraweta nu shinai”. Naskata Jacobpa yuikuidi Epa Dios apa Isaacpa ikúira wapaudiuxú. ⁵⁴ Naskata bachi arixu Jacobpa yuina retexu awē kaiwuu kedadi pii wenuwu. Ma pikata nadu uxadiwu.

⁵⁵ Ma uxashita Labán widinakawata awē chata rana atu tsu ata awē wake rawe tsu adi. Atu yuisharata awē bai adu dasudi.

Jacobpa tsai Esaú wubadi

32 ¹ Jacob ma kaidu Diospa awē ángelwu aki dukudiwu.

² Jacobpa nawu uí iskadi: “Da Diospa awē tapas rawe. Naskake dudu awē ade Mahanaim iki”, wadi.

³ Jacobpa tsai yuibiswu atu nichidi awē uchi Esaú bai awē ade Seír Edom aduke. ⁴ Naskata duduri atu yuidi yuitanuwu: “Ewē diaiwu Esaú. ‘Mewē uibati Jacobpa duku nichia nu bia yuiyua na Labánwe itiadi’, ea waxutakawe. ⁵ ‘Naskatari vacawuya asnowuyari ovejawuyari. Dukuwedewu awē yudubiswu awīwuri. Ewē diaiwū da tsai ē bia wubai ea mi sharawanu’”, Jacobpa atu wadi.

⁶ Tsai yuibiswu dasukaxu Jacob yuidiwu: “Esaúki ma nu dukutadi. Ma biki duku yui. Cuatrocientos dukuwedewuya ui”, wadiwu.

⁷ Naa dikai Jacob ratekuidi. Naskatari shinachakadi. Naskaxu nawe ikawu yurawu xuku rawe atu wadi. Naskatari idawuri paxkanawadi. ⁸ Duduri shinadi Esaú dukuxu xuku wetsa atu reteaiwawe atiriwi ichutanuwu raixu. ⁹ Naskaxu Jacobpa kiwídi: “Diaiwu Dios ewē xuta Abrahampa awē Dios mi ewē epa Isaacnari ea mia yuidi ewē kaiwuuwe ewē bai adu ē dasunupukunu: ‘Ē bia sharawanupukui’, mia wadi. ¹⁰ Ē mewē uibati. Ē awaba. Naskaweke mia ea sharawaitu ē tapiaba. Ede Jordán pukewuwādi ē awaya kawadiba. Ē chati wistiya kawadi. Datiā ē yura xuku raweya. ¹¹ Ea kexewe ewē uchi Esaúpa

ea reteyabanu. Ÿ ratei duku retei weaiwawe. Awīwu retekata wakewuri retei wekadi. ¹²Mia ea yuikudi: ‘Ÿ bia sharawanupukui’, mia wadi. Naskatari ea mia yuidi: ‘Mewē kaiwuu uduax ichapanawā kaipakedakawu na enewane bishputii ipaxanu’, ea mia wadi tsuā tanatiruba”, Jacobpa Dios wadi.

¹³Naskata nadu uxadi. Naduxu yuina idawu katupakedi awē uchi Esaú inaxikī. ¹⁴Doscientas cabras awīwu veinte cabra wedewu doscientas oveja awīwu veinte oveja wedewu ¹⁵treinta camellas wakewuya cuarenta vaca awīwu diez vaca wedewu veinte asno awīwu diez asno wedewu. Nawu katudi.

¹⁶Naskata awē yudubiswu atu inadi adu wisti wuyabawuwu. Naskata atu yuidi: “Reke wukaxu adu wisti ma ichanakiki”, atu wadi.

¹⁷Na rewu nichiyai yuidi: “Ewē uchi Esaú biki dukuxu bia ſukayaitu: ‘Watu mewē diaiwume. Waki mi kaime. Da yuinawu tsuaname’, bia waitu duduri yuitawe: ¹⁸‘Nawu mewena mewē extu Jacobpa bia inai. Ÿ yuduxubis. Mewē uibati chipu ui’, watawe”.

¹⁹Xuku wisti yuikī taewadi. Chipu xuku raweri yuidi. Na yuina iyuwaiwu atu yuidi: “Esaúki dukukaxu na tsai wisti ma yuitiru: ²⁰‘Mewē yudubis Jacob duku kachiuri ui’, watakawe”. “Na iki sidayai naa Ÿ inauxū iki raenu”, raixu Jacobpa shinadi. ²¹Naskata awē awarawu udiwetsa wubadi. Nadu uxashidi awē tapas adu.

Jacobwe ángel beenadiwu

²²Naa yabela widinakawata Jacobpa awē awī rawe, awē yudubis awīwu raweri, awē wakewu once nawu ede awē ade Jaboc ukiri atu pukebadu. ²³Naskata ma ukiri pukekata atū awarawuya. ²⁴Nadu ares wisti netedi naa yabe chai dukuwedewe beenashiyaiwudu pedadi. ²⁵Kupiyabatiruxakī chipaki Jacob kushadu awē



© 1996 David C Cook

Génesis 32.24 adewe.

chipa xau xuxatadi. Naa kushadu paedí Jacobpa edenu. ²⁶ Ángelpa iskawadi: “Ea edewe ma pedaki”, wadi. Naskaweke: “Mia tsai shara inayabaitu ē bia edeiba”, Jacobpa wadi.

²⁷ Ángelpa Jacob awē ade ñukadi: “Mewē ade awame”, wadi. Jacobpa yuidi: “Ewē ade Jacob”, wadi.

²⁸ Naskata ángelpa yuidi: “Ana mewē ade Jacob ikiba. Mewē ade Israel iki. Dioswe mi beena. Dukuwedewuwe mi beena. Mi kupidibawaa. Naskake mi Israel iki”, ángelpa wadi.

²⁹ Jacobpa awē ade ñukadi: “Mewē aderi ea yuiwe”, Jacobpa wadi. Ángelpa Jacob kebadí: “Aweskakī ewē ade mi ñukakabeime”. Naskata ángelpa tsai shara yuidi. ³⁰ Naskake Jacobpa nadu adedi awē ade Penuel, wadi. “Duduax ma ē Dioswe uñanana ē dayuaba”, Jacob idi.

³¹ Ma warí uwaidu Penuel aduax Jacob kadi awē kateki paeyana. ³² Naskake israeliwawe chipa pudu dabi pipaudiwuba. Iskaratiāri pitiruwuba Jacobpa awē chipa adu ángelpa kushadike.

Jacobwe Esaú dukunadiwu

33 ¹Esaú cuatrocientos dukuwedewuya uwaitu uïkī Jacobpa Lía awē wakewuya paxkadi. Raquelri naskariwi adi. Awē yudubis raweri atū wakewuya paxkadi. ²Naskata Jacobpa awē yudubis awīwu rawe atū wakewuya atu rewu tanabadi. Atu kachiuri Lía awē wakewuya atu wadi. Chipukui José awaya Raquel atu wadi. ³Atu naskawata awē wemanane baikiri wepupakekawakakaídi siete veces awē uchiki aki dukuax. Naskaxu chaiba wadi.

⁴Naskaitu uïkī Esaúpa tebespata tsu adi naduax naa rawe eaikī watanadiwu.

⁵Naskata Esaúpa awīwuya atū wakewuya uïkī Jacob ñukadi:



© 1996 David C Cook

Génesis 33.4 adewe.

“Naawu tsuawume”, Esaú ikaitu awē uchi Esaú duikuiyana kebadí: “Naawu Diospa mewē uibati awē wakewu ea ina”, Jacobpa wadi.

⁶Naskata Jacobpa uibati rawe atū wakewuya Esaúki wekata wemanane baikiri wepupakewuwāwuwādiwu. ⁷Líari awē wakewuwe naskari adiwu. Raquelwe Joséri naskadiwu.

⁸Esaúpa ñukadi: “Awa shinakī da yuina xukuwu ē uiwerāda mia wubame”, waitu Jacobpa kebadí: “Ipaixuba nawuxū ea sharawatiru raixu ē bia wuba”, wadi.

⁹Tsai pachiwaxu Esaúpa awē extu Jacob yuikī iskawadi: “Ē bia yuina wiāiba. Ē yuinane ē yupaiiba. Nawuya iwe”, wadi.

¹⁰Jacobpa yuiriwadi: “Daawu bia inayai ea wixuwe. Mi dukuki idiba. Ē bia uīyax naa ē Dios uīyai keskara. ¹¹Da ē bia wexua ea wixuwe. Dios ea sharakuiwaa. Naskake ē awa yupaiiba”, Jacobpa naskawariawaitu Esaúpa widi. ¹²Naskata Esaúpa iskawadi: “Nu kanuwe. Ē bia rewu kaxui kanu”, wadi.

¹³Naskata Jacobpa duiyana kebadí: “Ewē uchī ma mi tapibetsashta wakewu kushi wutiruwuba. Ewē oveja ita vacawuri wakeyawu ē atu kushi iyupana xukenakadax datiruwu. ¹⁴Ea rewu kaxui kawe. Ewē yuinawu wenamashta wuwaiwudu ē atu kachiuri ē kai ewē wakewuya Seír adu biki dukui kai”, wadi.

¹⁵Naskaitu Esaúpa yuidi: “Askake dukuwede awetiira ē bia nichixutanuwe”, Ikaitu Jacobpa kebadí: “Ana ē yurawu yupaiiba mi nichiwaipana. Ē bia sidabapaiba”, wadi.

¹⁶Naa pedata Esaú Seír adu dasudi. ¹⁷Jacob Sucot ari kadi. Nari pexe wata awē yuinawuri nadu tapasxudi iwi texpaya. Naskake nadu adekī Sucot,^o wadi.

¹⁸Jacob Padán-aram aduax aweskataba Canaán adu dukudi. Pexe ichapa awē ade Siquem adu pexe wadi. ¹⁹Naduxu cien pei sapauxū bai widi Hamorpa awē wakewuna. Siquempa apa Hamor idi. Nadu Jacobpa pexe wadi. ²⁰Nadu ruwe petsaidadi naduxu Dios kiwixikī. Nadu Jacobpa adekī El-elohé-israel,^p wadi.

^o 33.17 Sucot wakakī pexe tapas wadiwu. ^p 33.20 Adekī iskawadi Dios Israelpa awē Dios.

Siquem Dinawe awe idi

34

¹Jacobweta Líapa awē wake Dina idi. Wetsatiā Dinapa awīwu rana uī kai kadi pexe ikawu adu. ²Nadu pexku awē ade Siquem idi. Naatu apa Hamor na atū diaiwu idi. Hamorpa wake Siquem. Siquem Dinapa raniwiyaitu achita awe idi. ³Naskata duikuidi awe wianapaixikī. ⁴Naskata Siquempa awē apa Hamor yuikī iskawadi: “Ea yuixuxiwe awe wiananu”, wadi.

⁵Siquempa wasīkui achita Dinawe awe ika dikadi Jacob peesiyudiba awē wakewu weyunuwu. Nawuwawe wai babakixu ovejawu kexei wuawu idi. ⁶Siquempa apa Hamor tsaiki kai kadi Jacobwe.

⁷Jacobpa awē wakewawe kushikui dikadiwu na ika. Wai babakiduax sidayana wediwu Siquempa achita awe ika dikakakī. Jacobpa awē wake Dina chakawaa Siquempa duku iskawaa idiwu. ⁸Hamor atu yuidi: “Ewē wake Siquempa matu chiku duikui. Matu chikuwe ewē wakewe wiananukawe. ⁹Nu shinanukawe nuku kaiwuu xawu ma wiyaidu matu kaiwuu xawu nu witiru. ¹⁰Duwe ikawe naduax awara bidikata peiuxū bai wiixikaki”, Hamor atu wadi.

¹¹Siquempari Jacob yuita Dina awē uchiwu atu yuidi: “Matu chiku ea inakawe. Na ma ea ñukai batu inanu. ¹²Awarawu ea ñukakawe. Naskake matu chiku ewe wiananu”, atu wadi.

¹³Jacobpa awē wakewawe kebadiwu parakakī Siquemya awē apa Hamor. ¹⁴Naskata duduri atu yuidiwu: “Nuku pui nu inatiruba dukuwede awē wushki wichi xateaba. Naskara uduax nu rawītiru. ¹⁵Ma askayabaitu matu wushki wichi ma xateyabake duku keskara ma iyabaitu nuku xawu batu nu inatiruba. ¹⁶Naskatari nuku wakewuwe matu wakewu wianatiruwu. Naskax da bai adu nu batuwe itiru nadu wisti nu iixikī. ¹⁷Matu wushki wichi ma xateyabaitu Dina iyuta duduax nu kai”, idiwu.

¹⁸Naa dikakadi Hamor awē wake Siquemwe “Ikū”, idiwu. ¹⁹Naa dikakī Siquempa awē wushki wichi xatepaidi Jacobpa awē wake Dinamai duikuikī. Siquem yura sharakui ipaudi awē kaiwuu udua.

²⁰Pexe ichapa awē ade Siquem awē kaiči adu wudiwu. Hamor awē apa Siquemwe diaiwu wetsawuwe tsaiki wukadi wudiwu:
²¹“Jacobpa awē kaiwuu sharawu. Atuwe nu iki nuku bai ewapa naskatari atū kaiwuu xawu nu winu nawuwaweri nuku xawu winuwu”, idiwu. ²²“Nuku wushki wichi xateabax nu atuwe itiruba. Aduri nu shinayabaitu dukuwe itiruwuba naskara weyabiswu. ²³Naawu duwe inuwu atū awarawu atū yuinawu nukuna inu”, idiwu.

²⁴Naskata dukuwedewawe naduri shinadiwu Siquemweta Hamorpa atu yuiyaitu. Naskaxu atū wushki wichi xatediwu.
²⁵Jacobpa wake rawe Simeónwe Leví Dinapa awē uchi rawe ma tres peda ikadu pexe ichapa adu wudiwu. Atū wushki wichi xateitawu kayawubadu keduya wukata atu retediwu. Atū wushki wichi xateitaxakakī atuwe ikinatiru idiwuba. ²⁶Naskatari Hamor retekata Siquem retediwu. Atu retekata Dina na pexe aduxu iyidiwu. ²⁷Naskayaidu Jacobpa wakewu atiri dukudiwu naa rakawawaīda winuwukata atū awara wiādiwu atū chikuuxū atu retekata naduax ubiskuike. ²⁸Naskatari oveja iyukata vaca asno nawu iyidiwu. Naskatari pexe ichapadua awarawu wukata wai babakiduari awarawu wudiwu. ²⁹Naa pexe adua awarawu wukata wakewu atu iyukata awīwu mishti atu iyidiwu.
³⁰Naskata Jacobpa Simeónya Leví atu yuidi: “Ea ma chakawabaa. Canaán adu ikawawe ferezeowawe ea duikaspakadi naawu ichanakaxu ea retekata batu retexikadi ewē kaiwuuya numai ichapabake”, Jacobpa atu wadi.

³¹Awē wakewawe kebadiwu: “Siquempa nuku chiku na ikabis keskara duku waita”, apa wadiwu.

Jacob pexe ichapa Betel adu dasudi

35 ¹“Betel adu itawe”, Diospa Jacob wadi: “Naduxu Dios ruwe petsainaxutawe na ē biki dukudi adu Esaúki besekaīdi mi ichuax idi adu”, Diospa Jacob wadi. ²Naskata Jacobpa awē kaiwuu na awe ibiswu atu yuidi: “Na ma udiwaxu ikūira waa putakawe. Dashikawe. Matu saweti weda sawekawe.

³Betel adu nu wunukawe”, atu wadi. “Narixu ē ruwe petsaidikanu naduxu ē Dios idimaxuxikī. Ewē uchiki ē besekaīdi kaidu naatu ea sharawaxudi. Naatu ea kexesharadi waī ē kaidu”, atu wadi.

⁴Yura keskara wakaxu na ikūira wapaudiwu Jacob inadiwu. Atū pachu adu sawekata netabiswu nawu inawudu Jacobpa baiwadi iwi awē ade encina nama pexe ichapa awē ade Siquem chaiba.

⁵Jacobpa awē yurawuwe kaidu Epa Dios yura chaiba ikawu atu besenawadi. Naskake Jacobpa awē wakewu tsuā beewaīdiba.

⁶Jacob awē yurawuwe pexe ichapa awē ade Luz nadu dukudiu. Awē ade wetsa Betel idi. Na bai adu Canaán idi. ⁷Ruve petsaidaxu nadu adedi El-betel, wadi. Betel wakī “Epa Dios awē Betel”, idi. Nadu Epa Dios aki dukudi awē uchiki besekaīdi ichuadu. ⁸Naduax Rebeca awē uibati Débora dadi. Iwi awē ade encina nama bai wadiwu Betel chaiba. Naskake nadu adedi Elón Bacut.⁹

⁹Padán-aram aduax Jacob dasuadu Epa Dios aki dukudi. Naskata Epa Dios shina shara inadi. ¹⁰Iskara tsaima Diospa Jacob yuidi:

“Datiā mewē ade Jacob.

Ana mewē ade Jacob ikiba.

Mewē ade Israel iki”, Epa Diospa Jacob wadi.

Naskata Diospa awē ade wetsa axudi.

¹¹Chipu Diospa yuidi: “Ē Dios bitsisipa.

Wake ichapa mewē kaiwuunuax ichapanawā
kaipakedakawu.

Mi uduax yura xuku wetsa ipaxanuwu.

Naskatari mewē kaiwuu uduax ichapanawā
kaipakedakawu ichapa diaiwu ipadakawu.

¹²Na bai ē Abraham inadi naskatari ē Isaac inadi
naa bai ē bia inai.

Mewē kaiwuunuax ichapanawā kaipakedakawu ē bia
inanupukui”, Epa Diospa Jacob wadi.

¹³Naduax Epa Dios Jacobwe tsaita kadi. ¹⁴Naduxu Jacobpa ruwe widiniuwādi naniti keskara naa Dioswe tsaika aduxu.

⁹ 35.8 Elón Bacut wakakī Da iwi adu nu siaiki.

Naniti keskaraki xidi nachita vinori nachidi naduxu Dios idimaxuxikī.¹⁵ Dioswe tsaikadu nadu Jacobpa adedi Betel,^r wadi.

Raquel dadi

¹⁶ Betel aduax wuwaiwudu pexe ichapa Efrata chaibakiduax Raquel wake kaī isikui beedi. ¹⁷ Wake wibistu Raquel wake akaidu yuidi: “Beseyabawe. Werunawake wetsa mi aki”, wadi. ¹⁸ Ma daki awē wake adedi Ben-oní,^s wadi. Naskaweke awē apā adedi Benjamín,^t wadi. ¹⁹ Ma Raquel daadu pexe ichapa Efrata wai kaa adu baiwadiwu. Datiā nadu awē ade Belén. ²⁰ Raquel baiyadu Jacobpa naniti keskara widiniuwādi. Datiā Raquel baiyadu ma tapinabea.

²¹ Naskadu Israel kadi. Eder winuwaīta awē yuina wichi nadu tapasdi. ²² Naduxu Israelpa awī wetsa Bilhá Rubén ikaitu naa dikai Jacob sidakuidi.

Jacobpa awē wakewu doce idiwu

²³ Israel wakeya idi Líaweta aka. Awē wakewu Rubén iyua idi. Akachiuridua Simeón idi. Awē wakewu wetsa Leví wetsari Judá wetsari Isacar atū chipuke Zabulón idi.

²⁴ Israel Raquelweta wake rawe adi. Awē wake iyua José awē wake wetsa awē ade Benjamín.

²⁵ Raquel awē uibati awē ade Bilhá nawetari Israel wake rawe adi. Awē wake iyua Dan wetsa Neftalí.

²⁶ Lía awē uibati awē ade Zilpá nawetari Israel wake rawe adi. Awē wake iyua Gad wetsa Aser. Naawu Jacobpa awē wakewu bai Padán-aram aduax kaīdiwu.

Isaac dadi

²⁷ Jacob apā pexe adu dasudi. Apa Isaac ipaudi pexe ichapa awē ade Mamré awē ade wetsa Arbá wetsari Hebrón. Nadu

^r 35.15 Betel wakī Dios awē pexe, wadi. ^s 35.18 Ben-oní wakī Ewē wake shinabetsaiyai, wadi. ^t 35.18 Benjamín wakī Ewē meke bibiyauridua, wadi.

Abraham Isaac ipaudiwu adu. ²⁸Isaac dai ciento ochenta wari akax dadi. ²⁹Adiwukuiyax dadi awē xidiwuwe iki kai kadi. Ma daadu Esaúweta Jacobpa baiwadiwu.

Esaúpa awē wedawu

36 ¹Naawu Esaú awē wedawu ichapanawā kaipakedakawu. Esaú awē ade wetsa Edom. ²Esaú bai Canaán awīwuwe atuwe wianadi. Adá awē apa Elón hitita. Oholibamá awē awa Aná awē chata Sibón heveo. ³Basemat Ismael awē wake Nebaiot awē pui naweri wianadi. ⁴Da wakewu Esaúpa adi. Adáweta Elifaz adi. Basematweta Reuel adi. ⁵Oholibamáweta Jeús Jaalam Coré. Nawu Esaúpa wake idi bai Canaán adu iyuadu.

⁶Naskata Esaú bai Canaán aduax kadi. Awē extu Jacobki paxkadi bai wetsa adu kadi. Awē awīwu ita awē wakewuwe ita awē awarawuya kadi. ⁷Jacobpa awē yuinawu ichapa idiwu Esaúnari. Adu wasi ichapaba idi yuinawawe pipana. Naskax adu wisti itiruwuba idi. ⁸Naskadi Esaú awē ade wetsa Edom. Bai bachi Seír adu iki kai kadi.

⁹Naawu Esaú awē kaiwuunuax ichapanawā kaipakedakawu. Esaú awē wedawu edomitawu. Bai machiwadu Seír adu idiwu. ¹⁰Awē wakewu atū adewu. Elifaz Adá awē wake Esaú awē awī Reuel Basemat awē wake Esaú awē awī. ¹¹Elifaz awē wakewawe atū adewu Temán Omar Sefó Gatam Quenaz. ¹²Elifaz awē awī wetsa awē ade Timná. Aki wake adi awē ade Amalec. Amalecwawe atū xidi Adá Esaú awī. ¹³Reuel awē wakewawe atū adewu Náhat Zérah Samá Mizá. Nawu Basemat awē wawawu idi. Basemat awē wede Esaú idi. ¹⁴Oholibamá Esaú awī wetsari awē wakewawe atū adewu Jeús Jaalam Coré. Oholibamá Aná wake awē chata Sibón.

¹⁵Diaiwuu awē wedawu Esaú. Elifaz awē wakewu atū adewu Temán Omar Sefó Quenaz ¹⁶Coré Gatam Amalec. Nawu diaiwuu Elifaz Edom bai adu ipaudiwu. Nawu Adá awē wedawu. ¹⁷Reuel awē wakewu diaiwuwawe atū adewu Náhat Zérah Samá Mizá. Edom bai idiwu. Nawu Basemat wedawu. Basemat awī wetsa

Esaú. ¹⁸Na awīwu Oholibamá Anápa wake awē wede Esaú. Awē wakewu diaiwuwawe atū adewu Jeús Jaalam Coré. ¹⁹Naatiwi Esaú awē kaiwuunuax ichapanawā kaipakedakawu. Esaú ade wetsa Edom. Nawu atū kaiwuuwae atū diaiwuu.

²⁰Seír horeopa awē kaiuu ichapanawā kaipakedakawu Edom bai adu ipaudi. Awē wakewawe atū adewu Lotán Sobal Sibón Aná ²¹Disón Éser Disán. Nawu Seír awē raba kaīyawu ichapakedakawu horeowawe atū diaiwuu. Nawu Edom bai adu ipaudiwu. ²²Naskadu Lotán wake rawe atū ade Horí Hemam. Lotán awē pui Timná. ²³Sobal awē wakewawe atū adewu Alván Manáhat Ebal Sefó Onam. ²⁴Sibón awē wake rawe atū ade Aiáwe Aná. Naa Anápa ares ede bai meradua tsekeia awetiira wichidi tsua ikabadua apa awē yuina awē ade asno kexexukī. ²⁵Naa Aná wake raweya werunawake awē ade Disón wetsa awīwu awē ade Oholibamá idi. ²⁶Disón awē wakewu atū adewu Hemdán Esbán Itrán Querán. ²⁷Éser awē wakewu atū adewu Bilhán Zaaván Acán. ²⁸Disán awē wakewu atū adewu Uz Arán. ²⁹Horeowawe atū diaiwuu atū adewu Lotán Sobal Sibón Aná ³⁰Disón Éser Disán. Nawu horeowawe atū diaiwuu Seír bai adua xuku wetsa idi.

Edom adu awē diaiwuu

³¹Israeliwu diaiwu datukuiya iyuwawubadu. Nawu atū diaiwuu Edom adua ipaudiwu. ³²Beorpa awē wake awē ade Bela. Naa Edom bai adu atū diaiwukui ipaudi. Pexe ichapa awē ade Dinaba adua. ³³Bela daadu bai wetsadua awē ade Jobab atū diaiwu idi. Naa Zérahpa awē wake idi. Bosrá aduax kaīdi. ³⁴Jobab daadu bai wetsadua awē ade Husam atu diaiwu idi. Temán aduax kaīdi. ³⁵Husam daadu awē ade Hadad atū diaiwu idi awē bai adua. Hadad Bedadpa awē wake. Naa Bedad awē soldadowuwe Madián atū soldadowu Moab bai adu atu mitudiwu. Atiriwi reteaiwudu atiriwi ichudi. Hadad diaiwiatiā pexe ichapa Avit adu iyudi. ³⁶Hadad daadu awē ade Samlá atū diaiwu idi awē bai adua. Awē pexe ichapa awē ade Masrecá. ³⁷Samlá daadu awē ade Saúl awē bai adua atū diaiwu idi. Awē pexe ichapa awē ade

Rehobot ede Éufrates ketukunu adu.³⁸ Saúl daadu wetsa awē bai adua atū diaiwu idi awē ade Baal-hanán Acbor awē apa.³⁹ Baal-hanán daadu wetsa awē bai adua atū diaiwu idi awē ade Hadad. Awē pexe ichapa awē ade Pau. Hadad awē awī Mehetabel. Naatu Matredpa wake awē chata Mezaab.

⁴⁰ Nawu Esaú awē kaiwuunuax ichapanawā kaipakedakawu. Nawu xuku wetsawu idi. Atū adewu Timná Alvá Jetet⁴¹ Oholibamá Elá Pinón⁴² Quenaz Temán Mibsar⁴³ Magdiel Iram. Esaúriwi awē ade wetsa Edom. Nadua ikawawe edomwu atū diaiwuu ipaudiwu.

Josépa dabadi

37

¹ Canaán bai adu Jacob iyupaudi apa ipaudi adu.

² Jacob awē kaiwuwe ipaudiwu. José diecisiete wariyaxu udiwetsawuweta ovejawu kexepaudi. Nawuwawe José chakawaiwae Josépa apa Jacob yuipaudi. Zilpá awē wakewu Bilhápa awē wakewuri nawu Jacobpa wakewu ipaudiwu.

³ Jacobpa awē ade wetsa Israel. José duikuipaudi atiri awē wakewu duiwikī atu askakai wapaudiba adiwuxumai José adixakī. Naskake saweti raüya shara atu abadi José inaxikī. ⁴ Jacobpa José duiyaitu udiwetsawawe tapikaxu duikaspakata uïkaspapaudiwu.

⁵ Wetsatiā Josépa dabaxu udiwetsawu yuidi. Naskaweke nawawe duikaspakuipaudiwu. ⁶ Atu yuidi: “Ea dikakawe ewē daba ē batu yuiyaitu.



© 1996 David C Cook

Génesis 37.3 adewe.

⁷Wai babakixu naatiwixu trigo nu pishtanea. Naskayaidu ewena kushikui widinakawata kayakawikui dia ika. Batunawu kakuwawaïda ika ewē trigo pishtanabea na diaiwū atiruwu keskawaawu”, Josépa atu wadi.

⁸Naduri atu yuiyaitu dikakakī iyua ranawai kebadiwu: “Mewē daba mia duku yuiyai mi nuku diaiwu iixiwi mi duku yuduxime”, wadiwu. Awē dabari dikakaspanadiwu atu yuiyaitu.

⁹José awiana dabaxu awē uchi rana atu yuidi: “Wari uxe once exteweru ikaidu ikiri wesuxu na diaiwu atiru keska ea waawu”, atu wadi. ¹⁰Josépa awē udiwetsawu atu yuita apa yuiyaitu apā José kebadi: “Awameti na mi dabawaa. Mewē ewanu mewē uchiwu nu bia baikiri wepexupakekawāxime”, apā José wadi.

¹¹Naskata apā duiyaitu udiwetsawawe ma duikaspatiawu idi. Apā awē wake daba tapikuipaidi.

José awē uchiwawe peiuxū atu inadiwu

¹²Peda wetsa José awē uchiwu Siquem chaiba wudiwu. Atū apā awē ovejawu iyidiwu wasi wedaxu atu pibai wukadi.

¹³Jacobpa awē ade wetsa Israel awē wake José yuidi: “Mewē uchiwawe oveja kexekadi Siquem chaibakixu. Atu uītawe”, wadi. Josépa kebadi: “Iya. Ë katanuwe”, idi.

¹⁴Israelpa yuidi: “Mewē uchi rana uīta ovejawuri atu uītawe aweskakadimaiki ea yuiyuxikī”, apā wadi. Hebrón bachi aduax kaax Siquem adu dukudi. ¹⁵Josépa awē uchiwu atu wedai wedudi. Dukuwene wichixu ñukadi: “Tsuawu mi wedaime”, wadi.

¹⁶Josépa kebadi: “Ewē uchi rana atu ë wedai. Wanixu ewē uchiwawe oveja kexekadime ea mia yuitirumame”, wadi.

¹⁷Naa dukuwene kebadi: “‘Dotán adu nu wunukawe’, iwañkadi duduax ma wuawu”, dukuwene wadi. Naskata José atu wedawui kai Dotán adu atuki dukudi. ¹⁸José chaikiduax uwaitu wichikaxu retepaixikakī shinakata yuinadiwu.

¹⁹Awē uchiwu yuinanadiwu: “Uíkapu dababis ui. ²⁰Nu retenukawe. Ma retexu kidi wetsa mera nu putanu: ‘Ma basharunu pia’, nu wanu. Na dabaita ikūmaiki”, wadiwu.



© 1996 David C Cook

Génesis 37.23 adewe.

²¹ Naskaiwawe dikakī Rubénpa udiwetsawu tibabapaidi: “Nu reteyabanukawe. ²² Aweskawakī ma retepaime. Aweskawataba kidi mera putakawe”, atu wadi. Rubén awē extu uduax rawanaipaidi.

²³ José udiwetsawuki ma atuki dukuadu awē saweti raūya sawea wiādiwu. ²⁴ Achikaxu kidi betu adu putadiwu.

²⁵ Naskakata piixikakī tsaudiwu. Naskayaiwudu ismaelitawu Galaad adu ikawu weaiwawe atu wichidiwu. Atū camellowu adu awarawu wui wukadi ini shara Egipto adu peiuxū atu inai wukadi.

²⁶ Naskata Judápa udiwetsawu atu yuidi: “Nuku extu retexu nu awa witiruba nu reteauxū. Dake nu wumapaitiru. ²⁷ Nu reteiba ismaelitawu peiuxū nu atu inanukawe. Nuku extuki”, Judá idi. Naatiwi “Ikū”, idiwu.

²⁸ Ma weawudu bai kidi meradua José tsekakata peiuxū atu inadiwu. Nauxū veinte pei sapa widiwu. Naskakata ismaelitawowe José Egipto bai adu iyudiwu.

²⁹Rubén dasukī uīya bai kidi mera ana adu José idiba. Naskata siaiyana awē saweti waxtedi shinabetsakī. ³⁰Rubén dasuta udiwetsa atu yuidi: “José ana aduba. Nuku epa nu awa akikaime”, atu wadi.

³¹Cabrito retekata José awē saweti chaidipa ibinaswadiwu.

³²Naskata Josépa saweti Jacob wuxudiu. Naskata yuidiwu: “Da saweti nu wichia nu shina mewē wakenaraiki”, wadiwu.

³³Jacobpa awē wakē saweti unanadi. Naskax shinabetsakuiyana: “Yuina puwē wetsā ewē wake ea piā”, Jacob idi. ³⁴Naskata Jacobpa awē saweti shara waxteta saweti chakashta sawedi. Na pedatiiwi awē wake shinai shinabetsata badubetsapaudi. ³⁵Awē wake awīuwawewe dukuwedewaweri siaiyabanu shinabapaiwiaiwewe atu dikataba siaipaudi. Na ē daitiā ē shinabetsaxiwiba Jacobpa awē wakewu atu wapaudi.

³⁶Ismaelitawu adu ikawu Egipto dukukata José Potifar peiuxū inadiwu. Nadu faraón diaiwukui idi. Naatu Potifar diaiwuwaa soldadowawewe atū diaiwu Potifar idi.

Judáwe Tamar

38 ¹Naatiā Judá udiwetsawuki paxkadi. Dukuwene awē ade Hirá awē pexe adu iki kai kadi. Naa dukuwede Adulam adua idi. ²Narixu Canaán ikatu awē wake wichidi. Awē ade Súa idi nawe wianadi. ³Judáweta Súa wake adiwu atū wakē ade Er wadiwu. ⁴Awiana wake wetsa dadedi. Awē ade Onán idi. ⁵Judápa awiana wake wetsari adi. Awē ade Selá idi. Apa Judá Quezib iyuadu Selá kaīdi.

⁶Judápa awē wake iyua Er awīwu wichixudi awē ade Tamar.

⁷Judápa awē wake iyua Er chakayaitu uīkī Diaiwu Diospa duidiba. Naskaitu Er dabadi. ⁸Naskata Judápa awē wake chipuke yuidi Onán yuidi: “Mewē uchī awē awī ibis nawe wianawe na nu ibis weduyabanu mi uduax mewē uchī awē kaiwuu uduax ichapanawā kaipakexanuwu”, Judápa awē wake Onán wadi.

⁹Naduri apā yuiyaitu dikakī Onánpa tapidi Tamarweta wake aka awena iixiwaituba. Naskake iyubawawewe awe ikī awē uku

aki badetaba xawakawi badepaudi wake dadeyabanu naa uduax awē uchī kaiwuu uduax ichapanawā kaipakexanuwu inuwuba.

¹⁰Diospa Onán chakayaitu uīkī duidiba naariwi dabadi. ¹¹Naskata Judápa were raweta wibisu Tamar yuidi: “Mewē epā pexe adu kayutawe. Na wedeyaba keskara iwe. Ewē wake Selá yusiyuaidu awe wiananupukuki”, Judápa Tamar wadi. Naskata Judápa shinadi: “Ewē wake Selá udiwetsa rawe ika keskai datiru”, raixu. Judápa yuiyaidu Tamar apā pexe adu kadi.

¹²Awetiira peda ma ikadu Judápa awī dadi. Naa Súapa awē wake idi. Awī daita shinabakita Judá pexe ichapa awē ade Timnat adu kadi naduxu oveja radi xateaiwudu. Hirá awe rawebis awe kadi. ¹³Judá Timnat kaaxikī awē oveja radi xateaitu Tamarpa dikadi. ¹⁴Naa dikakī awē saweti wisu pekadi. Naskata telapa awē wemana wepudi tsuā unayabanu. Naskatari pexe ichapa Enaim kaīti adu tsaudi Timnat wai tapiadu. Tamar naskadi ma tapixu Selá ma yusike naskaweke Judápa awē wakewe wianawabayabaitu.

¹⁵Judápa uīkī da awīwu ikabis raixu Judápa shinadi awē wemana wepuke. ¹⁶Judápa Tamar ñukai kai kadi. Wawawa wabis tapitaba ñukadi: “Ē bewe itirubame”, Judápa kebadu. Tamarpa yuidi: “Ewe ixu awa mia inatirume”, wadi.

¹⁷Naskaitu Judápa kebadu: “Ewē yuinawu adua cabrito wisti ē bia wubaikai”, wadi. Tamarpa yuidi: “Naskaweke mewē awara wetsa ea waxuwaītawe ē bia ikūira wanu”, wadi.

¹⁸“Awa mi duime ē bia waxuwaītanu”, Judápa wadi. Tamarpa yuidi: “Mewē sello dishiya ea inawe mewē pukitiri”, wadi. Naskawaitu Judápa inata nawe idi. Wake dadebadu. ¹⁹Chipu Tamar kata aū wepua pekata awē saweti wisu awiana sawedi.

²⁰Naa pedata awe rawebisyá adulamita cabrito Judápa Tamar wubadi na wawerāita sello dishiya wixuta pukiti wixutanu. Oveja keskara inapaikakī uīya ana adu idiba. ²¹Adulamitapa atu ñukadi: “Wani awīwu ikabisme Enaim adu ika da wai keseme tsaubis”, atu wadi. Dukuwedewawe yuidiwu: “Dudu awīwu ikabisba”, wadiwu.

²²Awe rawebistu dasuxu Judá yuidi: “Awīwu aduba ē wichiaba. Naskatari dukuwedewawe: ‘Dudu awīwu ikabisba’, ea waawu”.

²³Judá kebadi: “Naskanuwe ewē awaraya naya inu dukuki yurawu kaxeyabanuwu. Naatiwixu tapinuwu cabrito ē wuba mi wichiaba”, wadi.

²⁴Rawenu wisti ma uxe ikadu dukuwedewawe Judá yui wekadi wediwu: “Mewē wawawa awē ade Tamar ma wake dadea dukuwedewuwe iki”, wadiwu. Ui ewapatu atu yuidi: “Tsekakawe. Kuwakawe”, Judápa atu wadi.

²⁵Ma tsekayaiwudu awē wawawa ibis tsai wubadi: “Da sello dishiya pukitiri iwawe ea wake dadebaita. Na sello dishiya pukitiri tsuanamaiki unakawe”, atu wadi. ²⁶Awē sello dishiya unata awē pukiti unai iskadi: “Tamar sharayaидu ē chaka ewē wake Seláwe ē wianawakeraita. Naskata ana ē awe idakaba”, Judá idi.

²⁷Ma aki uxe ikadu Tamar wake rawe kaīdi. ²⁸Na kaī taeatu awē meke tsekadi wake wibistu yume ushima dexadi. “Da kaī taea”, wadi. ²⁹Naskayaидu awē biwi ikibawaīdaидu wetsa tsekekerādi awē udiwetsa iyua kaī taea. Wake wibistu yuidi: “Aweskax tsekekeradame”, wadi. Naskake awē ade Fares, wadi. “Naatu wepexukī taea”, wadi. ³⁰Na wetsa kaīyadu naa yume ushima dexea kaīdi. Naa adedi Zérah,” wadi.

Joséwe Potifarpa awī

39 ¹Ismaelitawawe José iyauwudu Egipto adu ikatu dukuwede awē ade Potifarpa José peiuxū widi. Egipto adu diaiwukui faraón idi. Naatu Potifar diaiwuwaa soldadowawee atū diaiwu.

²Diospa José kexesharapaudi. Awē diaiwu Egipto adua idi awē pexe adu ike Diospa axusharapaudi awē diaiwu yudusharaxunu. ³Diospa José axuwaitu awē diaiwawe José

[“] **38.30** Zérah wakakī ushi, wapaudiwu.

unadi Diospa axusharapaudi sharata inu. ⁴Naskake José awē diaiwu idibabapaudi. Naskata Potifar aki chipu diapaudi awē awarawumai kexexuwaitu. ⁵Potifarpa José awarawu kexebaidu Joséuxū Diospa Potifar Egipto bai adu ika sharawapaudi awē pexe adu awē wai aduri. ⁶Potifarpa awē awarawu Josépa kexexupaudi. Naskake ana shinachakapaudiba. Pikī wisti shinapaudi. José wesu sharaya ipaudi kayakawikui. ⁷Naskata peda wetsa awē diaiwū awīni uīyana yuidi iskawadi: “Ewe iwe”, wadi.

⁸José awe ikaspakī kebadi: “Ewē diaiwu iki chipu dia. Awē awarawu ē kexexuke ana awa shinachakaiba. ⁹Matu pexe aduxu ea tsuā winuaba. Ewē diaiwawe ea awa wishkuaba. Mi awē awī. Aweskai ē chakatirume Epa Dioskiriwi”, Josépa wadi. ¹⁰Na pedatiwi: “Ewe iwe”, wawayaitu Josépa tadapaudiba.

¹¹Naskata wetsatiā Josépa awē diaiwawe pexe adu yudui kai kadi. Adu tsuabadu nadu Potifarpa awī wisti idi. ¹²Naatu José awē sawetini achita: “Ewe iwe”, wadi. Awē saweti achinadu aki edewaīdi José pexe aduax ichudi.

¹³José awē saweti tsubax Potifarpa awē awī ¹⁴tsai ewapatu kedainakawa atu kedadi wene awē uibatiwu: “Ewē wene hebreo eweita dukuki kaxepai. Ewē pexe adu ikikaita ewe ipaiyaitu tsai ewapatu ē kedainakawada. ¹⁵Ē wasī kedayaitu dikakī awē saweti putawaīda ichukī”, Potifarpa awē awīni atu wadi.

¹⁶Naskata Josépa awē saweti wadi wede dasuxu uīyunu. ¹⁷Naskata wede dukuwaitu yuidi: “Hebreo mia duku ewexuita kede mera ikikaita ea achita ewe ipaiya. Eū duitaba iki kaxepaiya. ¹⁸Ē wasī kedayaitu dikai ichukī awē saweti iki putawaīda”, wede wadi.



© 1996 David C Cook

Génesis 39.8 adewe.



Génesis 39.20 adewe.

¹⁹ Awīni naduri yuiyaitu dikai Josépa awē diaiwu sidakuidi.

²⁰ Naskaxu atu yuidi José achinuwu. Naskata faraón awē cárcel mera yurawu ikawu mera José nichidi.

²¹ Diaiwu Diospa awē shina shara José uībaidu cárcel mera ikawawe atū diaiwawe sharawapaudi. ²² Naskakata cárcel mera atū diaiwawe José diaiwuwadi cárcel meraduawu atu kexeta atu yuinu awara anuwu. ²³ Cárcel mera atū diaiwawe ana shinachakadiba Josépamai naatiwi kexeke. Dios Joséwe ipaudi. Naskake na akai sharakui ixupaudi.

Panadero copero atū daba Josépa atu yuidi

40 ¹ Naskata Coperoweta panaderopa atū diaiwu Egipto adua sidabadiwu. ² Diaiwu faraón atuki sidadi naa raweki. Vino yudubiswu atū diaiwu copero idi. Pan yudubiswu

atū diaiwu panadero idi.³ Naskake dukuwene diaiwu faraón kexebistu awē pexe adu atu nichidi na cárcel mera ikawu adu. Nadu José ika idi.⁴ Na cárcel meradua atū diaiwawe José kexebadi na faraónna yuduxubis rawe. Nadu ipaudiwu.

⁵Coperoweta panaderopa na yabe wisti dabadiwu wetsa dabayaidu wetsari dabadi. Atū daba tapikuipaidiwu.⁶ Wenamari Joséuxū shinachakayaiwawe atu wichidi.⁷ Naskata atu ñukadi: "Aweskai matu wesu wetsa keskarame", atu wadi.

⁸Naskata: "Na nu dabawa duku tsuā yuitiruba", wadiwu. Josépa atu yuidi: "Dios wistichi batu yuitiru. Ea yuikawe", atu wadi.

⁹Naskata na diaiwu coperopa José yuidi: "Ewē dabapa ē uīya na ē wesuakiri iwi wibiya awē ade uva ē uīya¹⁰ texpaya tres ika. Naskata charuta naskatari wibiyawu uva ika.¹¹ Faraónpa awē kechu ē tsuba ika. Awē kechuki ē uvawu tsidia faraónpa ayanu", wadi.

¹²Josépa yuidi: "Naa texpaya tres naa tres peda.¹³ Ma tres peda ikadu faraónpa bia yudubaxiwi na mi yudupaudi adu. Awiana mi coperowawe mi atū diaiwu iwaidaka.¹⁴ Na ē bia yuiya ma sharadu diaiwu faraón ea yuixuxiwe ea ubisbanu ea tsekanu.¹⁵ Hebreo bai adua ea udediwu. ē cárcel mera itiruba etsi awa chakawaax", Josépa atu wadi.

¹⁶Panadero diaiwawe Josépa yuisharayaitu dikaxu naaturi awē daba yuidi: "Ewē dabapa ē uīya ewē bapu mamakaya tres shiwati pan wuspia ika.¹⁷ Shiwati reketada pan wetsa keskarawu shara ika diaiwu faraónna. Naskata shiwati reke adua ewē bapu adua peiyawawe pan piawu. Piyaiwawe ē uīya", panaderopa wadi.

¹⁸Josépa kebadi: "Naa tres shiwati naa tres peda.¹⁹ Ma tres peda ikadu faraón iwiki bia atu tedexbaxiwi. Bia xetewawe piixikadi", Josépa wadi.

²⁰Ma tres peda ikadu na kaīdi awē wari ikaidu faraónpa awē yudubisu kedabadi fiesta waaxikī. Yura ichapawawe uīyaiwudu panadero atū diaiwuya copero atū diaiwu cárcel meradua faraónpa atu tsekadi.²¹ Copero awiana yudubadi na yudupaudi

adu awiana yudunu faraónpa awẽ copa inanu.²² Naskaweke panadero atū diaiwu faraónpa atu retebadi. Na Josépa yuita keskawadiwu.²³ Naskax copero atū diaiwu José shinabakidi.

Faraónpa dabadi

41 ¹Diaiwu panadero ma dayabeadu aki wari rawe ma ikadu faraónpa dabadi. Awẽ dabapa uīya Nilo ede ketukunu dia uīdi. ²Naduxu uīya siete vaca sharakui xuakuiyawu ede meraduax wua keseme tsekeiniuwakata wasi piyaiwawe ē uīya. ³Naskata atu kachiuri siete vaca irabadawu chakawu tsekeaiwawe na vaca sharawuwe Atuwe diawu Nilo ketukunu uīdi. ⁴Vaca irabadawawe na vaca xuawu atu piyaiwawe ē uīya. Naskata faraón buiya. ⁵Naskata awiana uxakaixu dabadi awẽ dabapa uīya trigo dia wisti siete wibi ichapaya sharakui uidi. ⁶Kachiuri siete trigo newe xadawa tsasia tsekekata. ⁷Naa tsasiawawe siete trigo wibi ichapaya wuspikuiya piawu. Naskaidu faraón buinakawa uīya daaba idi.

⁸Peda wetsa wenamarikui buita shinachakadi dabawaxakī. Naskata na unakī tapiawu Egipto bai adu ikawu atu kedabadi. Naatiwi na Egipto aduawu aki wediwu. Ma weawudu awẽ daba atu yuidi. Awẽ daba
at uiyaitu na unabiswawe
yuitiruwuba idi.

⁹Naskake copero diaiwawe faraón yuidi: “Diaiwu ē chakakuibis. ¹⁰Diaiwū mi panadero atū diaiwu yawi dukuki sidakī mewē uibati rawe mi duku cárcel mera ikibayabea soldado atū diaiwawe duku kexenu. ¹¹Na yabe wisti panaderoweta nu dabayabea. Panaderopa dabayaídu ē dabayabea. ¹²Na cárcel meradua



© 1996 David C Cook

Génesis 41.9 adewe.



© 1996 David C Cook

Génesis 41.14 adewe.

pexku hebreopa soldadowawe atū diaiwū awē yuduxubistu nuku daba nu yuiyaitu naatu nuku daba duku yuita. ¹³Naatu duku yuita keskakuiyabea. Ewē yudu ē adu dasuwaidu wetsa reteyabeawu”, coperopa wadi.

¹⁴Naskake kushikui faraónpa José cárcel meradua kedabadi. Naskata testekata saweti shara saweadu faraón adu iyudiwu.

¹⁵Faraónpa dabawaa José ma uadu diaiwu faraónpa yuidi: “Na ē dabawaa tsuā ea yuiyaba. Ē dika wetsawawe dabake mi atu yuikī tapia”, faraónpa wadi.

¹⁶Naskaitu Josépa yuidi: “Ē bia yuitiruba. Naskaweke Diospa bia tapibatiru”, Josépa faraón wadi.

¹⁷Faraónpa José yuikī iskawadi: “Ewē dabapa ē uīya ede awē ade Nilo keseme ē dia ika. ¹⁸Siete vaca xuawu ede meradua tsekekata keseme mapeiniuwakata wasi piawu. ¹⁹Naskata atu kachiuri siete

vaca irabadakuiwu tsekeawu. Askarakai Egipto adua ē uibisba.

²⁰Nawuwawe na siete vacawu tsekei taeawu xuawu sharawu piawu. ²¹Xuawu piwiakadax naskara iwawaídawu. Naskata ē buipakekawada. ²²Naskata awiana ē dabawaa. ē uïya trigo dia wistiwiaxies awē puña trigo dia wisti siete wibi ichapaya sharakui ikawu. ²³Na kachiuri siete trigo newe xadawa tsasia tsekekata. ²⁴Na warī tsasiwaawawe na wibi pukūwawaída piawu. Naskawiax na unabiswu ē atu ñukawiyaitu tsuā ea yuiyaba”, faraónpa José wadi.

²⁵Naskata naa dikakī Josépa faraón yuidi: “Diaiwū ikükui naa mewē daba rawe na wisti. Diospa bia tapiba naskawaiadaka. ²⁶Na siete vaca xuawu trigowu awē wibi pukūwawaída shara naawu siete wari. Na daba wisti. ²⁷Na vaca irabadawu atu kachiuri tsekeawu naskatari trigo tsasiawu nawuri siete wari. Na siete wari wudinupukukadi.

²⁸Ewē diaiwu faraón na ē bia yuiya naskakui Epa Diospa anupukui. ²⁹Siete wari piti ichapa inupukui Egipto adu. ³⁰Naskatari siete wari ana trigo wuainupukuiba. Naskayaidu yurawu wudinupukukadi ana trigo ichapaba ikaidu. Egipto adua trigo ichapa ipaudi ana tsuā shinaxiwiba wuni daaxikadi. ³¹Naskayaidu ana ma piti ichapaya inupukuiba. Ana ipaudi keskara inupukuiba. ³²Ewē diaiwu faraón na mi dabakī rawe rawewaa naa Epa Diospa awē shina kushi aaxiwi.

³³Ewē diaiwu faraón dukuwede wetsa wedawe na awara shara akī tapita shinakī tapikuiya da bai Egipto adua. ³⁴Naskatari na pexe ichapa wisti rasi Egipto bai adua diaiwu wetsa whichinuwu. Yurawawe cinco chabiupu ma waawudu wisti pexe adu wanuwu siete wari pitiwu ichapa udiadu. ³⁵Ewē diaiwu faraónpa atu yuiyadu diaiwuwawe na pexe wisti adu trigo wanuwu naskakaxu pexe ichapadu ikawawe wudikakī pinupukunuwu. ³⁶Siete wari yurawu bai Egipto adu ikawawe wudikakī na pexe mera piti wanabea pinupukunuwu naskax yurawu wudi dayabanuwu”, Josépa faraón wadi.

Diaiwu faraónpa José diaiwuwadi

³⁷Diaiwu faraónpa awē yudubisuweta Josépa awē shina ikūira wadiwu. ³⁸Naskata diaiwu faraónpa awē uibatiwu atu

yuidi: “Da dukuwede keskara wania ana nu wichitiruba Diospa awē espírituya”, faraónpa atu wadi.

³⁹ Naskata faraónpa José yuidi: “Bia keskara tsuaba shinakī tapita unakī tapia. Nawu Diospa bia tapibada. ⁴⁰ Ewē pexe aduri mi atu yudui yurawawe bia ikūira wanuwu. Naskaweke ē mewē diaiwu datukui”, faraónpa José wadi. ⁴¹ Naskake faraónpa ana José yuidi: “Da bai Egipto aduxu ē bia diaiwuwai”, faraónpa wadi.

⁴² Naskata faraónpa awē biwi adua anillo tsekata José netabadi. Na sellopa faraón awē adeya na tapibadi faraón diaiwukui. Naskata saweti shara awē ade tela lino sawebata oro teuti awē texu adu sawebadi. ⁴³ Diaiwu faraónpa José caballo carro adu idabadi akachiuri kanu. Naskatari yurawu tsai ewapatu atu yuidi: “Ukiri xekekawe diaiwu nadu kanu”. Naskax José bai Egipto adua atū diaiwu idi. ⁴⁴ Naskata faraónpa yuidi: “Da bai Egipto adua ē diaiwukuiweke yurawawe bia ñukataba tsuā awa atiruba”, wadi.

⁴⁵ Faraónpa egipcio bai adua José adekī: “Safenat-panéah”, wadi. Naskata awīwu awē ade Asenat nawe José wianadi Potiferapa awē wakewe. Naa awīwawe apa sacerdote idi pexe ichapa On adua. Naskax José bai Egipto adua atū diaiwu idi.

⁴⁶ José treinta wari akax faraón ikaduax kadi yuduxukī taewadi bai Egipto aduxu. Josépa yuidi: “Ma ē kai”, wadi pexe ichapawu atu uīxikī aweskax ikawumaiki naari uīwuwawadi. ⁴⁷ Na siete waritii trigo ichapa kaīwadiwu bai Egipto aduxu. ⁴⁸ Siete wari ma ikadu na pexe ichapawu aria trigo atu wiāta chaibakidua atu wiāta Josépa wapaudi. ⁴⁹ Josépa trigo yurawu atu wibadi na bishputii keskara idi. Ichapanawāwu idi. Ichapa uīkī ana kedetiru idiba. Naskara uīkī Josépa ana kedediba.

⁵⁰ Yurawu wudiyuawubadu Josépa wake rawe adi awī Asenatweta. ⁵¹ “Diospa ea axuwaidu na ē ubiskuidi ea shinabakibada ewē kaiwuuri”. Naskake awē wake kaī taea adekī Manasés, wadi. ⁵² Na wake wetsa kaīya adekī Efraín, wadi: “Diospa ea wakeyawaba da bai aduax ē ubiskuidike”, José idi.

⁵³ Siete wari ata atū piti ichapa bai Egipto adua atu keyuxudi. ⁵⁴ Na Josépa atu yuidi keskai siete wari ma ikadu na baitiwi

wudi taediwu. Egipto adua yurawu tsuā wudidiba nadumai pitike. ⁵⁵Egipto bai adu ikawu wudi taekakī faraón trigo ñukakī taewadiwu. Naskayaiwawe faraónpa atu yuidi: “José adua witakawe. Naatu yuiyai keskatakawe”, wadi.

⁵⁶Bai Egipto adua wudikuiywudu Josépa pexe mera trigo wabiswu wepedi peiuxū yurawu atu inaxikī. Na pedatiwi yurawu wudipaudiwu. ⁵⁷Na baitiixu ikawawe yurawu bai Egipto adu wekaxu José peiuxū trigo wiyai wekadi wediwu atū bai ari ana pitiyabake.

Josépa awē uchiwu Egipto wudiwu

42

¹Jacobpa Egipto adu trigo dikakī awē wakewu yuidi:

“Aweskai awara wetsa ma apaibame. ²Egipto adu trigo ē dika Trigo witakawe Egipto adua wuni nu dayabanu”, atu wadi.

³Josépa awē udiwetsawu diez idi. Nawawe Egipto adua peiuxū trigo wii wudiwu. ⁴Jacobpa Benjamín nichikaspadi: “Josépa udiwetsa aweskaraikatiru”, raixu. ⁵Jacobpa awē ade wetsa Israel. Canaán ikawawe trigo wii wukadi wudiwu. Israelpa awē wakewaweri piti wii wudiwu. Canaán aduax wudiaiwudu.

⁶José bai Egipto adua diaiwu idi. Bai wetsaria weawu peiuxū atu trigo inapaudi. Naskaiwudu udiwetsawu Canaán aduax Egipto adu dukukata Josépa awē werutaiwi baikiri wepepakewuwādiwu. ⁷Josépa awē udiwetsawu atu unawiki atu uībisba keskara atu wadi. Sidayana atu ñukadi: “Ma wakiax uime”, Josépa atu waitu udiwetsawawe kebadiwu: “Nu Canaán aduax ui trigo peiuxū wiixikī”, wadiwu.



© 1996 David C Cook

Génesis 42.6 adewe.

⁸ Josépa awē udiwetsawu ma atu unaweke udiwetsawawe unadiwuba. ⁹Naskaiwudu Josépa na dabadi shinadi udiwetsawu udua. Josépa atu yuidi: “Ma duku uīyua wakiri tsuā kexeyabamaikixu”, Josépa atu wadi.

¹⁰Naskata kebadiwu: “Ewē diaiwu askaraba. Nuwu mewē uibatiwu nu trigo peiuxū wiya. ¹¹Nuku epa wistichi duku aka. Nu yura parabisba. Nu yura unatiwabisba”, José wadiwu.

¹²“Ē batu ikūira waiba. Wakiri tsuā kexeyabamaikixu ma uīyua”, Josépa atu wariawadi.

¹³Naskata udiwetsawawe kebadiwu: “Nu mewē uibatiwu nu doce nuku epa wistichi duku aka. Nu Canaán adu ika. Nuku chipuke nuku epawe netea. Wetsa ana duweba”, wadiwu.

¹⁴Naskaweke Josépa ana atu yuidi: “Na ē batu yuiyai ma unatiwabis. ¹⁵Ē batu uīnu ma unatiwabismaiki. Faraónuxū ē batu yuikui. Ma duduax kaiba matu extu uabadu. ¹⁶Watura wisti nichikawe matu extu iwitanu atiriwi cárcel mera neteyaiwudu. Nu tapinu na ma yuiya ikūmaiki. Ma chaniyabake ma duku unatiwabis. Ē faraónuxū batu yuikui”, Josépa atu wadi.

¹⁷Josépa udiwetsawu cárcel mera atu adi. Tres peda cárcel mera idiwu. ¹⁸Ma tres peda ikadu Josépa atu yuidi: “Ē Dioski besei. Na ē batu yuiyai keskaitu ma ipadaka. ¹⁹Ikūmaiki ma tsua parabisba watura wetsa ma dudu netei cárcel mera. Atiri wutakawe. Matu kaiwuu trigo wuxutakawe”, Josépa atu wadi.

²⁰Naskaweke matu extu ea iwixutakawe na ma yuiyai ikūmaiki. Naskax ma datiruba atu wadi.

²¹Awirasi yuinadiwu: “Ikūkui nu ubiskui nuku extu nu chakawadi uduax nu iskai. Ea iskawayabakawe ubiskuita siaiwiyaitu nu ubisbadiba”, ixu shinadiwu.

²²Naskata Rubén tsaidi: “Ma ē batu yuiwyaitu: ‘Nuku extu chakawayabakawe’, ē batu wawiyaitu ma dikadiba. Ikūkui nu ubiskui nuku extu nu chakawadixakī”, Rubénpa atu wadi.

²³Josépa atū tsai dikawiyaitu awē udiwetsawawe tapidiwuba. Naa atū tsai akai wetsā yuixuwudi. ²⁴Naskata atubakiduax

kata José siaidi. Naskata atu adu dasuta atu yuidi: “Simeón bedexkawe cárcel mera akawe uiyaiwudu”.

²⁵ Naskata Josépa atu yuidi trigo chabiupuki atu wuspiwaxunuwu. Trigo peiuxū wiāwu atū pei atu nasudiwu. Atū chabiupuki atu dadexupakediwu. Naskatari piwaítanuwu atu pití inadi. ²⁶ Naskata trigo atū asno mamakaya wakata naduax wudiuwu.

²⁷ Na uxaiwu aduxu da yabeta wistichi awē chabiupu wepeita awē asno pibapaikī awē pei wichidi. ²⁸ Naskata awē udiwetsawu atu yuidi: “Ewē pei ma ea ana waxuawu”, atu wadi. Naa uikadi ratediwu awirasi yuinadiwu: “Duku Diospa duku aweskawaime”, idiwu.

²⁹ Canaán adu dukukata atū apa na ikitawu apa Jacob yuidiwu: ³⁰ “Diaiwu Egipto adu ikatu sidakuiyana duku iskawaita: ‘Ma duku unatiwai ua’, duku waita. ³¹ Naskake nu kebaita: ‘Nu chaniba. Nu yura wadi unatiwabisba. ³² Nuku epa wistichi duku aka nu doce. Ana wetsa duweba. Nuku chipuke Canaán adu neteita nuku epawe’, nu waita.

³³ Naskata naa diaiwawe duku iskawaita: ‘Ikūmaiki ma chanibamaiki ē uīnu’, duku waita. ‘Matu udiwetsa wisti cárcel mera netei. Naskayaídu trigo matu kaiuu atu wuxutakawe. ³⁴ Matu udiwetsa chipuke ea iwixutakawe. Naskaxu chaniba ē batu wanu duku unatiwabisba ē batu ē wanu. Naskaxu matu udiwetsa cárcel meradua ē batu tsekaxutiru. Naskatari da bai adua ma sharata itiru’, duku waita”, apa wadiwu.

³⁵ Josépa udiwetsawawe trigo napapaikakī atū pei wichikadax apawe ratediwu. ³⁶ Naskata Jacobpa atu yuidi: “Maawawe ea ma wakeubawai. José ana duweba Simeónriwi. Benjamínri ea ma iyunapai. Ea ma ubiskuibabis”, atu wadi.



© 1996 David C Cook

Génesis 42.35 adewe.

³⁷Naskata Rubénpa apa yuidi: “Benjamín eaya nichewe. Ě kexesharaikai. Ě eweikai. Ě bia ewexuyabaitu ewē wake rawe mi retetiru”, apa wadi.

³⁸Naskata Jacobpa kebadi: “Ewē wake batuwe kaiba. Awē udiwetsa José ma dadi. Benjamín wisti ewe ika. Ma kaidu aweskarake. Ě shinabetsai datiru”, Jacob idi.

Benjamín bai Egípto adu iyudiwu

43 ¹Bai Canaán aduax yurawu wudiaiwudu. ²Egípto bai aduxu trigo weitawu ma keyuadu Jacobpa awē wakewu atu yuidi: “Awiana Egípto adu wukaxu trigo witakawe peiuxū”, Jacobpa atu wadi.

³Naskaweke Judápa kebadi: “Epā diaiwu Egípto aduatu duku yuikuita: ‘Matu chipuke ma eweyabake maariwi utiruba’, duku waita. ⁴Mi dukuya nuku extu nichiyaitu peiuxū nu trigo wikatiru. ⁵Askataba dukuya mi nichiyabaitu nu katiruba. Diaiwu Egípto adu ikatu duku yuikuita: ‘Matu extu eweyabax ma uñitiruba’, duku waita”, apa Jacob wadi.

⁶Naskake Israelpa yuidi: “Aweskai ma aduri ikitame. Aweskakī: ‘Nu extu wetsaya’, ma ikitame”, Israelpa atu wadi.

⁷Awē wake ranane kebadiwu: “Duku udua nuku kaiwu uduari ichapa duku ñukariwaita. ‘Matu epa dayuabame. Ma extu wetsayame’, duku waitu nu tapitaba duku yuiyaitu: ‘Matu extu ewetakawe’, duku waita”, wadiwu.

⁸Judápa awē apa Israelpa yuidi: “Nu dayupaiba dukuya Benjamín nichewe. Ě kexeikai. Naskax nu datiruba mi ikaidu nuwu nuku kaiwuuri. ⁹Ē bia yuikui. Ě kexesharaikai. Ě ana dudu eweyabaitu Benjamín aweskarake na uduax ē ubiskuipakedaka. ¹⁰Nu sabarakayabaitaxakī ma nu kai rawea ikerada”, Judápa apa Jacob wadi.

¹¹Naduri dikakī Israelpa yuidi: “Awara wetsakai nu atiruba. Nuku bai adua awara shara wuspiwakawe matu chabiupuki diaiwu Egípto adua wuxutaxikakī inakuitaxikakī. Bálsamo wukata mirra wuda wukata ini wetsa keskarawu wukata wibi kerexriwi nawu wuxutakawe. ¹²Pei



© 1996 David C Cook

Génesis 43.14 adewe.

rawe wuxutakawe na inata na batu inayabea. Tapixuba dadeyabea itiruki. ¹³ Matu extu iyutakawe na dukuwene uïnu. ¹⁴ Epa Dios bitsisipa axuwaidu na dukuwene batu ubisbanu matu extu cárcel meradua tsekanu. Benjamínriwi. Naskax ē wakebais iki”, Jacob idi.

¹⁵ Pei rawe wikata awarawu inaxikí Benjamín iyukata Egípto dukukata José adu iyudiwu Benjamín. ¹⁶ Naskadu Benjamín ariwi atuwe kaitu Josépa uïdi. Awē pexe adua awarawu kexebis yududi iskawadi: “Da dukuwedewu ewē pexe adu iyutakawe. Vaca retewe ē atu pibanu mananawari eweta pinuwu”, wadi.

¹⁷ Josépa yuiya keskawadi. Dukuwedewu Josépa pexe adu atu iyudiwu. ¹⁸ Josépa pexe adu atu iyuwaitu uïkadi ratekuidiwu. Iskadiwu: “Na peiuxú duku nasuitawu naawu uduax nu atú uibati iki duku achikadi nuku yuinawuya”, idiwu.

¹⁹ Pexe kaítí adu dukidiwu. Naskata Josépa awē pexe adua awarawu kexebis chaiba wukaxu awe tsaidiwu. ²⁰ Naskata yuidiwu: “Diaiwú wetsatiā peiuxú trigo nu wiwaítia. ²¹ Na nu uxai aduxu nuku chabiupu wepekí nuku pei nu wichita. Naa pei nu bia nasuiyuá. ²² Awiana nu pei nu wea trigo wiixikí. Nu tapiaba tsuãra nuku chabiupu mera nuku pei dadexuita”, Josépa awē udiwetsawawe wadiwu.

²³Na pexe adua awarawu kxebistu atu yuidi: “Rateyabakawe. Matu epa awē Diospa matu Diosri matu pei awiana matu chabiupu mera dadexuita. Na ma peiuxū inaita naa ma ē wiita”, atu wadi. Yuikī adaitita atuki Simeón ewedi.

²⁴Naskata Josépa awē pexe mera atu iyudi. Naskata atu ede wixudi atū tae chukanuwu. Atū asnowuri pibaxudi. ²⁵Naskaxu José badadiwu pexe meraxu mananawari naweta piixikakī. Naskata José awarawu kaxpa inaxikakī itipiniwadiwu.

²⁶Naskake José pexe adu dukuwaitu na weawu José inadiwu. Inakuikata baikiri wepexupakewuwādiwu. ²⁷Josépa atu ñukadi: “Ma sharame. Ma ea yuita matu epa adiwushta dayubame”, atu wadi.

²⁸Baikiri wepepaketuwakata kebadiwu: “Mewē uibati nuku epa shara iyua”, awē udiwetsawawe José wadiwu.

²⁹Awē extu Benjamín apaweta awa na rawe aka idi Josépa uīkī naskake atu ñukadi: “Daame matu extu ma ea yuita. Bia Epa Dios sharawapainu”, Josépa wadi.

³⁰Josépa awē extu uī idibayana ana siaikī tedetiru idiba. Naskata awē kede mera kata siaidi. ³¹Ma siaita wechukubedi. Naskata kaīta: “Atu piti inakawe”, Josépa awē uibatiwu wadi.

³²José mesa wetsa aduxu pinu inadiwu. Egipciowawe mesa wetsa aduxuri pinuwu inadiwu. José awē udiwetsawu mesa wetsa aduxuri pinuwu inadiwu. Egipciowawe hebreowuweta pitiruwuba idi: “Nu atuweta piax nu chakatiru”, ikaxu egipciowawe shinadiwu. ³³Josépa atu yuiya na iyua tsaubakī taewadiwu akachiuri wetsa tsaubadi wetsari tsaubadiwu. Naatu askawawudiu. Chipukui chipuke tsaubadiwu. Wetsa keskarakata uīnanadiwu. ³⁴Josépa awē uchiwu atu pibadi awē mesaduxu. Awē chipuke Benjamín ewapakui inata udiwetsawu askawadiba. Atuweta ayai José idibakuidi.

Josépa kechu sharakui

44 ¹Naskata Josépa awē pexe adua awarawu kxebebis yuidi: “Na dukuwedewawe atū chabiupu mera trigō wuspiwaxuwe. Naskatari atū pei chabiupu mera wisti rasi

dadexupakewe.² Naskatari ewē kechu sharakui[”] atū chipuke Benjamín awē chabiupu mera dadexuwe awē peiri nauxū piti wia”.

Awē pexe adua awarawu kxebistu na Josépa yuiya keskawadi.³ Peda wetsa wenamarikui Josépa awē udiwetsawu atū asnowuya wutanuwu yuidi atū bai adu.⁴ Pexe ichapaduax chaiba kaŷaiwudu Josépa awē pexe adua awarawu kxebis yuidi: “Na dukuwedewu wuwaiwu atu beewaŷta duduri atu yuitawe: ‘Nu batu sharawawiake ma duku chakawaa.⁵ Aweskai ma kechu sharakui ma uneame. Ewē diaiwū naa kechū ayata unabis. Naa ma iskaita chakakui’, atu watawe”, awē pexe adua awarawu kxebis wadi.

⁶Naskata atuki dukuta atu yuidi. Na Josépa yuiyadurikui yuidi. ⁷Nawawe kebadiwu: “Diaiwū aweskakī duduri mia duku yuime”, wadiwu. “Nu askabisba.⁸ Canaán aduax nu dasuita. Duku chabiupu meradua nuku pei nu wichita. Nu bia dasuiyui. Aweskawaxikītsi nu mewē diaiwu pei oro nu unenatiruba.⁹ Watura wetsa awē chabiupu meradua mi kechu wichixu naa mi retetiru. Nuwu mewē diaiwū awē uibati ipadaka”, Josépa awē udiwetsawawe wadiwu.

¹⁰Naskata Josépa awē pexe adua awarawu kxebistu atu yuidi: “Na ma yuiyai keskara inu. Naskake na kechu ewē diaiwu wēa naa ewē uibati iki. Atiriwi aweskawuba nawu wukadi”, Josépa awē pexe adu kxebistu atu wadi.

¹¹Nawuwawe atū chabiupuwu wutubakata wepediwu.¹² Pexe adua awarawu kxebis atū chabiupu atu wepenapakedi. Atū iyua wepenakī taewadi chipukui atū chipuke wepenadi. Benjamín awē chabiupu meradua Josépa kechu wichidi.¹³ Naskata awē udiwetsawu rateyana atū saweti waxtediwu. Nu ubiskui raikaxu shinadiwu. Atū asno mamakaya chabiupu wakata pexe ichapa adu dasudiwu.

¹⁴Judá awē udiwetsawuwe Josépa awē pexe adu dukuwaiwudu José nadu idi. Baikiri wepexudiwu atū wemanane.¹⁵ Josépa atu

^v 44.2 Pei ichapauxū kechu shara nu witiru. Nawa adea copa de plata.

yuidi: “Ma awa aweskawaame. Ma tapiabame na dukuwede ea keskara unakī tapia”, atu wadi.

¹⁶Judápa kebadi: “Diaiwū awa nu bia kebatirume.

Aweskawaxu nu bia tapibatiruba nu awara chakawabisba. Diospa nuku chaka duduixu duku whichia. Datiā mewē uibatiwu nu iki na mewē kechu bia uneawe”, Judápa José wadi.

¹⁷Naskaiwawe Josépa atu yuidi: “Aweskaxkai ē askatiruba.

Ewē kechu shara ea unewaīda da wisti ewē uibati iki. Ewē uibati ē batu wadakaba. Atiriwi matu apā pexe adu wutiruwu. Tsuā batu wekaxtiwaaba”, atu Josépa wadi.

“Diaiwū ewē extu apa ari dasubawe”, Judápa José ñukadi

¹⁸Naskata Judá José adu kaxu yuidi: “Ewē diaiwū mi diaiwukui mi faraón keskarakui. Naskaxu ea dikawe ē bewe tsaipai tsuā dikayabaidu. Iki sidayabawe. ¹⁹‘Ma epayame’, mia duku waitu nu bia yuita. Naskatari: ‘Ma extu wetsayame’, mia duku waita.

²⁰Diaiwū nu bia kebaita: ‘Nuku epa adiwu. Nuku extu chipuke pexku. Nuku epa adiwuxu nuku chipuke adi’. Naskatari nu bia yuita: ‘Nuku epā nuku extu duikuibis’, nu bia waita. ‘Awa wistichi aka awē wake rawe. Naskake nuku epā duikui ma wetsa ma dadiadu’. ²¹Naskatari nuku extu mi tapipaixikī: ‘Iwitakawe’, mia duku waita. ²²Nu bia yuiyabea: ‘Apā a wake nichitiruba. Awē wake nichiax datiru’, nu bia wayabea. ²³Naskake: ‘Mantu extu ma eweyabaitu ana ma ea uītiruba’, mia duku waita.

²⁴Na mia duku yuitaduri nuku epa nu yuita. ²⁵Ma sabarakadu nuku epa duku yuita: ‘Awiana peiuxū trigo witakawe duku wayabea’. ²⁶Nuku epa nu kebayabea: ‘Nuku extu chipuke dukuwe kayabaitu nu kaiba. Nu kawiyax diaiwu ikadu nu uītiruba’.

²⁷Nuku epa duku yuiyabea: ‘Ma ma tapia ewē awīweta wake rawe nu adi’, nuku epā duku wayabea. ²⁸‘Ewē wake rawe adi. Wisti ebakiduax ma kaa. Ana uībisba. Iskaraba ē uīkī xatedi. Yuina dii mera ikatu ma pidi. ²⁹Dariwi ea ma iyuadu aweskarake na uduax ē shinabetsai ē datiru’.

³⁰Nuku extu duwe dasuyabaitu nuku epa shinabetsai ubiskuitiru naamai duikuikī. ³¹Duku uduax awē wake nu iyuyabaitu nuku epa adiwushta awē shinabetsai datiru awē wake Benjamín uīyabai. ³²Duduri ewē epa ē yuita: ‘Da wake ē kexesharakuikai’, ē waita. ‘Na ē yuiyai ē askaikai’. Naskatari: ‘Ewe dasuyabaitu na awara aweskarawu naa ewena iki’. ³³Naskake ē bia yui ewē extu ataba ē mewē uibati inu. Udiwetsawuwe katanu nichewe. ³⁴Benjamínbais ewē epaki ē dasutiruba da wake ewe kayabaitu. Naskatari ewē epa ubiskuiyaitu ē uīpaiba”, Judápa José wadi.

Josépa udiwetsawu unabadi

45 ¹Josépa ana tedetiruba beekī awē uibatiwu atu yuidi: “Naduax tsekeyunuwu”. Awē udiwetsawu tapibaidu awē yudubiswu adu tsua idiba.

²Naskata José siaikaitu Egipto ikawawe dikadiwu. Diaiwu faraónpari dikadi. ³Josépa awē udiwetsawu atu yuidi: “É José. Ewē



© 1996 David C Cook

Génesis 45.3 adewe.

epa dayuabame”, atu waitu ratekuiyana kebadiwuba. ⁴Naskata Josépa atu ubisbayana: “Dirishara wekawe”, atu wata. Ma aki weawudu atu yuidi: “É José matu udiwetsa peiuxū Egipto ikawu ma ea atu inadi. ⁵Naskake bawirasi ‘Mi idí’, ma watanaki peiuxū ea ma atu inadi. Dios ea rewü nichidi yura ichapa uduax é rawanainu. ⁶Ma wari rawe dudua yurawu wudiawu. Cinco wari iyuaba ma trigo wadawiawu tsua awa wixiwiba. ⁷Ma uyuabodu Epa Dios ea rewü nichidi batu uduax é rawanainu. Ma wudiyabanu matu kaiwuunuax ichapanawā kaipakedakawu dayabanuwu. ⁸Ea ma nichidiba. Epa Dios ea dudu nichidi. Naatu ea axuwaidu é faraónpa awē tapibabis. Naatu ea yuiyadu Egipto bai adu é atū yudua. ⁹Wukata duduri ewē epa yuitakawe: ‘Mewē wake José iskaratiā Epa Dios Egipto adu diaiwuwaawaa ewē epa ea waxutakawe kushi ea uīyunu sabarakayabanu. ¹⁰Naskax na bai Gosen adu ma itiru mewē wakewuri mewē wawawuri mewē yuinawuri mewē awarawuya ma utiru. Naskaxu é ika chaiba ma itiru. ¹¹É duduxu batu piti inaxiwi bia inata mewē kaiwuuri na mewē ikawuriwi awa ma yupayabanu. Cinco wari yurawu wudixikadi’”, Josépa awē udiwetsawu atu wadi. ¹²Josépa awiana atu yuidi: “Ewē extu Benjamínweta maawawe uīyaidu é yui. ¹³É udua ewē epa yuitakawe Egipto adua é diaiwu. Naskatari na ma uīyawu yuitakawe. Ewē epa kushi unu”, Josépa atu wadi.

¹⁴Josépa Benjamín pishkuxu siaikidi. Benjamínri siaidi.

¹⁵Naskata José awē uchiwu atū tabuki tsu adi. Atu pishkuxu siaikidi. Udiwetsawawe ana beseckataba tsai adiwu.

¹⁶Josépa awē uchiwu Egipto adu dukuawu dikai faraón awē yudubisuwe idibadiwu. ¹⁷Faraónpa José yuidi: “Atū yuina mamakaya awarawu wakata bai Canaán adu wutanuwu. Dadekata awē udiwetsawu Canaán adu dasunuwu. ¹⁸Naskatari matu epa ea ewexukawe awē kaiwuuriwi. Da bai Egipto adua bai sharakui é atu inanu. Naskatari na bai Egipto yudu udia piixinuwu. ¹⁹Egipto adua caballo carroya wukata atū wakewu iwikata atū awī iwitanuwu. Naskatari matu epa ewenuwu atu yuiwe. ²⁰Atū awarawu wawerādaiwu shinachakayabanuwu da bai Egipto adua awara shara atuna iixiwi”, Faraónpa José wadi.

²¹Naa faraónpa atu yuiya keskawadiwu Israel wakewawe. Josépa atu caballo carroyawu inata atu piti inadi wukakī piwañtanuwu. ²²Saweti weda atu inadi sawenuwu wisti rasi. Naskatari Benjamín trescientos pei sapa cinco saweti inadi. ²³Diez asno awē padu mamakaya trigo piti wetsawuriwi pan ukī piwunuwu atu inadi. Diez asno wede mamakaya Egipto adua piti sharawu apa wubadi.

²⁴Josépa nichiyana atu yuidi: “Wukadi ma chakanawatanawukiki”. ²⁵Egipto aduax Canaán adu wudiwu. Atū apā awē ade Jacob ikadu dukudiu. ²⁶Ma dukukata yuidiwu: “José daaba. Egipto bai adua atū diaiwu”, Jacob waiwawe awe itaba atu ikūira wadiba. ²⁷Josépa atu yuita apa yuidiwu. Naskata Josépa caballo carroya keskara wubaita uī Jacob idibakuidi.

²⁸Naskata Jacob iskadi: “Ea yuiyawu ewē wake José dayuaba. Dayuxuba ewē wake ē uīkai”, Jacob idi.

Jacob Egipto bai adu kadi

46 ¹Jacob ade raweya ipaudi. Awē ade wetsa Israel. Israel awē awarawuya Beerseba adu ma dukuxu apa Isaacna awē Dios ruwe petsaidaxu awara shara inadi. ²Naa yabeta Dioswe Israel tsaidi awē dabapa: “Jacob. Jacob”, Epa Dios waitu Jacobpa kebadi: “Ē dudu”, wadi.

³Naskaxu Epa Diospa yuidi: “Ē mewē epā awē Dios. Egipto adu kapai beseyabawe. Narixu na mewē kaiwuu uduax ichapanawā kaipakexanuwu ē atu wanupukui. ⁴Egipto mi kaitu ē bewe kaaxiwi. Naduxu mewē kaiwuunuaichapanawā kaipakedakawu ē atu dasubanupukui. Naskatari ma mi daidu Josépa bia uīnupukui”, Diospa Jacob wadi.

⁵Naskata Beerseba aduax Israel kadi. Awē wakewawe caballo carroya adu dadediwu. Atū wakewuri dadekata atū awīwuri dadediwu. Na caballo carroya faraónpa atu wubaitatu wudiwu.

⁶Jacob awē kaiwuuya Egipto adu wudiwu. Naskatari awē vacawuya wukata awē ovejawuyari atū awarawuya Canaán

aduax wudiwu. ⁷Awẽ wakewu awẽ wedawu awẽ wawawu nawu Jacobwe wudiwu.

⁸Daawu Israelpa awẽ wakewu awẽ kaiwuunuax ichapanawã kaipakedakawu Egípto adu wudiwu. Naskatari atū adewu. Jacobpa awẽ wake iyua Rubén. ⁹Rubénpa awẽ wakewu Hanoc Falú Hesrón Carmí.

¹⁰Simeónpa awẽ wakewu Jemuel Jamín Óhad Jaquín Sóhar Saúl cananea awa.

¹¹Levípa awẽ wakewu Guersón Quehat Merarí.

¹²Judápa awẽ wakewu Er Onán Selá Fares Zérah. Erwe Onán bai Canaán aduax dadiwu. Fares awẽ wakewu Hesrón Hamul.

¹³Isacarpa awẽ wakewu Tolá Puvá Job Simrón.

¹⁴Zabulón awẽ wakewu Séred Elón Jahleel.

¹⁵Nawu Líaweta Jacobpa atū wakewu. Padán-aram aduax kaidiwu. Atū wake xutukuwake naduax kaídi. Awẽ ade Dina idi. Naatiawi atū wakewu dukuwedewu xutukuwake treinta y tres idi.

¹⁶Gad awẽ wakewu Sefón Haguí Esbón Suní Erí Arodí Arelí.

¹⁷Aserpa awẽ wakewu Imná Isvá Isví Beriá. Beriá atū chiku awẽ ade Sérah. Beriápa awẽ wakewu Héber Malquiel.

¹⁸Nawu Jacobweta Zilpá atū wake adiwu. Apa Labánpa awẽ wake Lía awẽ uibati awẽ ade Zilpá inadi. Jacobweta Zilpá awẽ wakewu naatiawi dieciséis idi.

¹⁹Naska Jacobpa awẽ awī Raquel awẽ wake rawe idi. Iyuatu awẽ ade José. Chipuketu awẽ ade Benjamín.

²⁰Josépa awẽ awī Asenat awẽ wakewu kaídi. Atū ade Manasés Efraín. Naa rawe Egípto aduax kaidiwu. Josépa awī Asenat awẽ apa Potifera. Naatu awẽ yurawu pexe ichapa On adua atū sacerdote ipaudi.

²¹Benjamín awẽ wakewu Bela Béquer Asbel Guerá Naamán Ehi Ros Mupim Hupim Ard idi.

²²Nawu Jacobweta Raquelpa awẽ wakewu catorce idi.

²³Danpa awẽ wake Husim.

²⁴Neftalípa awẽ wakewu Jahseel Guní Jezer Silem idi.

²⁵Jacobweta Bilhá awẽ wakewu adi. Na Bilhá Labánpa awẽ uibati ipaudi. Labánpa awẽ wake Raquel inadi. Jacobweta Bilhá atū wake siete idi.

²⁶Jacobpa kaiwuutiis sesenta y seis idi nawu Egipto adu dukudiwu. Awē wakewawe atū awīwu tsuā tanawadiba. ²⁷Josépa awē wake rawe Egipto aduax kaīdiwu. Jacobpa awē kaiwu setenta Egipto adu dukudiwu.

²⁸Jacobpa Judá rewu nichidi Gosen adu José apa Israelki dukuyunu. Gosen adu ma dukuawudu ²⁹Josépa atu yuidi caballo carroya itipiniwaxunuwa apaki dukui kanu. Apaki dukuxu tebespaxu siaikī wena dishpadiba. ³⁰Naskata Jacobpa awē wake José yuidi: “Ma ē biawichia. Mi dayuaba. Ma ē bia uīyax ē dai”, Israelpa awē wake José wadi.

³¹Josépa awē udiwetsawu atu yuita apā awē kaiwuuri atu yuidi: “Ewē diaiwu faraón adu kaxu tsai ē yuitanu: ‘Ewē udiwetsawu ma dukuawu ewē epā awē kaiwuuri. Ma Canaán aduax weawu. Duwe iki weawu. ³²Atū yuina idawuya ovejawu vacawu atū awarawuri nawuya weawu. Atū yudu yuina kexekata yuina kaīwata vacawu kaīwabiswu’, ē watanu. ³³Naskata faraónpa batu kedaxu ñukayaitu: ‘Awa ma yudubisme’, batu waitu ³⁴duduri wisti ma yuitiru: ‘Nuku xidiwawe apaudi keskawakī nu oveja kaīwabis’, ma watiru. Naskax bai Gosen adu ma itiru. Egipto adu ikawawe oveja kaīwabiswu atuwe ipaitiruwuba”, Josépa atu wadi.

47 ¹Josépa faraón yui kai kadi. Canaán aduax awē apawe udiwetsawu Gosen adu dukuawuadu duduri yuidi: “Ewē epawe ewē udiwetsawewe atū vacawu wekata atū ovejawuya atū awarawu ma weawu”, Josépa faraón wadi. ²Josépa faraón adu awē udiwetsa cinco atu iyudi atu tapinu. ³Ma weawudu faraónpa atu ñukadi: “Awa ma yudubisme”, atu waitu kebadiuw:



© 1996 David C Cook

Génesis 46.29 adewe.

“Nuku diaiwū nuuwawe oveja nu kexebis nuku xidiwawe apaudiwu keskawakī. ⁴Da bai adu nu ikiyua Canaán adu ana pitiyabake. Naskatari ana ari wasiba ovejawawe pipana. Nuku diaiwū bai Gosen adu duku ibawe”, wadiwu.

⁵Naskata faraónpa José yuidi: “Mewē epa ikaidu mewē udiwetsawu bewe iki weawu. ⁶Da bai Egipto adu atu ibawe na bai awē ade Gosen. Bai shara atiri askaraba. Nadu sharakui. Naskatari dukuwede nadua vaca kexekī tapia wetsā ea kexemaxuwe”, faraónpa José wadi.

⁷Josépa apa Jacob faraón adu iyudi. Naskata Jacobpa diaiwū ma ē dukua duiyana faraón wadi. ⁸Faraónpa Jacob ñukadi: “Awetii mewē warime”, wadi.

⁹Faraónpa awē wari ñukaitu Jacobpa kebadi: “Ewē wari ciento treinta. Na baitiixu ē kawa kawakakañtiadi. Ewē xidiwawe atū wari ichapa ipaudiwu. Naskaweke na wari ichapabawiax ē ubiskuipaudi”, Jacob idi.

¹⁰Naskata Jacob faraónpa awē pexe aduax tsekekaita kadi. ¹¹Egipto bai adu Josépa bai sharakui atu inadi nadu inuwu. Diaiwu faraónpa yuita keskadi. Naskakadax bai Ramsés nadu idiwu. ¹²Naskatari Josépa awē kaiwuutii piti ñukaiwawe atu inata na wake ichapayatii piti ichapa inapaudi. Na wake ichapabaya ichapaba inapaudi.

Josépa naatiwi atu piti inadi ma wudikuiyaiwudu pexe adu wabixakī

¹³Egipto bai adu piti keyuta Canaán adu ana piti idiba. Naskayaídu na pedatiwi yurawawe awa pipaudiwuba. Yurawu wuni dapaudiwu. ¹⁴Egipto adu ikawawe trigo peiuxū wipaudiwu.



© 1996 David C Cook

Génesis 47.7 adewe.

Canaán ikawaweri peiuxū wipaudiwu. Na peiwu diaiwu faraónpa pexe adu Josépa wadi. ¹⁵Egipto ikawuwe bai Canaán ikawawe ana peiyakadaxba José yui wukadi wudiwu: “Ana nu peiyaba. Duku piti inawe. Wuni daa sharaba”, wadiwu.

¹⁶Naskata Josépa atu kebadi: “Ana ma peiyabaki ea matu yuinawu ea wexutakawe nawuxū ē batu trigo inanu”, atu wadi.

¹⁷Egipto bai adu ikawawe caballowu ovejawu vacawu asnowu nawu José wuxukata Josépa wari wisti atu trigo inapaudi.

¹⁸Ma wari wisti ikadu wari wetsa José yui wukadi wudiwu: “Nu bia paraiba ana nu peiyaba. Naskatari ana nu awayaba. Nu bia inapano. Nuku bai wisti ita nuku kaya wisti. ¹⁹Duku peiuxū wiwe nuku bairiwi nauxū trigo duku inaxikī. Faraónpa awē uibati nu inu. Naskatari awē bai adu nu yuduxunu na mia duku exe inayai. Aweskake duku mia wuni dabatirume nuku kaiwuuya”, wadiwu.

²⁰Naskaxu Josépa faraón bai peiuxū wixudi Egipto adu ikawuna. Wudikuikakī José atū bai inadiwu. Naskata naa baiwu faraónna idi. ²¹Na yurawu Egipto adu ikawu faraónpa awē uibatiwu idiwu. ²²Sacerdotewawe atū bai Josépa peiuxū wīadiba faraónpamai atu piti ichapa inayaitu. Naskake sacerdotewawe atū bai peiuxū inadiwuba.

²³Naskata Josépa yurawu atu yuidi: “Datiā ma ikadu naa bai faraónna. ē bai peiuxū wixua. Da trigo exe matu wai adu wadakawe. ²⁴Naskaweke faraón naamai iwuke ma trigo cinco chabiupu wikata wisti diaiwu faraón ma inanupukui. Naskatari cuatro chabiupu batuna iixiwi. Atiriwi wai adu ma wadaxiwi. Nari matu piti ita matu wakena iixiwi”, Josépa atu wadi.

²⁵Nawawe kebadiwu: “Mi dukuki shara. Nu wuni dayabanu mi duku uduax rawanaika. Naskake nuwu faraón awē uibatiwu nu iki”, José wadiwu.

²⁶Faraónpa awē tsai bitsisipa Egipto bai adua naskanuwu Josépa atu yuidi Iskaratiāri naskara: Chabiupu wakaxu wisti faraón inakawe. Sacerdotewawe faraón peiuxū inadiwuba. Naskake sacerdotewawe atū bai faraónna idiba.

Jacobpa ana atu tsai yuixakība atu tsai yuikī wisti wadi

²⁷Israelitawu bai kawashara Gosen adu idiwu bai Egipto adu. Narduax baiyakata ichadiwu. ²⁸Egipto adu Jacob diecisiete wari idi. Ma aki ciento cuarenta y siete wari ma aki ika idi.

²⁹Israelpa awē yura beekī ma dayaxakī naskaxu awē wake José kedabaxu yuidi: “Mi ea duikuimaiki mewē biwi ewē kishi nunamari wawe ea yuikuiwe na ē bia yuiyai ea axuyaxawe. Da bai Egipto adu ea baiwayabawe. ³⁰Ma ē daadu Egipto aduxu ewē xidiwadu adu ea iyuyaxawe atuya ea baiwayaxakī”, Israelpa José wadi. “Na mia yuiyai keska ē bia waaxiwi”, Josépa wadi.

³¹“Ea yuikuiwe”, apā wariawaitu Josépa yuikuidi. Naskax Israel rakapakekawāta awē uxatiru aduax baikiri wepepakekawādi. Naduxu Dios idibaxudi.

Josépa awē wake rawe Jacobpa atu tsai shara yuidi

48 ¹Apa isinikaitu ma awetiira peda ikadu José yuidiwu. Naskata Josépa uī kai kadi. Awē wake rawe iyudi Manasésya Efraín. ²Awē wake José yuiyawudu ma uwaidu Jacob rakawiax widinakawata tsaudi.

³Jacobpa José yuidi: “Bai Canaán pexe ichapa Betel awē ade wetsa Luz nadu iki Epa Dios bitsisipakui dukudi. Naduxu ea tsai shara ea yuidi. ⁴Iskara tsaima ea yuidi: ‘Mi wake ichapaya ita mewē kaiwuu uduax ichapanawā kaipakedakawuya mi inupukui. Naskatari nawu uduax xuku ichapa wetsa keskarawu. Da bai batunawu ipadaka’. ⁵Ē biki dukuabadu daa bai adu mewē wake rawe Efraínwe Manasés Egipto aduax kaīdiwu. Naa rawe na ē Rubén Simeón atu ē aka keskara. ⁶Na mi chipu wake akawu naawu mewena iixikadi. Nawuwaweri awarawu wixikadi atū uchiwuuxū. ⁷Padánaram aduax ē dasuwaidu mewē ewa dadi bai Canaán adu pexe ichapa awē ade Efrata chaibakiduax. Naskatari Canaán bai adu ē baiwadi Efrata awē wai tapiadu awē ade wetsa Belén”, Jacobpa wadi.

⁸Josépa awē wake rawe uīkī Israelpa José ūukadi: “Da wake rawe tsuame”, wadi.

⁹“Da wake rawe Egipto aduxu ē atu aka”, Josépa apa wadi. Jacobpa awē xuta rawe atu duiyana: “Dirishara wekawe ē batu tsai shara inanu”, atu wadi.

¹⁰Israel adiwushta idi ana uītiru idiba. José awē wake rawe eweadu apa Jacobpa pishkuwai atu tsu adi. ¹¹Naskata apā José yuidi: “‘Ana ē uīdakaba’, ē bia waidu Epa Dios ea uībada mewē wake raweya”, Jacobpa wadi.

¹²Naskata José apā ratuku adua awē wake rawe iwita baikiri wepepakekawā Dios idibaxudi. ¹³Naskata awē wake rawe metsudi Efraín awē bibiyauri Manasés awē bibibauri. Naskata apa aduax kadi. Apa Israelpa awē bibiyauri Manasés wadi awē bibibauri Efraín wadi. ¹⁴Israelpa awē puña rawe kuyaxu awē xuta rawe mamadi. Awē biwi bibiyauri awē xuta chipuke Efraín awē bapu mamadi awē biwi bibibauxuri awē xuta iyua awē bapu Manasés mamadi. Naskaweke Manasés iyua. ¹⁵Naskata José tsai iskaratu yuidi:

“Ewē xuta Abrahamnu ewē epa Isaacnu ikūira wapaudiwu
Epa Dios.

Naatu ē kaīyadu ea kexekī taewadi.

¹⁶Na ángelpa ewē chaka sharawaxua da pexku rawe atu
sharawaxinu.

Ewē ade shinapakexanuwu atuuxū
ewē epa Abrahamuxū Isaacuxūri.

Nawu uduax ichapakexanuwu na baitiixu ipaxanuwu”, wadi.

¹⁷Jacobpa Efraín mamayaitu uīkī Josépa duidiba. Naskaxu apā biwi wiyata Efraín bapu adua wita Manasés mamabapaidi.

¹⁸Naskata yuidi: “Epashtā aaba. Da iyua mamawe”, Josépa apa wadi.

¹⁹Apā kebadi: “Ma ē tapia. Ma ē tapia. Dariwi atū diaiwukui idaka. Naskaweke awē chipuketu iyua winuxiwi. Awē kaiwuunuax ichapanawā kaīpakedakawu ichapa inupukukadi”, Jacobpa José wadi.

²⁰Naa pedata tsai shara atu yuikī iskawadi: “Israel ikawawe matu adeuxū atu iskawapadakawu. ‘Efraínwe Manasés Epa Dios

atu sharawadi keskawakī batu wapainu', wapadakawu".²¹ Ma atu yuita Israelpa José iskawadi: "É sababa dai. Naskaweke Dios batuwe inupukui. Naatu matu xidiwu atū bai adu batu dasubanupukui.²² É bia awara inai mewē uchiwu ē atu inabisba. Bai Siquem aduxu ē amorreowu ē retexu wiādi naa ē bia inai mimai atu winuke", Jacobpa awē wake José wadi.

Jacobpa awē wakewu atu tsai shara yuidi

49

¹ Jacobpa awē wakewu kedata atu yuidi: "Iki wekawe ē batu yuinu na ma inupukuwai.

² Iki wekawe ewē wakewawe.

Matu epa Israel dikakawe.

³ Rubén mi ewē wake iyua.

É bitsisipadu mi kaī taedi.

Naatiiwixu miū duiyawu. Mi bitsisipa.

⁴ Ea mia sidanabadi ewē awī wetsawe mi idi.

Naskake ana mi bitsisipaba. Mewē extuwu ana mi winuuba.

Na mi edewai keskara ana bia tsuā kayakawiwatiruba.

⁵ Simeónwe awē udiwetsa Leví

atū espadapa atu retepaiyaiwu.

⁶ É atuwe ichanapaitiruba

naa rawetamai sidakakī yurawu retekata
baitsikui vacawu uxtediuw.

⁷ Ma sidabis. Ma chakakuiwu. Ma tsua ubisbabisba.

Naskake ē batu paxkanawai Israelpa awē bai aduxu.

⁸ Judá bia idimaxuxikadi mewē udiwetsawawe.

Bia duikaspabiswu mi atu winupakedaka.

Naskatari mewē udiwetsawawe mewē werutaiwi bia
baikiri wepexupakewuwaxikadi.

- ⁹ Ewē wake Judá
leónpa awē wake keskara.
Ma dabi pita rakake
tsuā wekaxtiwatiruba keskara.
- ¹⁰ Judá diaiwiadu tsuākai awē bitsisipa wiādakaba
diaiwi datukui yurawawe ikūira wanupukukadi
uyuabadu.
- ¹¹ Uva wadaki awē burro nadu dexata
uvapa awē ene awē saweti patsatiru.
- ¹² Awē weru rawe wisukui na vino keskara.
Awē xeta uxukui daiweru keskara.
- ¹³ Zabulón enewa ketukunu inupukui.
Nadu xaxuwawu inupukukadi.
Nadua Sidón adu dukutiru inupukui.
- ¹⁴ Isacar na mi burro bitsisipakui keskara
awē chabiupu raweki nexpakaya waax aki raka.
- ¹⁵ Bai shara uīta tedetirupinishara mi uīdi.
Naduxu uibatiwawe atū yudu mi yudunupukui
mi katīta awarawu wuuxikī.
- ¹⁶ Danpa awē kaiwuu atū diaiwi iwaidaka.
Jacob Israelpa atū wakewawewe atu ixuwai keskai.
- ¹⁷ Dan rudu keskara
wai keseme badixu
yura caballopa kaidu awē taxuki chachiadu
ana aū katiruba.
Naskara mi inupukui.
- ¹⁸ Diaiwu Dios ē bia badai ē udua mi rawanainu.
- ¹⁹ Gad yura ichapawawe retepakedakawu.
Naskawaiwawe espadayaxu atu retepakedaka.

²⁰ Aser piti ichapaya inupukui.

Diaiwawewe piti sharakui pipaitiruwu atu inanupukui.

²¹ Neftalí na chaxu keskara na kapaiyaidu katiru.

Wake sharaya.

²² José uva iwi ede ketukunu dia keskara.

Awē uva wibi ichapaya shara itiru keskara.

Awē puñawawe pexe weputiru keskara.

²³ Piyawawewe José duikaspakata

piakata wekaxtiwakadi.

²⁴ José bia tsuā aweskawatiruba. Yura chakawawe bia
aweskawatiruba.

Aichu Epa Dios bitsisipakui na mi oveja kexebis keskara
mia duku kexea. Jacobpa awē Dios.

²⁵ Aichu mewē epa awē Dios naatu bia axunupukui.

Dios bitsisipa naatu awara atirutu sharakui bia
inanupukui.

Dios ikaduxu sharawata

bai aduxuri bia sharawata

mewē wakewu atū awā wake kāibanupukui atu awē xuba
abanupukui.

²⁶ Mewē epā bia awara sharawu ina winubata. Ewē epawawewe
ea askawadiwuba.

Naa awara sharawu Josépa awē bapu adu ipadaka.

Mewē udiwetsawu adua Epa Dios bia kañawadi.

²⁷ Ewē wake Benjamín lobo keskara

na awara retexu wenamari pita

ñatapake na texea atu akītiru”, awē wakewu Jacobpa atu
wadi.

²⁸ Nawu Jacobpa wakewu docewu. Nawu apa Israelpa tsai
shara inapakekī atu yuidi.

Jacob dadi

²⁹Peda wetsa Jacobpa awē wakewu yuidi: “Ē awetiāra dai. Ewē xidiwu baiyawu nadu ea baiwayaxakawe hititawawe na dukuwede awē ade Efrón bai kidi mera. ³⁰Naa bai kidi Canaán adu awē ade Macpelá na pexe ichapa chaiba awē ade Mamré. Ewē chata Abrahampa dukuwede awē ade Efrón peiuxū wiādi. Efrón hitita adua idi. Nadu awē yurawu baipakenuwu. Naduri ea baiwaaxikawe. ³¹Na ewē chata Abrahamnu Saranu ewē epa Isaacnu ewē ewa Rebecari nadu baiyawu. Ewē awī wetsa Lía naduri baiya. ³²Ewē chata Abrahampa hitita atū bai kidi atu peiuxū wiādi. Naduri ea baiwayaxakawe”. ³³Jacobpa awē wakewu ma atu yuita awē rakati adu rakaپakekawāta dadi. Awē xidiwu adu kadi.

50 ¹Ma apa Jacob daadu pishkuxu Josépa siaiyana apa tsu adi. ²Naskata awē yudubiswu atu chachibiswu atu yuidi apa ma daadu putei wenuwu awē xakī tsekai wunuwu pisiyabanu. Josépa atu yuiya keskawadiwu. ³Putexikakī betu wanu cuarenta peda badayudiu. Naatii peda ikaidu itipinidiwu. Setenta peda Egipto adu ikawawe Jacob shinadiwu ma daitake. ⁴Apa shinabakita faraónwe yudubiswu Josépa atu yuidi: “Ē batu idibababismaiki ea faraón yuixutakawe: ⁵‘Ea yuikuiwe’, ewē epa ea wayabea Canaán bai kidi adu ē baiwanupukunu. Awikui bai kidi itipiniwadi nadu ē baiwanupukunu. Baiwata ē awiana ē uikai”, Josépa faraón wadi. ⁶Naskata faraónpa yuidi: “Mewē epa baiwatawe. Na bia yuibus keskawatawe”.

⁷Josépa apa baiwai kaidu faraónpa awē pexe adu diaiwu wetsawu Egipto aduax Joséwe wudiwu. ⁸Jacobpa awē kaiwuu Josépa awē kaiwuu bai Gosen adu ichanadiwu atū pexe adu atū wakewu nichiwādiwu atū yuinawu kexenuwu. ⁹Naskata caballo carroyatu yura ichapa Joséwe wudiwu. ¹⁰Naskata katudiwu nadu awē ade Goren-ha-atad adu dukukata ede Jordán chaiba siete peda José shinabetsadi. Naatiwi yurawu shinabetsakuidiwu.

¹¹Canaán adu ikawawe siaikaiwawe uīkakī yuidiwu: “Egipciowu shinabetsakadi siaikadi”. Naskake nadu adediwu

Abel-misraim wadiwu. Naskaxu na bai adekakī Egipcio bai siaibis, wadiwu. Ede Jordán chaiba.

¹² Apa Jacobpa atu yuibis keskawadiwu awē wakewawe.

¹³ Abrahampa bai kidi Canaán adu hitita ika awē ade Efrónna Abrahampa peiuxū bai kidi wiādiadu na kidi awē ade Macpelá nadu Jacob baiwadiwu. Nadu Mamré chaiba idi. ¹⁴ Ma apa baiwakata José udiwetsawuwe na awe wuitawu Egipto adu dasudiuwu.

Josépa awē udiwetsawawe shinadiwu

¹⁵ Apa ma daitadu Josépa udiwetsawawe shinadiwu: “Joséparaka duku duikaspaiki na nu chakawadiuxū”, idiwu.

¹⁶ Naskata José tsai wubadiwu: “Dayuxuba nuku epa duku yuibis ¹⁷nu bia yuinu: ‘Mewē udiwetsawawe bia chakawadiwu. Atū chakawuki raewe’. Ikū nu bia chakawadi. Naskake dukuki raewe. Nuku epa awē Dios nu awē uibati”. Naa tsai dikai José siaidi. ¹⁸ Naskata Josépa awē udiwetsawu dukukata baikiri wepepakewuwakata yuidiwu: “Ma nu ua. Nu mewē uibatiwu”, wadiwu.

¹⁹ Naa dikakī atu kebadi: “Beseyabakawe. Ė Diosba”, Josépa atu wadi. ²⁰ “Matu shinama ma ea chakawapaidi. Naskaweke Epa Diospa naa chakawu sharawadi yurawu uduax ē rawanainu. ²¹ Naskata beseyabakawe. Ė batu piti inata matu wakewuri inai”, atu wadi. Naskaxu Josépa awē udiwetsawu atu shinabasharadi.

José dadi

²² José awē kaiuu apā awē kaiuu Egipto adu ipaudiwu. José ciento diez wari ma aka idi. ²³ Josépa awē wake Efraín. Efraínpa awē xutawu Josépa dayuxuba uīdi. Manasés Josépa awē wake wetsa naatu awē xutawuri awē wawa awē wake Maquirna Josépa uīdi. Awē ratuku adu atu tsaūdi.

²⁴ Peda wetsa Josépa awē udiwetsawu atu yuidi: “Ē awetiāra ē dai. Naskatari da bai aduxu Epa Diospa batu nichinupukui rewu Abraham Isaac Jacob atu yuiyudi adu”, Josépa atu

wadi. ²⁵Naskata awē wakewawe José yuikuinuwu atu yuidi: “Ea yuikuikawe”, atu wadi. “Ē batu yuikui. Epa Dios batu axunupukui. Naskake ē dake ewē xaka ma wutiru”, Josépa atu wadi.

²⁶José Egipto aduax dai ciento diez ma wari akax dadi. Naskata awē xakī tsekadiwu na daadu watiruwu adu dadediwu.